

## ଯୋହନଙ୍କ ପ୍ରତି ପ୍ରକାଶିତ ବାକ୍ୟ ଜହନଇଁ ତସାହାଁ ଝେକ୍‌ହି ବଲ୍ଲୁ ମୂଲୁ ହାଡ଼ା

ଝେକ୍‌ହି ବଲ୍ଲୁ ପୁଃନି ମେରାତି ରାଡ଼ି ପତି □ ଇଦି ଜିକେଏ ଜହନ ତାଣାଟି ଜୀସୁ କ୍ରୀସୁ ଜାର୍ନାଆଡ଼ି ୯୫ ବାର୍ସା ତାୟୁ ରାସ୍‌କି ଆହାମାତେ ୧:୧ □ ଏଝାସି ଜହନତି ନେହ୍ କାରୁତଲେ ତାନିଗଟା ଆକୁ ପତିୟାଁ ରାଟାମାତେସି ଏଝି ୧ଜହ, ୨ଜହ ଅଡ଼େ ୩ଜହ □ ଜହନ ଆମିନି ଗାଟାଣାଇଁ ଜୀସୁ ହାରେକା ଜୀଝୁ ନହ୍ ମାତେସି □ ଜହନ ଏୟୁ ମାଦିମାନି ବୁମିତି ପାଡ଼ମସ୍ ଗାୟୁତା ମାନି ବେଲାତା ଇ ଝେକ୍‌ହି ବଲ୍ଲୁ ରାଟାମାତେସି, ଇତିହ୍ ଜୀସୁ କ୍ରୀସୁତି ନେହ୍ କାରୁତାକି ଏଝାଣାଇଁ ଏମ୍ବାଆଁ ଅଝିଆହାମାତେ ଜହ ୧୩:୨୩ □

ଜୀସୁ ଝେଶ୍ଟା ଝାନ୍ତି ଦିନା ତାଗେ ଝାହି ମାନାକି ଜୀସୁ କ୍ରୀସୁ ତାଣା ନାମୁତଲେ ମାଞ୍ଜାଲି ପଡ଼ଝି ଆନାରାକି ସାସା ଅଡ଼େ ଆସା ହାହାଲିତାକି ଇ ଝେକ୍‌ହି ବଲ୍ଲୁ ରାଡ଼ିତେସି ୧:୩; ୨୨:୭ □ ଏଝାସି ବାରେ ନାମିତି ଲକୁ ଅଡ଼େ ବାରେକିହାଁ ସାଡାଗଟା କୁଲମିତାକି ରାଡ଼ିମାନେସି ୨-୩ □ ଜହନ ତାନି ରାଡ଼ିନି ତାଣା ମାହାପୁରୁ ଅଣପୁତି ବଲ୍ଲୁ୧:୩ ଅଡ଼େ ତାନି ମେସାମାନି ହାରେକା ସିନାୟାତି କାତା ରାଡ଼ିମାନେସି □ ଇ ପତିତି ଏଚେକା ତାଣା ପୁଃଇ ପତି ତଲେ ସମାନା ମାନାଣି, ଜିକ ୬:୧-୮ ମେସାଲି ଆଡ଼ିନାୟି □ ସାଡାଗଟା ତୀଡ଼ି ଅଡ଼େ ସାଡାଗଟା ଗିନାୟାଁ ଏମିନି ଗାଟାଇଁ ମାହାପୁରୁ ମିସରତି ଲକୁଣି ଡ଼ଣ୍ଡ ହାହାଲିତାକି କସ୍‌ୟାଁ ପାଣ୍ଡାନେସି ହାନାୟି ୭-୯ □

ଝେକ୍‌ହି ବଲ୍ଲୁ ରାଡ଼ି ବେଲାତି କାତା ଝେସିମାନେ, ଜୀସୁ ତାୟୁ ଜୀଣା ଆନେସି ଅଡ଼େ ଆମିନି ଗାଟାରି ଏଝାଣି ତାଣା ବାର୍ସୁ ଇଚିନେରି ଏଝାରି ବାରେବେଲା ଏଝାଣିତଲେ ଡ଼ୟିନେରି □ ଇ ପତି ନିଙ୍ଗେ ଜାଗ୍ରାତା କିୟାପେ ଅଡ଼େ ଆସା ହିୟାପେ, ଇତିହ୍ ଜୀସୁ ତବେ ଝେଶ୍ଟା ଝାହିମାନେସି □

**ପତିତା ମାନାୟି**

- ୧ ଜହନ ତାଙ୍ଗେ ପୁଣ୍ଡିକିନାୟି ଅଡ଼େ ତାୟୁତି କାତା ମେହନାୟି  
□ ୧:୧-୨୦
- ୨ ସାଡ଼ାଗଟା କୁଲମିକାକି ଜୀସୁ କ୍ରୀସ୍ତ ତାଣାଟି ଜହନତି କାବୁ □  
୨:୧-୩:୨୨
- ୩ ସାଡ଼ାଗଟା ବୁଟୁ ମୁଦ୍ରା ଅଡ଼େ ସାଡ଼ାଗଟା ତୀଡ଼ି □ ୪:୧-୧୧:୧୯
- ୪ ମୀରକା ଅଡ଼େ ସାଡ଼ାଗଟା ତାର୍କାଗାଟି ରାବୁ ତଲେ ଜୁଜୁ □  
୧୨:୧-୧୪:୨୦
- ୫ ସାଡ଼ାଗଟା କପାଗାଟି ଗିନାୟି □ ୧୫:୧-୧୬:୧୮
- ୬ ମାହାପୁରୁ ଲାକପୁରୁ ତାନି ସାଡ଼ୁଇଁ ଜୀଣା ଆନାୟି □ ୧୭:୧-  
୨୦:୧୫
- ୭ ପୁଃନି ଲାକପୁରୁ ଅଡ଼େ ପୁଃନି ଦାରତି □ ୨୧:୧-୨୨:୨୧

୧ ଜୀସୁ କ୍ରୀସ୍ତତି ଝେକ୍‌ହି ବଲ୍ଲୁ; ଝେଡ଼ା ଆଆନା ଏନାୟି ଗଟ଼ି ଆନେ ଏଦାଆଁ ବାରେ ଏଞ୍ଜାସି ଏନିକ୍‌ ତାନି ହଲ୍ଲିୟାଙ୍ଗାଣି ଝେହ୍‌ନେସି, ଏଦାଆଁତାକି ମାହାପୁରୁ ଇଦାଆଁ ଜୀସୁ ନକିତା ହେରପିତେସି, ଅଡ଼େ ଏଞ୍ଜାସି ତାନି ଦୂଡୁଇଁ ପାଣ୍ଡାନା ତାନି ହଲ୍ଲିୟା ଜହନଇଁ ଏଦାଆଁ ଝେସ୍ତେସି □

୨ ଏ ଜହନ ମାହାପୁରୁତି ବଲ୍ଲୁ ଅଡ଼େ ଜୀସୁ କ୍ରୀସ୍ତତି ସାକି କାତା ଇତିହ୍‌ ଏଞ୍ଜାସି ଏନାଆଁ ମେସ୍ତେସି ଏ ବାରେ କାତାତି ସାକି ହୀହିମାନେସି □

୩ ଆମ୍ବାଆସି ଇ ପତି ପଡ଼଼ି ଆନେସି ଇଞ୍ଜା ମାହାପୁରୁତି ବଲ୍ଲୁ ଝେଞ୍ଜାନା, ଇ ପତିତା ରାସ୍‌କି ଆହାମାନାଣି ବାରେ ମାନ଼ି ଆନାରି ନେହାରି, ଏନାଆଁତାକି ଇତିହ୍‌ ଇ ବାରେ ଗଟ଼ି ଆନି କାଲମି ତାଗେ ଝାଡ଼େୟିଏ □

**ସାଡ଼ାଗଟା କୁଲମିକି ଜହରା କିନାୟି**

୪ ✽ନାନୁ ଜହନତେଏଁ, ଆସିୟାତା ମାନି ସାଡ଼ାଗଟା କୁଲମିକାଣି ଜହରା ଝେସାନା ରାଡ଼ିମାଞ୍ଜାଇଁ, ମାହାପୁରୁତି କାର୍ମାମେହନାୟି ଅଡ଼େ ହିଡ଼ତି ଜୀଞ୍ଜୁ ମିଙ୍ଗେ ଆୟାପେ, ନୀଏଁ ଆମ୍ବାଆସି ମାନେସି ତଲି ମାଗାସି ଅଡ଼େ ଜିକେଏ ତାୟୁ ଦିନା ଝାନ୍‌ନେସି, ଅଡ଼େ ତାନି ରାଜିତି ସିଂଗାସାଣି ନକିତା ନିଚାମାନି ସାଡ଼ାଗଟା ଜୀଞ୍ଜୁୟାଁ ତାଣାଟି,

---

✽ ୧:୪ ୧:୪ ଝେ ବଲ୍ଲୁ ୪:୫

\* ଜୀସୁ କ୍ରୀସ୍ତ ନାମୁତି ସାତା ସାକି ହୀନାସି, ହାଡ଼ାରି ବିଦ୍ରାଠି ତଲିଏ ଜାର୍ନା ଆଡ଼ାସି, ଅଡ଼େ ଦାର୍ତ୍ତିତି ରାଜାୟାଣି ସାଲୁଝି କିନାସି □ ଏଝାସି ମାଙ୍ଗେ ଜୀଝୁ ନହାଁମାଞ୍ଜାନେସି, ଅଡ଼େ ତାନି ନେତେରିଟି ମାଙ୍ଗେ ପାପୁଟି ଗେଲ୍‌ପାତେସି □

୬ \*ଅଡ଼େ ମାଙ୍ଗେ ର ରାଜାତି କୁଲୁଲେହେଁ କିହାନା ଆବା ମାହାପୁରୁ ନକିତା ପୂଜେରା ଲେହେଁ ଆଚାମାଞ୍ଜାନେସି, ତାନି ଗାଝୁରମି କାଜାପାଣା କାଲାକାଲା ତାକି ଆପେ □ ଆଫେନ୍ □

୭ \*ମେହଦୁ ଏଝାସି ଦୁନ୍ଦା ତଲେ ଝାହିମାନେସି, ଏଚେଟିଏ ବାରେ କାଶକା ଏଝାଣାଇଁ ମେହନ୍, ଅଡ଼େ ଏଝାଣାଇଁ ଗୁକ୍‌ହା ମାଚାରି ଜିକେଏ ମେହନେରି, ଦାର୍ତ୍ତିତାରି ବାରେ କୂଡ଼ା ଏଝାସି ଝାହିମାନାକି ଡ଼ାନେରି ଏଡ଼ି ସାତା ଆଫେନ୍ □ ଆଫେନ୍ □

୮ ବାରେ ବାଡ଼ମୁ ଗାଟି ପ୍ରବୁ ମାହାପୁରୁ ଝେସିମାନେସି, ନାନୁ ମାଚନାତେଏଁ ଅଡ଼େ ରାପନାତେଏଁ, ଆମ୍ବାଆସି ନାଏଁ ମାନେସି ତଲିଏ ମାଚେସି ଅଡ଼େ ତାୟୁ ଦିନା ଝାନାସି ନାନୁ ଏଝାତେଏଁ □

**କ୍ରୀସ୍ତାଇଁ ମେହନାୟି**

୯ ନାନୁ ଜହନତେଏଁ, ମୀ ତାୟିତେଏଁ, ଜୀସୁତି ସୀସୁ ଆହାଁ ତାନି ରାଜି ଲକୁଡାକି ଝାହିମାନି କସ୍ତ ଅରହାଲି ନାନୁ ମୀ ତଲେତି ର ମାଣସିତେଏଁ □ ଜୀସୁ ତସାମାନି ସାତା ଇଞ୍ଜାଁ ମାହାପୁରୁତି ବଲ୍ଲୁ ଝେସିମାଚାକି ନାଙ୍ଗେ ପାଡ଼ମସ୍ ସାମ୍‌ଦୁରି ମାଦି ମାନି ଟାୟୁତା ପାଣ୍ଡାମାଞ୍ଜାତେରି □

୧୦ ପ୍ରବୁତି ଦିନାତା ସୁଦୁଜୀଝୁ ନା ଲାକ ରେଚାଝାଡେ, ଅଡ଼େ ନାନୁ ତାୟୁ ଝାକିଟି ତାଡ଼ି ମହୁରି ଲେହେଁତି କାଜା ଗିୟାତଲେ ଏଲେ ଇଞ୍ଜିମାଟି ର ହାଡ଼ା ଝେଚେଏଁ □

୧୧ ନାନୁ ମେସିମାନାଣି ରାଚାମୁ ଅଡ଼େ ଇ ପତିତି ଇ ସାଡ଼ାଗାଟା କ୍ରୀସ୍ତାନା କୁଲମି ଇଚିହଁ ଏପିସି, ସ୍ପୁର୍ନା, ପର୍ଗମ, ତୁୟାତିରା, ସାଦ, ପିଲାଦେଲ୍‌ପିୟା ଅଡ଼େ ଲାଝୁଦିକିୟାତି କୁଲମିତା ପାଣ୍ଡାମୁ □

☆ ୧:୬ ୧:୭ ଝେ ବଲ୍ଲୁ ୫:୧୦ ☆ ୧:୭ ୧:୭ ମାତି ୨୪:୩୦; ମାର୍କ ୧୩:୨୬; ଲୁକ ୨୧:୨୭; ୧ତେସ ୪:୧୭; ଜହ ୧୯:୩୪, ୩୭; ମାତି ୨୪:୩୦

୧୨ ଆମ୍ବାଆସି ନା ତଲେ କାତା ଆହିମାନେସି, ଇଦାଆଁ ମେସାଲି  
ଝେଣ୍ଡେ ସିନିକିତେସ୍, ଇଞ୍ଜା ସାଡାଗଟା ବାଂଗାରା ଦୀଝ୍‌ୟାଁ,

୧୩ ଇଞ୍ଜା ଏ ଦୀଝ୍‌ୟାଁ ମାଦିଏ ମାଣ୍ଡସି ମୀରଏଣା ଲେହେଁ ର  
ମାଣ୍ଡସି; ଏଞ୍ଜାଣି ପାଃଆନାୟାଁ ପାତେକା ହିମ୍ବରି ପ୍ଲିକ୍‌ହା ମାତେ ଅଡ଼େ  
ବକତା ବାଂଗାରା ପାଟାତି ତ:ରି ରୁପାମାତେ;

୧୪ ଏଞ୍ଜାଣି ତାୟାଁ ବାଣାୟାଁ ଅପ୍‌ହି ଲୁଲୁ ଅଡ଼େ ପେଣ୍ଡି ମାରୁ  
ଲେହେଁ ଦବଲା, ଅଡ଼େ ଏଞ୍ଜାଣି କାଣ୍‌କା ହିରୁ ଲେହେଁ ଡ଼ାଞ୍ଜି ମାରୁ  
□

୧୫ ତାନି ପାଃଆନାୟାଁ ହଲୁତା ହୃତିତି ପିତାଡ଼ା ମ୍ବିସିମାନି ଲେହେଁ  
ମିଣ୍ଡସି ମାରୁ, ଅଡ଼େ ତାନି ରିୟାଁ ଲଦ ଲଦ ଇଞ୍ଜାଁ ରିହିମାନି ଏୟୁତି  
ହାଡ଼ା ଲେହେଁତାୟି □

୧୬ ତାନି ଚିଃନି କେୟୁତା ସାଡାଗଟା ହୁକାୟାଁ ମାରୁ, ତାନି ଗୁତିତି  
ରିକଞ୍ଜାକି ଦାରାଗାଟି କାଣ୍ଡା ହଡ଼େ, ତାନି ମ୍ବୁମ୍ବୁ ମାଦେନା ବେଲା  
ଡ଼ାଞ୍ଜିମାନି କାରା ଲେହେଁ ଉଜେଡ଼ି ଗାଗାୟି □

୧୭ ✨ନାନୁ ଏଞ୍ଜାଣାଲ୍ ମେସ୍‌ପନିଏ ହାଡ଼ିଲେହେଁ ତାନି କଡାୟାଁ  
ଡ଼ଇ ରିତେସ୍, ଏମ୍ବାଟିଏ ଏଞ୍ଜାସି ନା ଲାକ ତାନି ଚିଃନି କେୟୁ  
ଇଟାନା ଇଲେ ଇଞ୍ଜାତେସି, ଆଜାଆନି ନାନୁ ମାଟ୍‌ନାତେସ୍ ଅଡ଼େ  
ରାପ୍‌ନାତେସ୍ □

୧୮ ଆଜାଆଦୁ ନାନୁ ନୀତା ମାନାତେସ୍ ହାଡାତେସ୍, ନାନୁ କାଲା  
କାଲେଏତାକି ନୀତାମାଲ୍, ହାନାୟି ଅଡ଼େ ହାଡାରି ରାଜିତି କୁଟିକାଡ଼ି  
ନା କେୟୁତା ମାନେ □

୧୯ ଇଚିହ୍‌ ନାନୁ ଏନାଆଁ ମେସାମାଞ୍ଜି, ଅଡ଼େ ଏନାୟି ନୀସ୍  
ଆହିମାନେ ଇଞ୍ଜାଁ ଇଦାଣି ଜେଚ ଏନାୟି ଆନେ ଇ ବାରେ ରାଟା  
ଇଟାମ୍ବୁ □

୨୦ ନା ଚିଃନି କେୟୁତା ମେସାମାନି ସାଡାଗଟା ହୁକାୟାଁ ଅଡ଼େ  
ସାଡାଗଟା ବାଂଗାରା ଦୀଝ୍‌ ସଡ଼ାୟାଁତି ଡ଼ରୁମାନି କାତା ଇଦି,  
ସାଡାଗଟା ହୁକାୟାଁ ସାଡାଗଟା କୁଲମିତି ଦୁତୁୟାଁ, ଅଡ଼େ ସାଡାଗଟା  
ବାଂଗାରା ଦୀଝ୍‌ ସଡ଼ାୟାଁ ସାଡାଗଟା କୁଲମିକା □

# ୨

## ଏପିସି କୁଲମିତାକି କାରୁ

୧ “ଏପିସି କୁଲମିତି ଦୁତୁ ତାଣା ରାତାମୁ, ଆମ୍ବାଆସି ଟିଃନି କେୟୁତା ସାତାଗଟା ହୁକାୟା ଆସାମାନେସି ଅଡ଼େ ସାତାଗଟା ବାଂଗାରା ଦୀଝି ସତାୟା ମାଦି ରେଜିମାନେସି,

୨ ଏଝାସି ଏଲେଇଞ୍ଜି ମାନେସି, ନୀନୁ କିହାମାନି କାମା ନାନୁ ପୁଞ୍ଜାମାଇଁ, ନୀନୁ ଏନିକ୍‌ ଝାହୁତଲେ କାମା କିହିମାଞ୍ଜି, ଅଡ଼େ ଏଚେକା ଅର୍‌ହିମାଞ୍ଜି ଏଦାଆଁ ପୁଞ୍ଜାମାଇଁ, ନୀନୁ ଲାଗେଏ ପଲେଏ କାମା କିନାରାଇଁ ଅପିହିଲଅତି, ଅଡ଼େ ପାଣୁଝି ଆଆନା ମାମୁ ପାଣୁଝି ଆହାମାନମି ଇଞ୍ଜି ଝେସା କଡିନେରି, ନୀନୁ ତାୟିପାରି କିହାଁ ଏଝାରି ମିତି କାତା ଝେହନାରି ଇଞ୍ଜି ପୁଞ୍ଜିମାଞ୍ଜି □

୩ ନା ଦରୁ ତାକି ଦୁକୁ କସ୍ତୁ ଅର୍‌ହିମାଞ୍ଜି ଇଞ୍ଜାଁ ଝାହାହିଲଅତି ଇଦାଆଁ ଜିକେଏ ନାନୁ ପୁଞ୍ଜାମାଇଁ □

୪ ଆତିହ୍‌ ଜିକେଏ ନୀ କପାଟି ନା ଇ କାତା ମାନେ, ତଲି ଜୀଝୁନହ୍‌ ମାଞ୍ଜାତିଲେହେଁ ନୀଏଁ ଜୀଝୁନହ୍‌ ମାଞ୍ଜଅତି □

୫ ଅଡ଼େ ନୀନୁ ଏନିକ୍‌ ଡ଼ଇ ତରଗା ମାଞ୍ଜି ଏଦାଆଁ ଅଣ୍‌ପାନା ନୀ ପାପୁ ପିସାହାଁ ମନ ଝେଟ୍‌ମୁ ଅଡ଼େ ତଲିତିଲେହେଁ ସାତା କାମା କିମ୍‌, ଆଆତ୍‌ ଏଚେତା ନୀନୁ ହିୟାଁ ଝେଟ୍‌ଅତି, ନୀନୁ ନୀ ତାଣା ତବେ ଝାହାନା ନୀ ଦୀଝି ନୀ ତାଣାଟି ଏଟ୍‌କା ଗୁଟିକିୟାଇଁ □

୬ ଆଡ଼ିଜିକେଏ ନୀ ତାଣା ର ନେହ୍‌ ଗୁଣ୍ଡୁ ମାନେ ନାନୁ ଏନିକ୍‌ ନିକଲାୟତାରି ବାରେ କାମା ଅପିହିଲଅଁ ଏଲେକ୍‌ ନୀନୁଝା ଅପିହିଲଅତି □”

୭☆ “କୁଲମିକାଣି ସୁଦୁଜୀଝୁ ଏଦାଆଁ ଝେସିମାନେ ଆମ୍ବାଆରି କୀକାଁ ମାନୁ ଏଦାଆଁ ଝେଣ୍‌ମାସି □ ଆମ୍ବାଆସି ଜୀଣା ଆନେସି, ଏଝାଣାଇଁ ନାନୁ ମାହାପୁରୁ ରାଜିତା ମାନି ଜୀଝୁଗାଟି ମାର୍‌ନୁଡି ପାଡ଼େୟି ତିଞ୍ଜାଲି ହୀଇଁ □”

## ସ୍ପର୍ନା କୁଲମିତାକି କାରୁ

☆ ୨:୭ ୨:୭ ଝେ ବଲ୍ଲୁ ୨୨:୨

୮ ☆ “ସ୍ତନୀ କୁଲମିତି ଦୂତୁ ତାଣା ରାଚାମୁ, ଆମ୍ବାଆସି ତଲିତାସି ଅଡ଼େ ତାୟୁତାସି, ଆମ୍ବାଆସି ହାହାମାଚେସି ଅଡ଼େ ଝେଣ୍ଡେ ନୀଡିତେସି, ଏଞ୍ଜାସି ଏଲେଇଞ୍ଜି ମାନେସି □

୯ ନାନୁ ନୀ ବାରେ କସ୍ତ ଅଡ଼େ ହାକି କାକୁଲି ପୁଞ୍ଜାମାଈଁ, ସାମା ନୀନୁ ବାଡ଼କୁ ଗାଟାତି ଅଡ଼େ ଆମ୍ବାଆରି ଜୀହୁଦି ଲକୁ ଆଆନା ମାମ୍ବୁ ଜୀହୁଦି ଲକୁତମି ଇଞ୍ଜିଁ ଇନେରି, ଏଞ୍ଜାରି ସୟତାନ ଗତିତାରି ଏଞ୍ଜାରି ନିନ୍ଦା ଜିକେଏ ନାନୁ ପୁଞ୍ଜାମାଈଁ □

୧୦ ମୀରୁ ଏମିନି ଦୁକୁ ବେଟାଆହାଲି ହାଜି ମାଞ୍ଜେରି, ଏ ବାରେ ଆଜାଆଦୁ; ମେହ୍‌ଦୁ ମିଙ୍ଗେ ତାୟିପାରି କିହାଲି ସୟତାନ ମୀ ବିତ୍ରାତି ଆମ୍ବା ଆମ୍ବାଆରାଇଁ କାୟିଦିତା ଇଟିନେ, ଅଡ଼େ ମୀରୁ ଦସ ଦିନା କସ୍ତ ବେଟାଆଦେରି □ ମୀରୁ ହାନି ପାତେକା ନାମୁତଲେ ମାଞ୍ଜୁ, ଆତିହ୍ଁ ନାନୁ ମିଙ୍ଗେ ଜୀଞ୍ଜୁତି ଟପେରି ହିୟାଈଁ □”

୧୧ ☆ “କୁଲମିତି ସୁଦୁଜୀଞ୍ଜୁ ଏନାଆଁ ଝେସିମାନେ, ଝେଞ୍ଜାଲି କୀକୀ ମାଟିସାରେ ଝେଣ୍ଡମ୍ବାସି, ଆମ୍ବାଆସି ଜୀଣା ଆନେସି ଏଞ୍ଜାଣାଇଁ ଅର ଦେବାତି ହାକି ତଲେ ନସ୍ତ କିହାଲି ଆଡ଼େଏ □”

### ପର୍ଗମ କୁଲମିତାକି କାରୁ

୧୨ “ପର୍ଗମ କୁଲମିତି ଦୂତୁ ତାଣା ରାଚାମୁ, ଆମିନି ଗାଟାଣି ତାଣା ରିକଞ୍ଜାକି ଦାରା ଗାଟି କାଣ୍ଡା ମାନେ ଏଞ୍ଜାସି ଏଲେଇଞ୍ଜି ମାନେସି □

୧୩ ଆମିନି ତାଣା ସୟତାନତି ସିଂଗାସାଣି, ଏମ୍ବାଆଁ ନୀନୁ ବାସା କିହିମାଞ୍ଜି, ଇଦାଆଁ ନାନୁ ପୁଞ୍ଜାମାଈଁ, ଆତିହ୍ଁ ଜିକେଏ ନୀନୁ ନା ଦରୁତି ଆଟ୍‌ଞ୍ଜା ତଲେ ଆସାମାଞ୍ଜି, ଅଡ଼େ ନା ସାକି ଆନ୍ତିପା ଏଟିବେଲା ମୀ ତାଣା ସୟତାନତି ବାସା ଟାୟୁତା ପାୟୁଞ୍ଜି ଆହାମାଚେସି, ମୀରୁ ନା ତାଣା ନାମାମାନାକି ଏଟିବେଲାତା ଜିକେଏ ନାଙ୍ଗେ ପୁଞ୍ଜାହିଲଆଁ ଇଞ୍ଜାଆତି □

୧୪ ଆଡ଼ିଜିକେଏ ନୀ କପାଟି ର କାତା ମାନେ, ଇତିହ୍ଁ ଆମିନି ବିଲିୟମ ପେଣ୍‌କା ବମାୟାକି ଡାକାମାନି ବଗୁ ତିନି ତାଣାଟି ପାପୁ ଅଡ଼େ ଦାରିକାମା କିଞ୍ଜିକିନି ପାନ୍ଦା ମେଡ଼ହାଲି ଇସ୍ରାୟେଲ ମୀରକା

☆ ୨:୮ ୨:୮ ଝେ ବଲ୍ଲ ୧:୧୭; ୨୨:୧୩ ☆ ୨:୧୧ ୨:୧୧ ଝେ ବଲ୍ଲ ୨୦:୧୪; ୨୧:୮

ବାଲାକଇଁ ଜାପୁହା ମାଚେସି, ଏଲେତି କାମା କିନି ଲକୁ ମୀ ବିତ୍ରାତି ଏଚରଜାଣା ତାକିନାରି ମାନେରି □

୧୫ ଏଲେକିହି ଏ ନିକଲାୟ ଜାପୁନାଣି ଆସାମାନି ଲକୁ ମୀ ବିତ୍ରା ମାନେରି □

୧୬ ଏଦାଆଁତାକି ମୀ ପାପୁ ପିସାନା ହିୟାଁ ଝେଟ୍‌ଦୁ ଆଆତ୍ ନାନୁ ମୀ ତାଣା ତବେ ଝାହାନା ନା ଗୁତିଟି ହନି କାଣ୍ଡାତଲେ ଏଝାରି କପାତି ଜୁଜୁ କିଇଁ □”

୧୭ ☆ “କୁଲମିକାଣି ସୁଦୁଜୀଝୁ ଏନାଆଁ ଝେସିମାନେ ଆମ୍ବାଆରି କୀର୍କା ମାନୁ ଏଦାଆଁ ଝେଣ୍‌ମାସି □ ଆମ୍ବାଆସି ଜାଣା ଆନେସି ଏଝାଣାକି ତୁଗୁମାନି ମାନା ତିଞ୍ଜାଲି ହୀଇଁ ଅଡେ ଏଝାରି ବିତ୍ରାତି ବାରେଜାଣାତି ପୁଝନି ଦରୁ ରାସ୍‌କି ଆହାମାନି ର ଦବ୍‌ଲା ଝାଲି ହୀଇଁ, ଏ ପୁଝନି ଦରୁ ଏନାୟି ଝାଲି ଆନାଣା ପିସ୍‌ପେ ଆମ୍ବାଆସି ପୁନଅସି □”

**ତୁୟାତିରା କୁଲମିତାକି କାବୁ**

୧୮ “ତୁୟାତିରା କୁଲମିତି ଦୃତୁ ତାଣା ଇଲେଇଞ୍ଜିଁ ରାଚାମ୍ବୁ ମାହାପୁରୁତି ଆମିନି ମୀରୁଏଣା କାଣକା ତୀଞ୍ଜିମାନି ହିରୁ ଲେହେଁ ଇଞ୍ଜା ପାଠଆନା କତାୟାଁ ମ୍ବୁସିମାନି ପିତାଡା ଲେହେଁ ଏଝାସି ଏଦାଆଁ ଏଲେଇଞ୍ଜି ମାନେସି □

୧୯ ନାନୁ ନୀ କାମା, ଜୀଝୁ ନନାଣି, ନାମୁତଲେ ସେବା କିନାଣି, ଅରୁହିନାଣି ପୁଞ୍ଜାମାଇଁ, ଅଡେ ନୀ ତଲିତି କାମା କିହାଁ ନୀଏଁ ହାରେକା ଗାତି କାମା କିହିମାଞ୍ଜି, ଇଦାଆଁ ଜିକେଏ ପୁଞ୍ଜାମାଇଁ □

୨୦ ଆଡିଜିକେଏ ନୀ କପାତି ର ଇତି କାତା ମାନେ, ଜିଜେବଲ୍ ଦରୁଗାଟି ଆମିନି ଇୟା ଜାହାରାଇଁ ମାହାପୁରୁ ଅଣ୍‌ପୁତି ବଲ୍ଲୁ ଝେକ୍‌ନାତେଏଁ ଇଞ୍ଜିଁ ଝେସାକତାନା, ନା ସେବା କିନାରାଇଁ ଦାରିକାମା ଅଡେ ପେଣ୍‌କା ବମାୟାଁକି ଡାକାମାନି ବଗୁ ତିଞ୍ଜାଲି ଜାପୁହାନା ଲାଗେଏ କିଝି କିହାମାନେ, ମୀରୁ ଏଦାଣି ଅରୁହି ମାଞ୍ଜେରି □

୨୧ ନାନୁ ଏଦାନାକି ତାନି ପାପୁ କାମା ପିସାନା ମନ ଝେଟ୍‌ହାଲି ହୀତି ଜିକେଏ, ତାନି ଦାରିକାମା ପିସାଲି ମନ କିଆଡେ □

୨୨ ଇଦାଆଁତାକି ନାନୁ ଏଦାନି ମାଡୁ ହୁଞ୍ଜକିଇଁ, ଅଡ଼େ ଆମିନି ଗାଟାରି ଏଦାନିତଲେ ଦାରିକାମା କିନେରି, ଏଞ୍ଜାରି ତାମି ପାପୁ କାମାଟି ହିୟାଁ ଝେଟ୍‌ଆତ୍ ନାନୁ ଏଞ୍ଜାରାଇଁ ଆଜିହପେତି ସାସ୍ତି ହାଇଁ  
□

୨୩ ଅଡ଼େ ନାନୁ ତାନି ମୀରକା ମାସ୍‌କାଇଁ ହାକି ତଲେ ନାସାକିଇଁ, ଏଚେଟିଏ ନାନୁ ବାରେ ଲକୁତି ହିୟାଁ ଅଡ଼େ ମନତି ଅଣ୍‌ପୁ ପୁନାତେଏଁ, ଅଡ଼େ ବାରେଜାଣାକି ତାମି କାମାଟି ପାଡ଼େୟି ହୀନାତେଏଁ ଇଞ୍ଜିଁ ବାରେ କୁଲମିକା ପୁଞ୍ଜାନୁ □”

୨୪ “ସାମା ମୀରୁ ତୁୟାତିରାତା ଏଚରଜାଣା ମାନାତେରି ଏ ଲାଗେଏତି ଜାପୁନାଣି ଆସା ହିଲଅତେରି, ଇଞ୍ଜାଁ ଏଟ୍‌କାତାରି ଏନାଆଁ ସୟତାନତି ଡୁଗାମାନି କାତା ଇଞ୍ଜିଁ ଇନେରି, ଏଦାଆଁ ମୀରୁ ଜାପାହିଲଅତେରି, ନାନୁ ଏଞ୍ଜାରି ଲାକ ଏନି ପୁଞ୍ଜି ବଜୁ ହାଅଁ □

୨୫ ଇଚିହଁ ମୀ ତାଣା ଏନାୟି ମାନେ ଏଦାଆଁ ନା ଝାନ୍ତି ଦିନା ପାତେକା ତୀରିତଲେ ଆସାମାଞ୍ଜୁ □”

୨୬ ଆମ୍ବାଆସି ଜୀଣା ଆନେସି, ଅଡ଼େ ତାୟୁ ପାତେକା ନା କାମା କିନେସି, ନାନୁ ଏନିକିହଁ ନା ଆବା ତାଣାଟି ଅଦିକାରା ବେଟାଆହାମାଇଁ, ଏଲେକିହଁ ଏ ଏଞ୍ଜାଣାକି ଏ ଦେସାତି ଅଦିକାରା ହାଇଁ □

୨୭ ଏଞ୍ଜାସି ବାରେ କୁଡ଼ାତି ଲକୁଣି ଲହ୍ ବାଡ଼ଗା ତଲେ ସାଲଞ୍ଜି କିନେସି ଅଡ଼େ ଇର୍‌ଆ ତ:କାୟାଁ ଲେହେଁ କୁରୁକୁଟା କିନେସି □

୨୮ ଅଡ଼େ ନାନୁ ଏଞ୍ଜାରାକି ଝେୟାଜାରା ହୁକା ଜିକେଏ ହାଇଁ □

୨୯ “କୁଲମିକାଣି ସୁଦୁଜୀଞ୍ଜୁ ଏନାଆଁ ଝେସିମାନେ ଆମ୍ବାଆରାକି କୀର୍‌କା ମାନୁ ଏଦାଆଁ ଝେଣ୍‌ମାସି □”

## ୩

ସାଦଁ କୁଲମିକି କାରୁ

୧ “ସାଦଁ କୁଲମିତି ଦୂତୁ ତାଣା ରାଟାମୁ, ଆମ୍ବାଆସି ମାହାପୁରୁତି ସାଡ଼ାଗଟା ଜୀଞ୍ଜୁୟାଁ ଅଡ଼େ ସାଡ଼ାଗଟା ହୁକାୟାଁ ଆସାମାନେସି ଏଞ୍ଜାସି ଏଲେଇଞ୍ଜି ମାନେସି, ନାନୁ ମୀ କାମା ବାରେ ପୁଞ୍ଜାମାଇଁ ମୀରୁ ଦରୁ ତାକି ଜୀଞ୍ଜୁ ଗାଟାତେରି, ସାମା ସାତା ତଲେ ହାଡ଼ାତେରି □



୨ ଜାଗ୍ରାତା ଆଦୁ ଅଡ଼େ ମୀ ତାଣା ଏନାୟି ମାନେ ଏ ବାରେ ଡ଼ଗ୍‌ନି ନକେଏ ଏଝାଆଁ ବାଡ଼ୁୟୁ କିଦୁ, ଇଚିହିଁ ନାନୁ ମୀ ବାରେ କାମା ନା ମାହାପୁରୁ ନକିତା ଦହ୍ ହିଲାଆଗାଟାୟି ତଞ୍ଜା ଆହା ହିଲେଏ □

୩ ☆ଏଦାଆଁତାକି ମୀରୁ ଏନିକିଁ ଜାପାମାଞ୍ଜେରି ଅଡ଼େ ଝେଞ୍ଜାମାଞ୍ଜେରି ଏଦାଣି ଅଣ୍‌ପାନା ମାନୁଝି ଆଦୁ ଇଞ୍ଜା ପାପୁଟି ହିୟାଁ ଝେଟୁଦୁ; ମୀରୁ ଜାଗ୍ରାତା ଆଆତିହିଁ ନାନୁ ସରୁଲେହେଁ ମୀ ତାଣା ଝାଈଁ, ଏଦାଣି ଏନିଜିକେଏ ମୀରୁ ପୁଞ୍ଜାଲି ଆଡ଼ଅଡ଼େରି □

୪ ଯାମା ଯାଦିଁ ତା ମୀ ବିଡ଼ା ଏଚରଜାଣା ମାନେରି, ଏଝାରି ତାନି ହିମ୍‌ବିକା ମାହିଁ କିହାଁ ହିଲଅରି, ଏଝାରି ଅପ୍‌ନି ହିମ୍‌ବିକା ହୁଚାନା ନା ତଲେ ତାକିନେରି, ଏନାଆଁତାକି ଇଚିହିଁ ଏଝାରି ପାଡ଼ା ଆଡ଼ାରି □

୫ ☆ଆମ୍ବାଆରି ଜାଣା ଆନେରି ଏଝାରି ଏଲେତି ଅପ୍‌ନି ହିମ୍‌ବିକା ହୁଚିନେରି, ଅଡ଼େ ନାନୁ ଏଝାରି ଦରୁ ଜାଝୁଗାଟି ପତିଟି ଏଚେଲାଝା ମ୍‌ନେକ୍‌ଆଁ, ଇଞ୍ଜା ନାନୁ ନା ଆବା ଅଡ଼େ ତାନି ଦୁଡୁୟାଁ ନକିତା ନା ତଲେତାରି ଇଞ୍ଜିହିଁ ଏଝାରି ଦରୁ ଝେକ୍‌ଇଁ □”

୬ “କୁଲମିକାଣି ସୁଦୁଜାଝୁ ଏନାଆଁ ଝେସିମାନେ ଆମ୍ବାଆରି କାର୍‌କା ମାନୁ ଏଦାଆଁ ଝେଣ୍‌ମାସି □”

### ପିଲାଦେଲ୍‌ପିୟା କୁଲମିତାକି କାବୁ

୭ “ପିଲାଦେଲ୍‌ପିୟା କୁଲମିତି ଦୁଡୁ ତାଣା ରାଚାମ୍, ଆମ୍ବାଆସି ସୁଦୁଗାଟାସି ଅଡ଼େ ସାତାତାସି ଆମିନିଗାଟାଣି କେୟୁତା ଦାଝୁଦତି କୁଚିକାଡ଼ି ମାନେ, ଏଝାସି ଦାଚା ଦେଡିସାରେ ଆମ୍ବାଆସି ସୁଶାଲି ଆଡ଼ଅସି, ଅଡ଼େ ଦାଚା ସୁଶିସାରେ ଆମ୍ବାଆସି ଦେତାଲି ଆଡ଼ଅସି,

୮ ଏଝାସି ଏଲେଇଞ୍ଜି ମାନେସି ନାନୁ ମୀ କାମା ପୁଞ୍ଜାମାଈଁ, ସିନିକିଦୁ ନାନୁ ମୀ ନକିତା ର ଦାଚା ଦେତାମାଈଁ, ଏଦାଆଁ ଆମ୍ବାଆସି ସୁଶାଲି ଆଡ଼ଅସି, ଇଚିହିଁ ମୀ ବାଡ଼ୁୟୁ ଡ଼ଣା ମାଟି ଜିକେଏ ନା ଜାପ୍‌ନାଣି ମୀରୁ ମାନୁଝି ଆହାମାଞ୍ଜେରି, ଇଞ୍ଜା ନା ଦରୁ ଏଚେଲା ପୁଞ୍ଜାହିଲଅମି ଇଞ୍ଜିଁ ଇଞ୍ଜାହିଲଅଡ଼େରି □

☆ ୩:୩ ୩:୩ ମାତି ୨୪:୪୩,୪୪; ଲୁକ ୧୨:୩୯,୪୦; ଝେ ବଲ୍ଲୁ ୧୭:୧୫ ☆ ୩:୫ ୩:୫ ଝେ ବଲ୍ଲୁ ୨୦:୧୨; ମାତି ୧୦:୩୨; ଲୁକ ୧୨:୮

୯ ମେହଦୁ ଆମ୍ବାଆରି ଜୀହୁଦି ଲକୁ ଆଏ, ସାମା ମିତି ତଲେ ଜୀହୁଦି ଲକୁତମି ଇଞ୍ଜିଁ ଇଞ୍ଜିମାନେରି ଇଲେତି ସୟତାନ ଗତିତି ଲକୁଣି ନାନୁ ମୀ କଡାଣା ଜହରା କିଝି କିୟାଈଁ, ଇଞ୍ଜାଁ ନାନୁ ମିଙ୍ଗେ ଜୀହୁନହଁ ମାଞ୍ଜାଇଁ ଇଞ୍ଜିଁ ଏଞ୍ଜାରି ପୁଞ୍ଜାଲି ଆଡିନେରି □

୧୦ ନା ହୁକୁମି ତଲେ ସାସା ଆସାନା ମାଞ୍ଜେରି, ଇଦାଆଁତାକି ଦାରତିତି ଲକୁଣି ତାୟିପାରି କିହାଲି ବାରେ ଦାରତିତା ଆମିନି ତାୟିପାରି କିନି ଦିନା ଖାରେ, ଏମ୍ବାଟି ନାନୁ ଜିକେଏ ମିଙ୍ଗେ ଗେଲପାଇଁ □

୧୧ ନାନୁ ତବେ ଖାହିମାଇଁ ମୀ ଜୀଣାଆଡି ଟପେରି ଏନିକିଁ ଆମ୍ବାଆସି ମୀଞ୍ଜା ଅୟଅସି ଏଦାଆଁତାକି ମୀ ତାଣା ଏନାୟି ମାନେ ଏଦାଆଁ ତାଟା ତଲେ ଆସାଁ ଡୟାଦୁ □

୧୨ \*ଆମ୍ବାଆସି ଜୀଣା ଆନେସି ନାନୁ ଏଞ୍ଜାଣାଇଁ ନା ମାହାପୁରୁ ଇଲୁତି ମୁଣ୍ଡାଲେହେଁ କିଈଁ, ଏଞ୍ଜାସି ଏମ୍ବାଟି ପାଙ୍ଗାତା ହାଲଅସି, ନାନୁ ନା ମାହାପୁରୁତି ଦରୁ ଅଡେ ଲାକପୁରୁଟି ଖାହାମାନି ପୁଞ୍ଜନି ଜିରୁସାଲମ ମା ମାହାପୁରୁତି ଗାଡାଡି ଦରୁ ଇଞ୍ଜାଁ ନା ପୁଞ୍ଜନି ଦରୁ ତାନି ଲାକ ରାଡିଈଁ □”

୧୩ “କୁଲମିକାଣି ସୁଦୁଜୀଞ୍ଜୁ ଏନାଆଁ ଝେସିମାନେ, ଆମ୍ବାଆରି କୀର୍କା ମାନୁ ଏଦାଆଁ ଝେଣାମ୍ବାସି □”

### ଲାଞ୍ଜୁଦିକିୟା କୁଲମିକି କାରୁ

୧୪ “ଲାଞ୍ଜୁଦିକିୟା କୁଲମିତି ଦୁରୁ ତାଣା ରାଡାମୁ, ଆମ୍ବାଆସି ସାତା ଇଞ୍ଜାଁ ନାମୁଗାଟାସି ଅଡେ ସାତା ସାକି ହାନେସି, ଅଡେ ଆମ୍ବାଆସି ମାହାପୁରୁ ଗାଡିକିତାଣି ମୁଲୁଏ ଗାଡିକିତାସି ଏଞ୍ଜାସି ଏଲେଇଞ୍ଜି ମାନେସି □

୧୫ ନାନୁ ମୀ କାମା ପୁଞ୍ଜାମାଇଁ, ମୀରୁ ହିଡଡି ଆଏ କି ଉସମି ଜିକେଏ ଆଏ, ମୀରୁ ହିଡଡି କି ଉସମି ଆହାମାଟି ନେହଁ ଆଡେମା □

୧୬ ସାମା ମୀରୁ ହିଡଡି କି ଉସମି ଆଆନା କାଞ୍ଜନି ଆହାମାନାକି ନାନୁ ମିଙ୍ଗେ ନା ଗୁଡିଟି ହୁପାଲି ହାଜିମାଇଁ □

୧୭ ନାନୁ ଏଲେ ଇଞ୍ଜିମାଞ୍ଜି, ‘ନାନୁ ବାଡ଼କୁ ଗାଟାତେଏଁ ନାଙ୍ଗେ ହାରେକା ଦନ ମାନେ; ନାଙ୍ଗେ ଏନାୟି ଲଡ଼ା ହିଲେଏ □’ ସାମା ନାନୁ କାର୍ମା କାକୁଲି ଗାଟାତି ଅଡ଼େ ସାୟେମି ହିଲାଆଗାଟାତି, ହାକି ଗାଟାତି, କାଣା ଅଡ଼େ ନାଗ୍‌ଡ଼ା ଗାଟାତି, ଇଦାଆଁ ପୁଞ୍ଜାହିଲଅତି;

୧୮ ଇଦାଆଁତାକି ନାନୁ ନିଙ୍ଗେ ଇ କାତା ଝେସିମାଞ୍ଜାଇଁ ନାନୁ ବାଡ଼କୁ ଗାଟାତି ଆହାଲିତାକି ହିରୁତା ହୁଡ଼ିତି ବାଂଗାରା ଅଡ଼େ ନୀ ନାଗ୍‌ଡ଼ାତି ଲାଜା ଏନିକିହିଁ ତଞ୍ଜା ଆଏ ଇଦାଆଁତାକି ହୁଚାଲି ଦବଲା ହିମ୍ବୁରି ଇଞ୍ଜା କାଣ୍‌କା ମେସାଲି ତାକି କାଣ୍‌କାଣାଁ ରୁବାକଡ଼ିନାଣି ନା ତାଣାଟି କତାମୁ □

୧୯ ✧ନାନୁ ଏଚେକା ଲକୁଣି ଜୀଝୁ ନଇଁ ଏଞ୍ଜାରାଇଁ ଦାକା ଅଡ଼େ ତଣ୍ଡ ହାଇଁ ଏଦାଣିତାକି ରାହାଁ ଆହାଁ ମନ ଝେଟ୍‌ହା କତାମୁ □

୨୦ ମେହ୍‌ମୁ ନାନୁ ଦୁଝେରି ତାକିତା ନିଚାନା ଦାରା ଝେଟିମାଇଁ ଆମ୍ବାଆସି ନା ଗିୟାଁ ଝେଞ୍ଜାନା ଦାରା ଦେନେସି ଆଡ଼ିଁ ନାନୁ ବିତ୍ରା ହଡ଼ାନା ତାନି ତାଣା ହାଇଁ ଅଡ଼େ ନାନୁ ଏଞ୍ଜାଣିତଲେ ରାନ୍ଦା ତିଇଁ ଅଡ଼େ ଏଞ୍ଜାସି ନା ତଲେ ରାନ୍ଦା ତିନେସି □

୨୧ ନାନୁ ଏନିକିହିଁ ଜୀଣାଆହାନା ନା ଆବା ତଲେ ସିଂଗାସାଣିତା କୁଗାମାଇଁ ଏଲେକିହିଁଏ ଆମ୍ବାଆସି ଜୀଣା ଆନେସି ନାନୁ ଏଞ୍ଜାଣାଇଁ ନା ତଲେ ନା ସିଂଗାସାଣିତା କୁଗାଲି ହାଇଁ □”

୨୨ “ସୁଦୁଜୀଝୁ କୁଲମିକାଣି ଏନାଆଁ ଝେସିମାନେ, ଆମ୍ବାଆରି କୀର୍କା ମାନୁ ଏଦାଆଁ ଝେଣ୍‌ମାସି □”

## ୪

### ଲାକପୁରୁ ପ୍ରାତାନା

୧ ଏଚେଟିଏ ନାନୁ ମେସ୍‌ସେଏଁ, ମେହ୍‌ମୁ ଲାକପୁରୁଟି ର ଦାରା ଦେପିଆହାମାନେ; ଅଡ଼େ ତୀତ୍ରି ମହ୍‌ରି ହାଡ଼ାଲେହେଁ ନା ତଲେ ନଚେଏ ଜଲିମାରାଣି ଝେଞ୍ଜା ମାଚେଏଁ, ଏଦି ଏଲେଇଞ୍ଜାତେ “ଇମ୍ବାଆଁ ନିଙ୍ଗା ଝାମ୍ବୁ, ଏନାୟି ଇଦାଆଁ ତାୟୁ ଗଟ୍‌ଝି ଆନେ ଏ ବାରେ ନିଙ୍ଗେ ନାନୁ ତସ୍ତାଇଁ □”

୨ ଏ ଦେବୁଣିଏ ସୁଦୁଜୀଝୁ ନାଙ୍ଗେ ଆଲ୍‌ଗାତେ, ମେହ୍‌ଦୁ ଲାକପୁରୁ ର ସିଂଗାସାଣି ମାଚେ, ଇଞ୍ଜା ସିଂଗାସାଣି ଲାକ ରଅସି କୁଗାମାନେସି □

୩ କୁଗାମାନାଣି ଝାଣା ହୀରା ଅଡେ ମାଣିକ୍ୟ ଇନି ଦାରାଗାଟି ଝାଲି ଲେହେଁ, ଅଡେ ସିଂଗାସାଣିତି ମରକତ ଇନି ଦାରା ଗାଟି ଝାଲ୍‌କା ଲେହେଁ ସାରିସୁଟୁ ର ଦାରଣକି ଗୁରଗାମାଚେ □

୪ ଅଡେ ସିଂଗାସାଣି ସାରିସୁଟୁ କଡେ ସାରିଗଟା ସିଂଗାସାଣି ମାନୁ, ଅଡେ ସିଂଗାସାଣିୟା ଲାକ କଡେ ସାରି ଜାଣା ପ୍ରାଟିନାଙ୍ଗା କୁଗାମାନେରି, ଏଝାରି ଦବ୍‌ଲା ହିମ୍ବରିକା ହୁଚାମାନେରି ଇଞ୍ଜା ଏଝାରି ତାୟୁଁ ତୁ ବାଂଗାରା ଟପେରି □

୫ \*ସିଂଗାସାଣିଟି ବିଲିବାଲା ମ୍ବୁହ୍‌ନାୟି ଅଡେ ହାଗୁ ଗୁଣ୍‌ନି ହାଡା ହଡେ, ଅଡେ ସିଂଗାସାଣି ନକିତା ହିରୁଗାଟି ସାଡାଗଟା ଦୀଝୁୟା ଡଞ୍ଜିମାରୁ, ଇ ସାଡାଗଟା ହିରୁ ବନ୍ଦାୟା ମାହାପୁରୁତି ସୁଦୁଜୀଝୁୟା

୬ ସିଂଗାସାଣି ନକିତା ଦାପେଣିଲେହେଁ ର ନେହ୍ଁ ସାମଦୁରି ତଞ୍ଜାଆହିମାଚେ, ସିଂଗାସାଣି ସାରିସୁଟୁତି ମାଦିଏ ସାରିଗଟା ଜନ୍ତ ଜୀଝେଡିକା, ଏଝାସିକା ନକିତା ଅଡେ ତାୟୁତା କାଣ୍‌କା ମାରୁ □

୭ ନକିତି ଜନ୍ତ ସିହ୍ଁ କାଝଆନି ଲେହେଁ, ଅଡେ ରୀ ଲମ୍ବର ଜନ୍ତ ବାଚା କଡି ଲେହେଁ, ତାନି ଲମ୍ବର ଜନ୍ତତି ମ୍ବୁମ୍ବୁମାଣ୍‌ସିତି ମ୍ବୁମ୍ବୁ ଲେହେଁ, ଅଡେ ସାରି ଲମ୍ବର ଜନ୍ତ ଲାକ ଉମ୍ବିମାନି ଲେଡୁ ଲେହେଁ ତଞ୍ଜାଆହିମାଚେ □

୮ ବାରେ ଜନ୍ତୁୟାକି ସ ଗଟା ମାରାୟା ଏ ମାରାୟା ବିତ୍ରା ଅଡେ ପାଙ୍ଗାତା କାଣ୍‌କା ମାନୁ ଏଝି ଲାଆଁ ମାଦେନା ଜମାଆନା ଏଲେଇଞ୍ଜି ମାନୁ □

“ସୁଦୁ, ସୁଦୁ, ସୁଦୁ, ବାରେ ବାଡୁୟୁଗାଟି ମାହାପୁରୁ,  
ଆମ୍ବାଆସି ତଲିଏ ମାଚେସି ନୀର୍ବ ମାନେସି ଅଡେ କାଚ୍‌ଲେଏ ମାନେସି, ଏ ପ୍ରବୁ □”

୯ ଜନ୍ତୁୟା ଏଟିବେଲା ଏ ସିଂଗାସାଣିତା କୁଗାମାନି କାଲାକାଲାତି ଜୀଝୁଗାଟି ମାଣ୍‌ସିଇଁ ଗାଝୁରମି ସାମ୍ବୁମି ଅଡେ ଜହରା କିନେରି □

☆ ୪:୫ ୪:୫ ଝେ ବଲ୍ଲ ୮:୫; ୧୧:୧୯; ୧୭:୧୮; ଝେ ବଲ୍ଲ ୧:୪

୧୦ ଏଚିବେଲା କଡ଼େ ସାରି ଜାଣା ପ୍ରାଚିନାଙ୍ଗା ସିଂଗାସାଣିତା କୁଗାମାନି ମାଣ୍ଡସିଇଁ ମେଣ୍ଡାକୁତାନା କାଲେଏ ନୀତାମାନି ମାଣ୍ଡସିଇଁ ଜହରା କିତେରି, ଇଞ୍ଜା ସିଂଗାସାଣି ନକିତା ତାମି ଟଢ଼ପେରିକା ଇଟାନା ଏଲେଇଚେରି □

୧୧ ମା ପ୍ରବୁ ଅଡ଼େ ମାହାପୁରୁ □

ନୀନୁ ଗାଝୁରମି ସାମ୍ବୁନି ଅଡ଼େ ବାଡ଼ୁୟୁ ବେଟାଆହାଲି ଜଗେ ଗାଗାଡ଼ି □

ଏନାଆଁତାକି ଇଚିହୁଁ ନୀନୁ ବାରେ ଗାଡ଼ିକିହା ମାଞ୍ଜି □

ଅଡ଼େ ନୀ ଅଣ୍ଡପୁ ତଲେ ବାରେ ଗାଡ଼ି ଆହାମାନୁ, ଅଡ଼େ ଜୀଝୁତଲେ ନୀତାମାନୁ □



ରୁପିନି ପତି ଅଡ଼େ ମେଣ୍ଡା ତାଲୁ

୧ ନାନୁ ସିଂଗାସାଣିତା କୁଗାମାନାଣି ଚିଃନି କେୟୁତା ର ପ୍ଲାଃଇ ପତି ମେସ୍ତେସ୍, ଏଡ଼ି ରିକଝାକି ରାସ୍‌କି ଆହାମାଚେ ଇଞ୍ଜା ସାଡ଼ାଗଟା ମୁଦ୍ରା ଝେପି ଆହାମାଚେ □

୨ ଅଡ଼େ ନାନୁ ବାଡ଼ୁୟୁ ଗାଟି ର ଲାକପୁରୁତି ଦୂତୁଇଁ ମେସ୍ତେସ୍, ଏଝାସି କାଜା ଗିୟାତଲେ ଏଲେଇଚେସି, ଆମ୍ବାଆସି ଇ ମୁଦ୍ରା ହୁକହାନା ପତିତି ଦେଚାଲି ପାଡ଼ାଆନେସି □

୩ ସାମା ପତିତି ଦେଚାଲି, ଏମ୍ବାଆଁ ଏନାୟି ରାସ୍‌କି ଆହାମାନେ, ସିନିକିହାଲି ଲାକପୁରୁ, ଦାରତିତା ଅଡ଼େ ତାଡ଼େପୁରୁତା ଆମ୍ବାଆସି ସାସା କିଆତେସି □

୪ ଏ ପତିତି ଦେଚାଲି କି ଏଦାଆଁ ସିନିକିହାଲି ଆମ୍ବାଆସି ସାସା କିଆଲିଏ ନାନୁ ହାରେକା ଡ଼ୀତେସ୍ □

୫ ଏମ୍ବାଟିଏ ପ୍ରାଚିନାଙ୍ଗା ବିଦ୍ରାଟି ରଅସି ନାଙ୍ଗେ ସାସା ହାହାନା ଏଲେଇଞ୍ଜାତେସି, “ଡ଼ୀଆନି, ସିନିକିମୁ ଜୀହୁଦା ଗଚିତି ଦାଝୁଦ କୁଡ଼ାତି ସିଃହୁଁ ଜୀଣା ଆହାମାନେସି; ଏଝାସି ଇ ପତିତି ସାଡ଼ାଗଟା ମୁଦ୍ରା ଦେଚାଲି ଅଡ଼େ ଏ ରୁପିତି ପତି ଏକ୍‌ହାଲି ପାଡ଼ା ଆହାମାନେସି □”

୬ ଏଚେଟିଏ ନାନୁ ସିନିକିତେସ୍ ସିଂଗାସାଣି, ଅଡ଼େ ପ୍ରାଚିନାଙ୍ଗା ମାଦିଏ ସାରିଗଟା ଜନ୍ତୁ ତଲେ ର ମେଣ୍ଡା ତାଲୁ ନିତାମାନାଣି

ମେସ୍ତେଏଁ, ଏ ମେଣ୍ଡା ତାଲୁ ପାୟୁଝି ଆଡ଼ି ଲେହେଁ ତଞ୍ଜାଆହିମାଚେ,  
ଏତାନାକି ସାଡ଼ାଗଟା କମ୍‌କା ଅଡ଼େ ସାଡ଼ାଗଟା କାଣ୍‌କା ମାଚୁ,  
ଏ କାଣ୍‌କା ଦାରତିତି ବାରେଝାକି ପାଣ୍ଡୁଝି ଆହାମାଚି ମାହାପୁରୁତି  
ସାଡ଼ାଗଟା ସୁଦୁଜାଝୁୟାଁ □

<sup>୭</sup> ମେଣ୍ଡା ତାଲୁ ସିଂଗାସାଣିତା କୁଗାମାନାଣି ତାଗେ ହାଜାନା ଏଝାଣି  
ଚିଝନି କେୟୁଟି ଏ ରୁପିତି ପତି ଅଡ଼େସି □

୮ ଏ ପତି ଅହାଲିଏ ସାରିଗଟା ଜନ୍ତୁ ଅଡ଼େ କଡ଼େ ସାରି ଜାଣା  
ପ୍ରାଚିନାଙ୍ଗା ଏ ମେଣ୍ଡା ତାଲୁ ନକିତା ମୁନୁ କୁତାହାଁ ଜହରା କିଡେରି, ଏ  
ବାରେଜାଣା ତାକି ର ର ସେରଙ୍ଗି ଅଡ଼େ ମାହାପୁରୁ ଲକୁ ପ୍ରାଡ଼ାନାତି  
ଦୁପା ଦୁପାଣି ନେଞ୍ଜାମାନି ର ବାଂଗାରା ଗିନା ମାଚେ □

<sup>୯</sup> ଏଝାରି ର ପୁଝନି ପାଚୁ ପାଡ଼ିମାଚେରି;  
“ନାନୁ ଏ ରୁପିତି ପତି ଅହାଲି ଅଡ଼େ ଏମ୍ପାତି ମୁଦ୍ଦା ଦେଚାଲି ପାଡ଼ା  
ଆନାତି,

ନାନୁ ପାୟୁଝିଆହାମାଚି, ନୀ ନେତେରିଟି ବାରେ ଗତି, ବାରେ  
ହାଡ଼ା, ଦେସା,  
ଅଡ଼େ ବାରେ କୁଡ଼ାତି ଲକୁଇଁ ମାହାପୁରୁ ତାକି କଡ଼ାମାଞ୍ଜି,  
<sup>୧୦</sup> ନାନୁ ଏଝାରାଇଁ ରାଜାୟାଁ କୁଡ଼ା ଅଡ଼େ ମାହାପୁରୁ ସେବା କିୟାଲି  
ପୂଜେରାଙ୍ଗା କିହାମାଞ୍ଜି □

ଏଝାରି ଦାରତିତି ସାଲୁଝି କିନେରି □”  
<sup>୧୧</sup> ଏମ୍ପାଟିଏ ନାନୁ ସିନିକିଡେଏଁ, ସିଂଗାସାଣି, ଜନ୍ତୁୟାଁ ଅଡ଼େ  
ପ୍ରାଚିନାଙ୍ଗା ସାରିସୁଟୁ ହାରେକା ଦୂତୁୟାଁତି ହାଡ଼ା ଝେଚେଏଁ, ଏଝି ମାଣା  
ମାଣା ଅଡ଼େ ଲାକେ ଲାକେ ଜାଣା ନିଚାମାଚୁ □

<sup>୧୨</sup> ଏଝି କାଜା ଗିୟାତଲେ ପାଡ଼ିମାଚୁ;  
“ପାୟୁଝି ଆହାମାନି ମେଣ୍ଡା ତାଲୁଦେଁ, କାଜାପାଣା, ଦନ, ବୁଦି, ବପୁ,  
ସାମ୍ବୁମି, ଗାଝୁରମି,  
ଜହରା ବେଟାଆହାଲି ପାଡ଼ାଆନେସି □”

<sup>୧୩</sup> ଅଡ଼େ ନାନୁ ଲାକପୁରୁ, ଦାରତି, ତାଡ଼େପୁରୁ ଅଡ଼େ ସାମ୍ବୁରିତା  
ମାନି ବାରେ ଜୀଝୁ ଗାଟାଇ ଇଞ୍ଜାଁ ଦାରତିତା ମାନି ବାରେ ଜୀଝୁ  
ଗାଟାଇ ପାଚୁ ପାଡ଼ିମାନାଣି ଝେଚେଏଁ □ ଏଝି ପାଡ଼ିମାଚୁ;

☆ ୫:୧୦ ୫:୧୦ ଝେ ବଲ୍ଲ ୧:୭

“ସିଂଗାସାଣିତା କୁଗାମାନି ମାଣ୍ଠସିଙ୍କ୍ ଇଞ୍ଜା ତାନି ମେଣ୍ଡା ଡାଲୁଙ୍କ୍  
 ଜହରା କିଦୁ;  
 ତାନି ସାମ୍ବୁମି, ଗାଞ୍ଜୁରମି ଅଡ଼େ ବାଡ଼ୁୟୁ କାଳାକାଳାତାୟି □”  
 ୧୪ ଏତେଟିଏ ସାରିଗଟା ଜନ୍ତ ପାଲି ଆସାନା ଏଲେଇଚୁ,  
 “ଆଢ଼େମନ୍” ଅଡ଼େ ପ୍ରାଚିନାଙ୍ଗା ମୁନୁ କୁତାହାଁ ଜହରା କିତେରି □



**ସାତା ଗଟା ସାଲିୟାଁ**

୧ ଅଡ଼େ ନାନୁ ମେଣ୍ଡା ଡାଲୁଙ୍କ୍ ସାତାଗଟା ମୁଦ୍ରା ବିଦ୍ରାଟି ର ଲମ୍ବର  
 ମୁଦ୍ରା ଦେତାଣି ମେସ୍‌ସେଏଁ, ଅଡ଼େ ସାରିଗଟା ଜନ୍ତ ବିଦ୍ରାଟି ର ଜନ୍ତ ହାଗୁ  
 ଗୁଣିନି ହାଡ଼ାତଲେ ହାଡ଼ିମାଚାଣି ଝେଚେଏଁ “ଝାମ୍ବୁ!”

୨ ଏମ୍ବାଟିଏ ନାନୁ ସିନିକିତେଏଁ ଅଡ଼େ ର ଦବ୍‌ଲା ଗଡ଼ା ଇଞ୍ଜା ତାନି  
 ଲାକ ହଟାମାଚାଣି କେୟୁତା ର ଆମ୍ବୁ ଆସାମାଚେସି, ଅଡ଼େ ଏଝାଣାକି  
 ର ଗପେରି ହାପକିଆଡ଼େ, ଅଡ଼େ ଏଝାସି ଜୀଣା ଆହାଁ ଜୀଣା ଆୟାଲି  
 ହଟାହାଚେସି □

୩ ମେଣ୍ଡା ଡାଲୁ ଏଚିବେଲା ରୀ ଲମ୍ବର ମୁଦ୍ରା ଦେତେସି, ଏଚିବେଲା  
 ଅଡ଼େ ରୀ ଲମ୍ବର ଜନ୍ତ ଏଲେଇଚାଣି ଝେଚେଏଁ “ଝାମ୍ବୁ,”

୪ ଏମ୍ବାଟିଏ ଅଡ଼େ ର ଗଡ଼ା ହଟା ଝାଡ଼େ, ଏଦି ନେତେରି  
 ଝାଣାଗାଚାୟି; ଲକୁ ଏନିକି ତାମ୍ବୁ ତାମ୍ବୁ ପାୟୁଝି ଆନେରି,  
 ଏଦାଆଁତାକି ଦାରତିଟି ହିଡ଼ଡ଼ି ହେକ କିହାଲି ତାନି ଲାକ  
 ହଟାମାଚାଣାକି ବାଡ଼ୁୟୁ ହାପକିଆଡ଼େ ଅଡ଼େ ଏଝାଣାକି କାଜା କାଣ୍ଡା  
 ହାପକିଆଡ଼େ □

୫ ମେଣ୍ଡା ଡାଲୁ ଏଚିବେଲା ତାନି ଲମ୍ବର ମୁଦ୍ରା ଦେତେସି,  
 ଏଚିବେଲା ତାନି ଲମ୍ବର ଜନ୍ତ ଏଲେଇଞ୍ଜିମାନାଣି ଝେଚେଏଁ, “ଝାହାଁ  
 ସିନିକିମ୍ବୁ” ଏମ୍ବାଟିଏ ନାନୁ ସିନିକିତେଏଁ, ମେହ୍‌ଦୁ ର କାଡ଼ିନି ଗଡ଼ା;  
 ଅଡ଼େ ଏମ୍ବାଆଁ ହଟାମାଚାଣି କେୟୁତା ର କେଜି ତୁକନାୟି ମାଚେ □

୬ ଅଡ଼େ ନାନୁ, ସାରିଗଟା ଜନ୍ତ ଗୁଡ଼ିଟି ହଡ଼ି ଲେହେତି ର ହାଡ଼ା  
 ଝେଚେଏଁ; “ର ଟାକା ତାକି ର କେଜି ଗହଁ ଅଡ଼େ ତାନି କେଜି କାଝିଆ  
 ଜନାୟା ମେଡ଼ା ଆନୁ ସାମା ମୀରୁ ଜୀତ ମାର୍‌ନୁତି ନିୟୁଁ ଅଡ଼େ ଅଙ୍ଗୁରି  
 ରାସା ନସ୍ତ କିଆଦୁ □”

୭ ମେଣ୍ଡା ତାଲୁ ଏଚିବେଲା ସାରି ଲମ୍ବର ମୁଦ୍ରା ଦେତେସି, ଇଞ୍ଜା ନାନୁ ସାରି ଲମ୍ବର ଜନ୍ତୁ ଏଲେ ଇଞ୍ଜିମାଚାଣି ଝେଚେଏ, “ଝାମ୍ବୁ!”

୮ ଏମ୍ବାଟିଏ ନାନୁ ସିନିକିତେଏ ଦାରମ୍ବୁ ଝାଣାଗାଟି ଗଡ଼ା, ତାନି ଲାକ ହଚାମାଚାଣି ଦରୁ ହାକି, ଏଝାଣି ଜେଚ ଜେଚ ଦାରତି ହାଜିମାଚେ, ଏଝାରାକି ଦାରତିତି ସାରି ବାଗା ବିତ୍ତା ର ବାଗା ମୁହେଁ କାଣ୍ଡା, ହାକି, ରଗ ଅଡେ ଜାଡ଼ାତି ଜନ୍ତୁ ଜୀଝେଡ଼ିକା ତଲେ ପାୟାଲି ବାଡ଼ୟୁ ହୀପକିଆଡେ □

୯ ମେଣ୍ଡା ତାଲୁ ଏଚିବେଲା ପାସା ଲମ୍ବର ମୁଦ୍ରା ଦେତେସି, ଏଚିବେଲା ଆମିନି ଲକୁ ମାହାପୁରୁତି ବଲ୍ଲୁ ତାକି ଅଡେ ଏଝାରାକି ହୀପକି ଆହାମାନି ସାକି ତାକି ହାହାମାଚେରି, ଏଝାରି ଜୀଝୁୟା ନାନୁ ପୂଜାପିଣ୍ଡା ଡ଼ଇ ମେସ୍ତେଏ □

୧୦ ଏଝାରି କାଜା ଗିୟାତଲେ ହାଟିହୁଏ ଏଲେ ଇଞ୍ଜିମାଚେରି, “ସୁଦୁ ଅଡେ ସାତା ପ୍ରୁ, ନାନୁ ଏଚରଦିନା ପାତେକା ଦାରତିତି ଲକୁଇଁ ନୀହାୟି କିଆନା ମାଜେ ପାୟାଲି ତାକି ଏଝାରାକି ଡ଼ଣ୍ଡୁ ହୀଆନା ପିହୁଦି ?”

୧୧ ଏଚେଟିଏ ଏ ବାରେଜାଣା ତାକି ଦବ୍ଲା ହିମ୍ବୁରିକା ହୀପକିଆଡେ, ଇଞ୍ଜା ଏଝାରି ତଲେତି ତାୟିୟା ସେବା କିନାରି ଏଚରଜାଣା ପାୟୁଝି ଆନି କାତା ପାୟୁଝି ଆଆପାତେକା ଏଝାରାକି ଅଡେ ଏଚରଦିନା ଜମାଲି ଝେସ୍ପିଆଡେ □

୧୨ \*ମେଣ୍ଡା ତାଲୁ ସ ଲମ୍ବର ମୁଦ୍ରା ଦେତିମାଚାଟି ନାନୁ ମେସ୍ତେଏ; ଦେବୁଣିଏ ଆଜିହପେତି ବୁମି ଝୀଡିତେ □ ଝେଡ଼ା କାଡ଼ିନି ଝାଣା ହିମ୍ବୁରି ଲେହେଁ ଆଡେ, ଅଡେ ଲେଞ୍ଜୁ ନେତେରି ଝାଣା ଆଡେ □

୧୩ କାଜା ଗାଲି ଏନିକିଏ ମାରୁନୁଇଁ ଝାଟିହସାରେ ହିଇଲି ତୟା ପାଡେଡ଼ିକା ତରଗିନି ଲେହେଁ ହାଗୁଲାକତି ହୁକାୟା ଦାରତିତା ତରଗା ହାରୁ □

୧୪ ହାଗୁପାକା ତଲୁ ପତି ରୁପ୍ପି ଆଡି ଲେହେଁ ରୁପ୍ପିଆହାଁ ମେଣ୍ଡାହାଚେ □ ଅଡେ ହରକା ଇଞ୍ଜା ସାମ୍ବୁରି ବିତ୍ତାମାନି ଇଚି ଇଚି ଦେସାୟା ତାନି ଟାୟୁଟି ଗୁଗା ଆହାହାରୁ □

☆ ୭:୧୨ ୭:୧୨ ଝେ ବଲ୍ଲ ୧୧:୧୩; ୧୭:୧୮; ମାତି ୨୪:୨୯; ମାର୍କ ୧୩:୨୪,୨୫; ଲୁକ ୨୧:୨୫



୧୫ ଅଡ଼େ ଦାରତିତି ରାଜାୟା, ସାଲୁଝି କିନାରି, ଜୁଜୁକିନି କାଜାରି, ଦନ ଗାଟାରି, ବାଡ଼ୟୁ ଗାଟାରି, ହଲିୟାଙ୍ଗା ଅଡ଼େ ହଲିୟାଙ୍ଗା ଆଆତାରି ଏଞ୍ଜାରି ବାରେଜାଣା ପାଞ୍ଜୁତା ଇଞ୍ଜା ହରକାତି କାଜା ଖାଲୁକା ପାରଡ଼ା ଡ଼ଇ ହାଜାନା ଡ଼ରୁତେରି □

୧୬ ✨ଅଡ଼େ ଏଞ୍ଜାରି ହରକା ଇଞ୍ଜା ଖାଲୁକାଣି ହାଡ଼ିହିଁ ଏଲେଇଚେରି, “ମା ମୁହେଁ ତରଗାନା ସିଂଗାସାଣିତା କୁଗାମାନାଣି ତାଣାଟି ଅଡ଼େ ମେଣ୍ଡା ତାଲୁ କପାଟି ମାଙ୍ଗେ ଡ଼କୁହାମୁ □

୧୭ ଇତିହିଁ ଏଞ୍ଜାରାକି ଆଜିହପେତି କପାଟି ଦିନା ଏଦାତେୟିଏ, ଇଞ୍ଜା ଏମ୍ପାଆଁ ଆମ୍ପାଆସି ନିଚାଲି ଆଡ଼ିନେସି ?”



**ଇସ୍ତାୟେଲତି ୧୪୪,୦୦୦ ଲକ୍ଷ**

୧ ଏଚେଟିଏ ନାନୁ ଦାରତିତି ସାରି କନତା ସାରିଗଟା ଦୂତୁୟାଁଇଁ ନିଚାମାନାଣି ମେସ୍ତେସ୍, ଅଡ଼େ ଦାରତିତି ସାରିଖାକିତି ଗାଲି ଆଙ୍ଗାମାନେରି, ଏଚେଟିଏ ଦାରତି ସାମ୍ଦୁରି ଅଡ଼େ ଆମିନି ମାରୁନୁ ମୁହେଁ ଗାଲି ଖାଆପେଞ୍ଜା ଇଞ୍ଜା ଗାଲିତି ଆଙ୍ଗାମାନେରି □

୨ ଅଡ଼େ ନାନୁ ର ଦୂତୁଇଁ ଝେଡ଼ା ହପୁଞ୍ଜାକିଟି ହଚାଞ୍ଜାତାଣି ମେସ୍ତେସ୍, ଏଦାନି କେମୁତା ଜାଞ୍ଜୁତି ମାହାପୁରୁତି ବୁଟୁ ମୁଦ୍ରା ମାଚେ, ଏ ଦୂତୁ ଦାରତି ଅଡ଼େ ସାମ୍ଦୁରି ନସ୍ତ କିହାଲିତାକି ସାରିଗଟା ଦୂତୁକି ଅଦିକାରା ହାହାମାଚେ, ଏଦି କାଜା ଗିୟାଁତଲେ ହାଟାନା ଏଲେଇଚେ,

୩ “ମାମ୍ପ ମୁହାପୁରୁତି ସେବା କିନାରି ମୁଞ୍ଜୁତା ବୁଟୁ ମୁଦ୍ରା ନାବଗାଆ ପାତେକା ମାରୁ ଦାରତି, ସାମ୍ଦୁରି, କି ମାରକାଣି ନସ୍ତ କିଆଦୁ □”

୪ ଏଚେଟିଏ ମୁଞ୍ଜୁତା ବୁଟୁ ମୁଦ୍ରା ନାବଗା କଡ଼ିତାରି ୧୪୪,୦୦୦ ଲକ୍ଷ ମାଚେରି ଇଞ୍ଜା ନାନୁ ଝେଚେସ୍ ଏଞ୍ଜାରି ଇସ୍ତାୟେଲତି ବାର କୁଡ଼ାତି ଲକ୍ଷ ମାଚେରି □

୫ ଜାହୁଦା କୁଡ଼ାଟି ବାର ମାଣା ଲକ୍ଷୁଇଁ ବୁଟୁ ମୁଦ୍ରା କିହାମାନେସି, ରୁବେନ୍ କୁଡ଼ାଟି ବାର ମାଣା, ଗାଦ କୁଡ଼ାଟି ବାର ମାଣା,

୬ ଆସେର କୃତାଟି ବାର ମାଣା, ନପ୍ତାଲି କୃତାଟି ବାର ମାଣା,  
ମନସି କୃତାଟି ବାର ମାଣା,

୭ ସିମିୟନ କୃତାଟି ବାର ମାଣା, ଲେବି କୃତାଟି ବାର ମାଣା,  
ଇସାକାର କୃତାଟି ବାର ମାଣା,

୮ ସୁବୁଲୁନ୍ କୃତାଟି ବାର ମାଣା, ଜସେପ କୃତାଟି ବାର ମାଣା,  
ବିନ୍ୟାମିନ୍ କୃତାଟି ବାର ମାଣା ଲକ୍ଷ୍ମ ବୁଟୁ ମୁଦ୍ରା କିହାମାନେସି □

### ଗାତି ମାନ୍ଦା ଲକ୍ଷ୍ମ

୯ ଏତେଟିଏ ନାନୁ ସିନିକିତେଏଁ ମେହ୍‌ଦୁ ବାରେ ଜାଡ଼ି, ବାରେ  
କୃତା, ବାରେ ଦେସା, ବାରେ ହାଡ଼ା, ଏଜିକିହାଲି ଆଡ଼ାଆଗାଟି  
ର. ମାନ୍ଦା ଲକ୍ଷ୍ମ ଅଜିତି ଦବଲା ହିମ୍ବରିକା ହୁଚାନା କାଜୁରି  
ମାଟାୟାଁ କେୟୁତା ଆସାନା ସିଂଗାସାଣି ଅଡ଼େ ମେଣ୍ଡା ଡାଲୁ ନକିତା  
ନିଚାମାନେରି □

୧୦ ଏଞ୍ଜାରି କାଜା ଗିୟାଁତଲେ ଏଲେଇଚେରି, “ଞ୍ଜାରୁଇ  
ସିଂଗାସାଣିତା କୁଗାମାନି ମାହାପୁରୁ ଅଡ଼େ ମେଣ୍ଡା ଡାଲୁ ମାଙ୍ଗେ  
ଗେଲ୍‌ପାନାସି □”

୧୧ ସିଂଗାସାଣି, ପ୍ରାଚିନାଙ୍ଗା ଅଡ଼େ ବାରେ ସାରିଗଟା ଜନ୍ତ ସାରିସୁରୁ  
ଲାକପୁରୁତି ଦୁଡୁୟାଁ ନିଚାମାନେରି, ଅଡ଼େ ସିଂଗାସାଣି ନକିତା ମୁନ୍ନୁ  
କୁତାନା ମାହାପୁରୁଇଁ ଜହରା କିହାନା,

୧୨ ଏଲେଇଚେରି, “ଆମେନ୍ ନେହାୟି, ଗାଞ୍ଜୁରମି, ବୁଦି,  
ଜହରା, ସାମ୍ବୁମି, ଅଦିକାରା ଅଡ଼େ ବାଡ଼ୁୟୁ, କାଲାକାଲା ତାକି ମା.  
ମାହାପୁରୁଞ୍ଜାୟି! ଆମେନ୍ □”

୧୩ ଅଡ଼େ ପ୍ରାଚିନାଙ୍ଗା ବିଭ୍ରାଟି ରଅସି ନାଙ୍ଗେ ଝେଞ୍ଜାତେସି,  
“ଦବଲା ହିମ୍ବରିକା ହୁଚାମାନି ଇ ଲକ୍ଷ୍ମ ଆମ୍ବାଆରି ? ଅଡ଼େ ଏଞ୍ଜାରି  
ଏମ୍ବିଟି ଞ୍ଜାହାମାନେରି ?”

୧୪ ☆ନାନୁ ଏଞ୍ଜାଣାୟି ଏଲେଇଚେଏଁ, “ଏ. ନା. ପ୍ରବୁ ନାନୁଏ  
ଏଦାଆଁ ପୂଞ୍ଜାମାଞ୍ଜି” ଏମ୍ବାଟିଏ ଏଞ୍ଜାସି ଏଲେଇଞ୍ଜାତେସି, “ଇଞ୍ଜାରି  
ଆଜିହ୍‌ପେତି ସାସି ଅରହାନା ହଟା ଞ୍ଜାହାମାନେରି, ଇଞ୍ଜା ମେଣ୍ଡା

ତାଲୁତି ନେତେରି ତଲେ ଏଞ୍ଜାରି ତାମି ହିମ୍ବୁରିକା ରାତାନା ଦବ୍‌ଲା କିହାମାନେରି □

୧୫ ଏଦାଆଁତାକି ଏଞ୍ଜାରି ମାହାପୁରୁ ଇଲୁତି ସିଂଗାସାଣି ନକିତା ନିଚାନା ଲାଆଁ ମାଦେନା ଏଞ୍ଜାଣି ଜହରା କିନେରି, ଇଞ୍ଜାଁ ସିଂଗାସାଣିତା କୁଗାମାନାସି ଏଞ୍ଜାରାକି ବାସାଟାୟୁ ହୀନେସି □

୧୬ ଏଞ୍ଜାରାକି ଏତେଲାଞ୍ଜା ହାକି କି ଏସ୍‌କି ଆଏ; ଇଞ୍ଜାଁ କାରା କି ଏନି ଝେହ୍‌ନାୟି ତୀଗାଲି ଆଡେଏ □

୧୭ ଇଚିହ୍‌ ସିଂଗାସାଣି ମାଦିତି ମେଣ୍ଡା ତାଲୁ ଏଞ୍ଜାରି ମେଣ୍ଡା ଗଡ଼ ଆନେସି □ ଅଡେ ଜୀଝୁହୀନି ଏୟୁ ହଚିମାନି ତାଣା ଏଞ୍ଜାରାଇଁ ତାକିକିହା ଅନେସି, ଅଡେ ମାହାପୁରୁ ଏଞ୍ଜାରି କାନୁତି ବାରେ କାଣ୍ଡୁ ଢେଜାତୁହ୍‌ନେସି □”

## ୮

### ସାଡ଼ା ଲମ୍ବର ସୀଲି

୧ ମେଣ୍ଡା ତାଲୁ ଏଚିବେଲା ସାଡ଼ା ଲମ୍ବର ମୁଦ୍ରା ଦେତି ଦେବୁଣିଏ ଲାକପୁରୁ ଆଦା ଗଂଟା ପାତେକା ସାପିଆଡେ □

୨ ଏମ୍ବାଟିଏ ନାନୁ ମାହାପୁରୁ ନକିତା ନିଚାମାନି ସାଡ଼ା ଜାଣା ଦୁଡୁୟାଲି ମେସ୍‌ସେଏ, ଏଞ୍ଜାରାକି ସାଡ଼ାଗଟା ତୀତ୍ରି ମହ୍‌ରି ହୀପ୍‌କି ଆଡୁ □

୩ ଏମ୍ବାଟିଏ ଅଡେ ର ଦୁଡୁ ଖାହାଁ ପିଣ୍ଡା ନକିତା ନିତେସି, ଏଞ୍ଜାଣି କେୟୁତା ବାଂଗାରା ଦୁପ୍‌ଣି ସାଡ଼ଞ୍ଜା ମାଚେ, ଅଡେ ସିଂଗାସାଣି ନକିତି ବାଂଗାରା ପୂଜାପିଣ୍ଡା ଲାକ ବାରେ ମାହାପୁରୁ ଲକ୍ଷୁତି ପ୍ରାତାନା ତଲେ ହେର୍‌ପାଲି ତାକି ହାଚ୍‌ରକା ଦୁପ୍‌ଣି ହୀପ୍‌କିଆଡେ □

୪ ଏମ୍ବାଟିଏ ଲାକପୁରୁ ଦୁଡୁ କେୟୁତି ଦୁପ୍‌ଣି ବୟ୍‌ ମାହାପୁରୁ ଲକ୍ଷୁତି ପ୍ରାତାନା ତଲେ ଆଣ୍ଡାନା ମାହାପୁରୁ ନକିତା ଏଗାତେ □

୫ ତାୟୁ ଏ ଦୁଡୁ ଦୁପ୍‌ଣି ସାଡ଼ଞ୍ଜାତା ପୂଜା ପିଣ୍ଡାତି ହିଚୁତଲେ ନେଞ୍ଜିକିହାନା ଦାରତି ଲାକ ଡଞ୍ଜିତେସି, ଏମ୍ବାଟି ହାଗୁ ଗୁଣ୍ଡେ ବିଜା ରିନିହାଡ଼ା ଝେଜିତେ ଇଞ୍ଜାଁ ବୁମି ଖୀଡିତେ □

### ତୀତ୍ରି ଉକିନାୟି

୬ ଏଚିବେଲା ସାଡ଼ା ଜାଣା ତୀତ୍ରି ଆସାମାନି ଦୂତୁୟାଁ ସାଡ଼ା ଜାଣା ତୀତ୍ରି ଉକାଲି ତିୟାରା ଆଡେତରି □

୭ ର ଲମ୍ବର ଦୂତୁ ତାନି ତୀତ୍ରି ଉକିତେସି ଏଚେଟିଏ ନେତେରି ତଲେ ଆଜିୟାଁ ଅଡେ ହିରୁ ଆଣ୍ଡି ଆହାଁ ଦାରତି ଲାକ ରିତୁ, ଇଞ୍ଜା ବାରେ ମାରନ୍ନୁ ମାଡ଼ା, ହିଇଲି ଜାଡ଼ା ତଲେ ଦାରତିତି ତାନି ବାଗାଟି ର ବାଗା ବାରେ ଝେହା ହାଚେ □

୮ ଏଚେଟିଏ ରୀ ଲମ୍ବର ଦୂତୁ ତାନି ତୀତ୍ରି ଉକିନି ଦେବୁଣିଏ ଡ଼ାଞ୍ଜିମାନି ର କାଜା ହରୁ ଲେହେତାୟି ସାମ୍‌ଦୁରି ଲାକ ରୀତେ ଇଞ୍ଜା ସାମ୍‌ଦୁରିତି ଏୟୁ ତାନି ବାଗାଟି ର ବାଗା ନେତେରି ଆହାହାରୁ □

୯ ସାମ୍‌ଦୁରିତା ମାନି ତାନି ବାଗାଟି ର ବାଗା ଜୀଝୁ ଗାଟାଇ ହାହାହାରୁ, ଅଡେ ସାମ୍‌ଦୁରିତା ମାନି ଜାଜାୟାଁ ତାନି ବାଗାଟି ର ବାଗା ଜାଜାୟାଁ ବିଡ଼ହାହାରୁ □

୧୦ ତାନି ଲମ୍ବର ଦୂତୁ ତୀତ୍ରି ଉକିତେସି, ଇଞ୍ଜା ଦେବୁଣିଏ ହିରୁ ବନ୍ଦାଲେହେଁ ଡ଼ାଞ୍ଜିମାନି ର କାଜା ହୁକା ହାଗୁଟି ତାନି ବାଗା କାଡ଼ା ଅଡେ ଉସାଣାଁ ରୀତେ □

୧୧ ଏ ହୁକାତି ଦରୁ “କାମ୍ବେଲି” ଏଚେଟିଏ ତାନି ବାଗାଟିଏ ର ବାଗା ଏୟୁ କାମ୍ବେଲି ଆଡୁ, ଇଞ୍ଜା ହାଚେକା ଲକୁ ଏୟୁ ଗସାନା ହାଡେତରି, ଇଚିହିଁ ଏଝି କାମ୍ବେଲି କିଝି ଆହାମାରୁ □

୧୨ ସାରି ଲମ୍ବର ଦୂତୁ ତୀତ୍ରି ଉକିତେସି ଇଞ୍ଜା ଝେଡ଼ା, ଲେଞ୍ଜୁ, ହୁକାୟାଁତି ବାରେ ତାନି ବାଗାଟି ର ବାଗା ନସ୍ତୁ ଆଡୁ, ଇଞ୍ଜା ତାନି ବାଗାଟି ର ବାଗା ଉଜେଡ଼ି ଉଣା ଆଡେ, ଇଞ୍ଜା ଲାଆଁୟାଁ ମାଦେନା ତାନି ବାଗାଟି ର ବାଗା ଉଜେଡ଼ି ଉଣା ଆଡେ □

୧୩ ତାୟୁ ନାନୁ ମେସ୍‌ସେସ୍, ହାଗୁତି ମାଦି ଉମ୍ବିମାନି ର ଲେଡ଼ କ୍ଲାନା ହାଡ଼ାତଲେ ଏଲେଇଞ୍ଜିମାଗାଣି ଝେଚେସ୍, “ଆହା! ଦାରତିତା ବାସା ଆହାମାନି ଲକୁ ଆଜିହପେତି ତଣ୍ଡୁ ବେଟାଆନାରି, ଇଚିହିଁ ଅଡେ ତାନି ଜାଣା ଦୂତୁୟାଁ ତୀତ୍ରି ଉକାଲି ହାଜିମାନେରି □”



୧ ଏଚେଟିଏ ପାସା ଲମ୍ବର ଦୂତୁ ତୀତ୍ରି ଉକିତେସି ନାନୁ ର ହୁକା ହାଗୁଟି ଦାରତିତା ରିତାଣି ମେସ୍‌ସେସ୍, ଏଝାଣାକି ତାଡେପୁରୁତି

କୁଚିକାଡ଼ି ହୀପକି ଆହାମାଚେ □

୨ ଏଞ୍ଜିସି ଏ ତାଡ଼େପୁରୁ ଗାଡ଼ୁୟୁ ଦେଚାଲିଏ ଏମ୍ବାଟି କାଜା ହଲୁତା ହନିଲେହେଁ ବୟ୍ ହଚାଞ୍ଜାଚେ, ଇଞ୍ଜା ଏ ହିଚୁ ଗାଡ଼ୁୟୁତି ବୟ୍ ତାକି ଝେଡ଼ା ଇଞ୍ଜା ହାଗୁ ଆନ୍ଦେରି ଆଡ଼େ □

୩ ଏ ବୟ୍ ଗପ୍‌ଏରିକା ହଚାନା ଦାରତିତା ଞ୍ଜାଡୁ, ଏଞ୍ଜାସିକାକି ଦାରତିତି କାଚାକୁପିତା ମାନି ବୀସାତି ବାଡ଼ୁୟୁ ହୀପକିଆଡ଼େ □

୪ ଏଞ୍ଜି ଦାରତିତି ମାରକା ଗଚା ଜାଡ଼ାତି ନସ୍ତ କିଆନା, ଆମ୍ବାଆରି ମୁଞ୍ଜୁତା ମାହାପୁରୁତି ବୁଚୁ ମୁଦ୍ରା ହିଲାଆଚେ ଏଞ୍ଜାରାଇଁ କସ୍ତ ହୀହାଲି ଏଲେଇଶ୍‌ମି ଆଡ଼େ □

୫ ଏଞ୍ଜାରାଇଁ ପାୟାଆନା ପାସା ଲେଞ୍ଜୁ ତାକି କସ୍ତ ହୀହାଲି ଗପ୍‌ଏରିକାକି ଅଦିକାରା ହୀପକିଆଡ଼େ, କାଚାକୁପି କାଚିତେ ଇତିସାରେ ଏନିକି ବୀସା ଆନ୍ଦେ ଏ କସ୍ତ ଏଲେତାୟି □

୬ ଏଚିବେଲା ଲକୁ ହାହାଲି ଅଶ୍‌ପିନେରି ସାମା ହାଅରି, ଏଞ୍ଜାରି ହାହାଲି ଅଶ୍‌ପିନେରି, ସାମା ହାକି ଏଞ୍ଜାରି ତାଶାଟି ହଚାଡୁହନ୍ଦେ □

୭ ଏ ଗପ୍‌ଏରିକା ଜୁଜୁତା ହାଜାଲି ତିୟାରା ଆହାମାନି ଗଡ଼ାୟାଁ ଲେହେଁ ତଞ୍ଜାଆହିମାଚୁ, ଏଞ୍ଜାସିକା ତାକାଣା ବାଂଗାରା ଚପେରି ଲେହେଁ ପିଡ଼ଟି ଆହାମାଚେ, ଏଞ୍ଜାସିକା ମୁମ୍‌ମାଶ୍‌ସି ମୁମ୍‌ଲେହେଁ ମାଚେ □

୮ ଇୟାସିକା ତାୟ୍ ବାଶାୟାଁ ଲେହେଁ ଏଞ୍ଜାସିକା ବାଶାୟାଁ, ସିହଁ କ୍ଲୁଞ୍ଜିତି ପାଲକା ଲେହେଁତି ତାମି ପାଲକା ମାଚୁ □

୯ ତାମି ବକତା ଲହ ପାଚା ଲେହେଁତି ପାଚା, ତାମି ମାରାୟାଁ ଞ୍ଜାତିମାନି ହାଡ଼ା ଜୁଜୁ ତାକି ଗଡ଼ାୟାଁ ରାତାୟାଁଶି ରେଜା ଅହିମାନି ଲେହେଁତି ହାଡ଼ା □

୧୦ କାଚାକୁପିତି ଲେଂଗୁଶି ଇଞ୍ଜା ବୀସା ସୂଜା ଲେହେଁ ଏଞ୍ଜାସିକାକି ଲେଂଗୁଶି ଅଡ଼େ ବୀସା ସୂଜା ମାଚେ, ପାସା ଲେଞ୍ଜୁ ତାକି ମାଶ୍‌ସିୟାଁଙ୍କ ସାସ୍ତି ହିୟାଲି ଏଞ୍ଜାସିକା ଲେଂଗୁଶିକାଣା ବାଡ଼ୁୟୁ ବେଚାଆହାମାଚୁ □

୧୧ ଏଞ୍ଜାସିକା ମୁହେଁ ର ରାଜା ସାଲ୍‌ଞ୍ଜି କିହିମାନେସି, ଏଞ୍ଜାସି ତାଡ଼େପୁରୁ ଗାଡ଼ୁୟୁତି ଦୂଚୁ, ଏଦାନି ଦରୁ ଏବ୍ରି ହାଡ଼ାତଲେ ଆବାଦନ୍ ଅଡ଼େ ଗ୍ରିକ୍ ହାଡ଼ାତଲେ ଅପ୍‌ଲିୟନ୍ ଇତିସାରେ “ନାସା କିନାଇ □”

୧୨ ତଲିତି ଆଜିହପେତି ତଣ୍ଡ ଉଣା ଆଡେ ଅଡେ ଜଡେକା  
ଆଜିହପେତି ତଣ୍ଡୟାଁ ଖାହିମାନୁ □

୧୩ ସ ଲମ୍ବର ଦୂତୁ ତୀତ୍ରି ଉକିତେସି, ଇଞ୍ଜା ନାନୁ ମାହାପୁରୁ ନକିତି  
ବାଂଗାରା ପୂଜା ପିଣ୍ଡାତି ସାରିଗଟା କମ୍‌କା ବିତ୍ରାଟି ର ହାଡ଼ା ଝେରେଏ  
□

୧୪ ଏଞ୍ଜାସି ତୀତ୍ରି ଆସାମାନି ସ ଲମ୍ବର ଦୂତୁଇଁ ଏଲେଇରେସି,  
“ପରାଡ଼ କାଜା କାତାତା ଦସ୍‌ପି ଆହାମାନି ସାରି ଜାଣା ଦୂତୁୟାଁଇଁ  
ପିସ୍‌ପି କିମ୍‌ □”

୧୫ ଏମ୍‌ଗାଟିଏ ମାଣ୍‌ସିୟାଁଇଁ ତାନି ବାଗାଟି ର ବାଗା ଲକୁଇଁ ପାୟାଲି  
ତାକି ତିୟାରା ଆହାମାନି ଆମିନି ସାରି ଜାଣା ଦୂତୁୟାଁଇଁ ଏ ଦିନା,  
ଲେଞ୍ଜୁ, ଅଡେ ବାର୍‌ସା କିଝି ଆହାମାଚେ ଏଞ୍ଜାରାଇଁ ପିସ୍‌ପି କିଝିଆଡେ  
□

୧୬ ଗଡ଼ାୟାଁ ଲାକ କୁଗାନା ଜୁଜୁ କିନାରି ରୀ କଟି ମାଚେରି ନାନୁ  
ଝେରେଏ □

୧୭ ଅଡେ ନାନୁ ଗଡ଼ା ଇଞ୍ଜା ଏମ୍‌ଆଁ ହଚାମାନାରାଇଁ ମେସ୍‌ସେଏ,  
ଏଞ୍ଜାରି ବକ ପାଟା ହିରୁ ଅଡେ ନୀଲି, ହୀଲେରି ଖାଣା; ଗଡ଼ାୟାଁତି  
ତାକା ସିହ୍‌କ୍‌କ୍‌ଠନି ତାକା ଲେହେଁ, ଇଞ୍ଜା ଏଞ୍ଜାସିକା ଗୁତିଟି ହିରୁ,  
ବୟ୍‌, ଅଡେ ଗାନ୍‌ଗୁଣ୍ଡା ହଚିମାଚେ □

୧୮ ଏଞ୍ଜାସିକା ଗୁତିଟି ହିରୁ, ବୟ୍‌, ଅଡେ ଗାନ୍‌ଗୁଣ୍ଡା ଲେହେଁ ଇ  
ତାନିଗଟା ତଣ୍ଡୟାଁ ହତୁ, ଇ ତଣ୍ଡୟାଁଟି ମାଣ୍‌ସିୟାଁ ତାନି ବାଗାଟି ର  
ବାଗା ପାୟ୍‌ଝି ଆଡେରି □

୧୯ ଏନାଆଁତାକି ଇଚିହ୍‌ ଗଡ଼ାୟାଁତି ବାଡ଼ୁରୁ ତାନି ଗୁତି ଅଡେ  
ଲେଂଗୁଣିତା ମାଚେ, ଇଚିହ୍‌ ଏଞ୍ଜାସିକା ଲେଂଗୁଣିକା ତାୟ୍‌ ଗୁାଟି  
ରାତୁ ଲେହେଁ ମାଚାକି ତାନି ଲେଂଗୁଣିକା ତଲେ ଲକୁଣି ନସ୍ତ  
କିହିମାରୁ □

୨୦ ଆମିନି ଲକୁ ଇ କସ୍ତତଲେ ପାୟ୍‌ଝି ଆହା ହିଲାଆଡେରି,  
ଏଞ୍ଜାରି ତାନି କେମ୍‌ତଲେ କିତି କାମାତାକି ମନ୍ ଝେର୍‌ପି କିଆଡେରି,  
ଇଚିହ୍‌ ବୁତୁୟାଁଣି ପୂଜା, ଅଡେ ମେସାଲି, ଝେଞ୍ଜାଲି, ତାକାଲି  
ଆଡ଼ାଆଗାଟି ବାଂଗାରା, ଝେଣ୍ଡି, ପିତାଡ଼ା, ଖାଲ୍‌କା ଅଡେ ମାର୍‌କା  
ତଲେ କେପିତି ପେଣ୍‌କା ବମାୟାଁଣି ପୂଜା କିହାଲି ପିହ୍‌ଆଡେରି □

୨୧ ଅଡ଼େ ଏଝାରି ଲକ୍ଷୁଣି ପାୟିନାୟି, ଗୁଣି ଗାର୍ଡ଼ି, ଦାରିକାମା, ଅଡ଼େ ସରୁ କାମା କିନିତାଣାଟି ମନ ଝେଟ୍‌ଆତେରି □

## ୧୦

ଲାକପୁରୁତି ଦୁତୁ ଅଡ଼େ ରୁପିତି ଉଣା ପତି

୧ ଏଚେଟିଏ ନାନୁ ର ବାଡ଼ମୁଗାଟି ଦୁତୁଇଁ ଲାକପୁରୁତି ରେଚା ଝାହିମାଚାଣି ମେସ୍‌ସେଏଁ, ଏଝାଣି ସାରିସୁରୁ ଦୁହା ଇଞ୍ଜା ତାନି ତାୟିଁ ଲାକ ଦାରଣକି ଅଡ଼େ ତାନି ମୁମ୍ବୁ ଚୁଝଡ଼ା ଲେହେଁ ଅଡ଼େ ତାନି କତାୟିଁ ହିରୁ ମୁଣ୍ଡାଲେହେଁ ତଞ୍ଜାଆହିମାରୁ;

୨ ତାନି କେୟୁତା ଦେପି ଆହାମାନି ର ଉଣା ତଲୁ ପତି, ଏଝାସି ତାନି ଚିଃନି କତା ସାମ୍‌ଦୁରିତା ଅଡ଼େ ଚେବ୍‌ବି କତା ଦାର୍ଡ଼ିତା ଇଚାମାଚେସି;

୩ ସିହିଁକ୍ଟାଃନି ଗାଜିଁ ନିଲେହେଁ କାଜା ହାଡ଼ାତଲେ ହାଟିତେସି, ଏଝାସି ହାଟାଲିଏ ଏଲେକିହିଁଏ ସାଡ଼ାଗଟା ହାଗୁ ଗୁଣ୍ଡନାଇ ତାନି ହାଡ଼ା ଝେଈଁ କିତୁ □

୪ ଏ ସାଡ଼ାଗଟା ହାଗୁ ଗୁଣ୍ଡନାଇ ଝେସାଲିଏ ନାନୁ ରାଟିଇଁ ଇଞ୍ଜିଁ ତିୟାରା ଆଡେଏଁ, ଏଚେଟିଏ ନା ତାକି ହାଗୁଟି ଇ ହାଡ଼ା ଝେଚେଏଁ, “ଏ ସାଡ଼ାଗଟା ହାଗୁ ଗୁଣ୍ଡନିତାଣାଟି ଏନାଆଁ ଝେଞ୍ଜାମାଞ୍ଜି ଏଦାଆଁ ରାଚାଆନା ଡ଼କୁହା ଇଚାମୁ □”

୫ ଏଚେଟିଏ ଆନିନି ଦୁତୁଇଁ ସାମ୍‌ଦୁରି ଅଡ଼େ ଦାର୍ଡ଼ି ଲାକ ନିଚାମାଚାଣି ନାନୁ ମେସାମାଚେଏଁ, ଏଝାସି ତାନି ଚିଃନି କେୟୁ ଲାକପୁରୁ ଝାକି ଦାସାନା

୬ ଆମ୍ବାଆସି ଲାକପୁରୁ, ଦାର୍ଡ଼ି, ସାମ୍‌ଦୁରି, ଅଡ଼େ ଏମ୍ବାଆଁ ମାନାଣି ବାରେ ଗାଡ଼ି କିହାମାନେସି, ଏ କାଲେଏ ତାକି ନୀତାମାନାଣି ଦରୁଟି ପାରମାଣା କିହାନା ଏଲେଇଚେସି, “ଅଡ଼େ ଝେଡ଼ା ଆଏଦେଁ”

୭ ଏଚିବେଲାତା ସାଡ଼ା ଲମ୍ବର ଦୁତୁ ତୀତ୍ରି ଉକିନେସି, ମାହାପୁରୁ ଅଣ୍‌ପୁତି ବଲ୍ଲୁ ଝେକ୍‌ନାରି ଅଡ଼େ ତାନି ସେବା କିନାରାଇଁ ନେହିଁ କାରୁ ଝେସାମାଚେସି, ଏଚିବେଲା ମାହାପୁରୁ ତାନି ଡ଼ଗୁମାନି ଅଣ୍‌ପୁ ପୁରା କିନେସି □

୮ ଇଞ୍ଜା ନାନୁ ଲାକପୁରୁଟି ଆମିନି ହାଡ଼ା ଝେଞ୍ଜା ମାଚେଏଁ, ଅଡ଼େ ଝେଣ୍ଣେ ନା ତାକି ଏଲେଇଞ୍ଜା ଝେଙ୍ଗିତେ, “ହାଲାମ୍ବୁ, ସାମ୍‌ଦୁରି ଅଡ଼େ ଦାର୍‌ତି ଲାକ ନିଚାମାନି ଦୁତୁ କେୟୁତା ଆମିନି ତଲ୍ଲ ପତି ଦେପିଆହାମାନେ ଏଦାଆଁ ଅମ୍ବୁ □”

୯ ଏଚେଟିଏ ନାନୁ ଏ ଦୁତୁ ତାଗେ ହାଜାହାଁ ଏ ଉଣା ତଲ୍ଲ ପତିତି ରାସ୍ତେଏଁ, ଏଞ୍ଜାସି ନାଙ୍ଗେ ଏଲେଇଞ୍ଜାତେସି, “ଇଦାଆଁ ଅହାଁ ତିନାମ୍ବୁ; ଇଦି ନୀ ବାଣ୍ଡିତି କାମ୍ବେଲି କିୟାନେ ସାମା ନୀ ଗୁତି ତାକି କିୟାଁ ଲେହେଁ ଆନେ □”

୧୦ ଏଚେଟିଏ ନାନୁ ଦୁତୁ କେୟୁଟି ଏ ଉଣା ତଲ୍ଲ ପତି ଅହାଁ ତିଚେଏଁ, ଏଦି ନା ଗୁତି ତାକି କିୟାଁ ଲେହେଁ ଆଡ଼େ, ସାମା ଏଦାଆଁ ତିତି ତାୟୁ ନା ବାଣ୍ଡି କାମ୍ବେଲି ଆହାହାଚେ □

୧୧ ଏଚେଟିଏ ନାଙ୍ଗେ ଏଲେଇଞ୍ଜା ଝେସ୍ତାତେସି ହାରେକା ଗତି, କୂଡ଼ା, ହାଡ଼ା ଗାଟାରି ଅଡ଼େ ରାଜାୟାଁ କପାଟି ତାୟୁ ଏନାୟି ଗଟଞ୍ଜି ଆନେ ଏଦାଆଁ ନାନୁ ଅଡ଼େ ଝେଣ୍ଣେ ଝେହ୍‌ନାୟି ମାନେ □

## ୧୧

### ରିଆରି ସାକି ହାନାରି

୧ ଏଚେଟିଏ ନାଙ୍ଗେ ଲାଡ଼ିନି ଲେହେଁତି ର ବାଡ଼ଗା ହାପ୍‌କିଆଡ଼େ, ରଅସି ନାଙ୍ଗେ ଏଲେଇଞ୍ଜାତେସି, “ହାଲାମ୍ବୁ, ମାହାପୁରୁ ଦେଝୁଡ଼ି, ପୂଜାପିଣ୍ଡା ଲାଟାମ୍ବୁ ଅଡ଼େ ଆମ୍ବାଆରି ଏମ୍ବାଆଁ ପ୍ରାଡ଼ାନା କିନେରି ଏଞ୍ଜାରାଇଁ ଏଜିକିମ୍ବୁ □

୨ ☆ସାମା ଦେଝୁଡ଼ି ପାଙ୍ଗାତି ଆଂଗେଣିତି ପିହ୍‌ମ୍ବୁ ଏଦାଆଁ ଲାଟାଆନି, ଇଚିହ୍ ଏଦି ଜାହୁଦିଆଆତାରାକି ହାପ୍‌କି ଆହାମାନେ, ଏଞ୍ଜାରି ରୀ କଡ଼ି ରୀ ଲେଞ୍ଜୁ ପାତେକା ମାହାପୁରୁ ସୁଦୁ ଗାଡ଼ାତି କଡ଼ାତଲେ ଝିସାନା ଦୁଡ଼ି କିନେରି □

୩ ଅଡ଼େ ନାନୁ ନା ରୀ ସାକିୟାଁଇଁ ପାଣ୍ଡିଇଁ ଏଞ୍ଜାରି ବାସ୍ତାୟାଁ ପରହାନା ୧,୨୭୦ ଦିନା ପାତେକା ମାହାପୁରୁ ଅଣ୍‌ପୁତି ବଲ୍ଲ ଝେକ୍‌ନେରି □”



୪ ଏଞ୍ଜାରି ଦାର୍ତ୍ତିତ ପ୍ରଭୃତି ନକ୍ତିତା ନିଚାମାନି ରୀ ଜୀତ ମାର୍‌କା ଅଡ଼େ ରୀ ଦୀର୍ଘ ସତ୍ତାୟାଁ ଲେହେଁତାରି □

୫ ଆମ୍ବାଆସି ଏଞ୍ଜାରାଇଁ ନସ୍ତୁ କିହାଲି ଅଣ୍‌ପିନେସି, ଆତିହ୍ ଏଞ୍ଜାରି ଗୁତିଟି ହିଚୁ ହଚାହାଁ ଏଞ୍ଜାରି ସାତୁୟାଁଙ୍କ ନାସାକିନେ, ଆମ୍ବାଆସି ଏଞ୍ଜାରାଇଁ ନସ୍ତୁ କିହାଲି ଅଣ୍‌ପିତିହ୍, ଏଞ୍ଜାସି ନାସା ଆନେସି □

୬ ଏଞ୍ଜାରି ମାହାପୁରୁ ବଲ୍ଲୁ ଝେକ୍‌ନାଟି ଏନିକ୍ ପିୟୁ ଆଏ ଏଦାଆଁତାକି ହାଗୁତି ସୁଶାଲି ଅଦିକାରା ହାପ୍‌କି ଆହାମାନେ, ଏଚର ଦେବା ଏଞ୍ଜାରି ମନ ଆନେ ଏଚର ଦେବା ଏଞ୍ଜାରି ଏୟୁଣି ନେତେରି ମ୍ବୁପହାଲି ଅଡ଼େ ଦାର୍ତ୍ତିତ ଏନି ଇତି ଏଲେତି ମରଡ଼ି ତଲେ ତଣ୍ଡ ହାହାଲି ଏଞ୍ଜାରାକି ଅଦିକାରା ମାନେ □

୭ ✧ ଏଞ୍ଜାରି ସାକି ହାହାଲି ରାତି ତାୟୁ ତାଡ଼େପୁରୁ ଗାଡ଼ୟୁତି ର ଜନ୍ତୁ ହଚାଞ୍ଜାହାନା, ଏଞ୍ଜାରିତଲେ ଜୁଜୁ କିନେ □

୮ ଏମ୍ବାତି ଏମିନି କାଜା ଗାଡ଼ା ସୁଦୁଜୀଞ୍ଜୁ ତଲେ ସଦମ ଅଡ଼େ ମିସର ଇଞ୍ଜିଁ ଇନେରି, ଏମିନିତାଣା ତାମି ପ୍ରବୁ ଜିକେଏ ପାସିତା ହାହାମାଚେସି, ଏ କାଜା ଗାଡ଼ାତି ଆଂଗେଣିତା ଏଞ୍ଜାରି ମାଡ଼ହାୟାଁ ଡ଼ୟିନ୍ତୁ □

୯ ଅଡ଼େ ବାରେ ଦେସା ଗରି, ହାଡ଼ା, ଇଞ୍ଜାଁ କୁଲୁତି ଲକୁ ତାନିଦିନା ଆଦା ପାତେକା ଏଞ୍ଜାରି ମାଡ଼ହାୟାଁଙ୍କ ମେହ୍‌ନେରି ଅଡ଼େ ଏ ମାଡ଼ହାୟାଁଙ୍କ ମୁସାଲି ହେଲ ହାଅରି □

୧୦ ଏଚେଟିଏ ଦାର୍ତ୍ତିତା ବାସା ଆହାମାନାରି ଏଞ୍ଜାରି ହାଡ଼ି କାରୁ ଝେଞ୍ଜାନା ତିଞ୍ଜି ଉଣ୍ଡିହ୍ ରାହାଁ କିନେରି, ଅଡ଼େ ରଅସି ରଅଶାକି ରାହାଁତଲେ ବେଟୁ ହାପ୍‌କି ଆନେରି, ଇତିହ୍ ଇ ରୀ ମାହାପୁରୁ ଅଣ୍‌ପୁତି ବଲ୍ଲୁ ଝେହ୍‌ନାରି ଦାର୍ତ୍ତିତ ଲକୁଣି କସ୍ତୁ ହାହିମାଚେରି □

୧୧ ତାନିଦିନା ଆଦା ତାୟୁ ମାହାପୁରୁ ତାଣାଟି ଜୀଞ୍ଜୁତି ଗାଲି ଞ୍ଜାହାଁ ଏଞ୍ଜାରି ଆଜ୍ଞାତା ହଚେ, ଏଚେଟିଏ ଏଞ୍ଜାରି କଡ଼ାଣି ବାଡ଼ୟୁ କିହାନା ନିତେରି, ଅଡ଼େ ଆମ୍ବାଆରି ଇ କାମାତି ମେସ୍ତେରି ଏଞ୍ଜାରି ଆଜାହାଚେରି □

✧ ୧୧:୭ ୧୧:୭ ଝେ ବଲ୍ଲୁ ୧୩:୫-୭; ୧୭:୮

୧୨ ଏଚେଟିଏ ଏଞ୍ଜାରି ଲାକପୁରୁଟି ର କାଜା ହାଡ଼ାତଲେ ଏ ରିଆରାକି ଏଲେ ଇଞ୍ଜିମାଚାଣି ଝେଚେରି, “ଇମ୍ପାଆଁ ଝାଦୁ” ଏଚେଟିଏ ଏଞ୍ଜାରି ତାମି ସାତୁୟାଁ ଏଞ୍ଜାରାଇଁ ମେସ୍‌ପନିଏ ଦୁୟା ତଲେ ଲାକପୁରୁ ହାଚେରି □

୧୩ ☆ଏ ଦେବୁଣିଏ ବୁମି ହାଚେରକା ଝୀଡ଼ିତେ ଅଡ଼େ ଗାଡ଼ାଡ଼ି ଦସ ବାଗାଟି ର ବାଗା ନାସା ଆଡ଼େ, ଅଡ଼େ ୭,୦୦୦ ଲକୁ ହାଡ଼େରି, ଇଞ୍ଜା ଏଚେକା ଲକୁ ନୀତାମାଚେରି ଆଜିତାକି ଲାକପୁରୁଟି ମାହାପୁରୁଇଁ ଗାଝୁରମି କିଚେରି □

୧୪ ରୀ ଲମ୍ବର ଆଜିହ୍‌ପେଡ଼ି ତଣ୍ଡ ରାଡ଼େ, ସାମା ତାନି ଲମ୍ବର ଆଜିହ୍‌ପେଡ଼ି ତଣ୍ଡ ତବେ ଝାହିମାନେ □

### ସାତା ଲମ୍ବର ତୀତ୍ରି ମହ୍‌ରି

୧୫ ତାୟୁ ସାତା ଲମ୍ବର ଦୁତୁ ତୀତ୍ରି ଉକିତେସି ଇଞ୍ଜା ଲାକପୁରୁ କାଜା ହାଡ଼ାତଲେ ଇ ହାଡ଼ା ଝେଜିତେ, “ମା ପ୍ରବୁ ଅଡ଼େ ଏଞ୍ଜାଣି ମସିହା ଦାରୁଡ଼ିତି ସାଲୁଝି କିନି ଅଦିକାରା ନୀଏଁ ତାନି କେୟୁତା ଅହାମାନେସି, ଏଞ୍ଜାସି କାଲେଏ ତାକି ରାଜି କିନେସି □”

୧୬ ଏଚେଟିଏ ମାହାପୁରୁ ନକିତା ଜାହା ଜାହାରା ସିଂଗାସାଣିତା କୁଗାମାନି କଡ଼େ ସାରି ଜାଣା ପ୍ରାଚିନାଙ୍ଗା ମୁନୁ କୁତାହାଁ ମାହାପୁରୁଇଁ ଜହରା କିହାଁ,

୧୭ ଏଲେଇଚେରି,  
“ପ୍ରବୁ, ବାରେକିହାଁ ବାଡ଼ୟୁଗାଟି ମାହାପୁରୁ, ନୀନୁ ନୀଏଁ ଅଡ଼େ ତଲିତାଡ଼ି,

ମାମୁ ନିଙ୍ଗେ ଜହରା କିହିମାଞ୍ଜାନମି;

ଏନାଆଁତାକି ଇଚିହଁ ନୀନୁ ନୀ କାଜା ବାଡ଼ୟୁ ତଲେ ସାଲୁଝି କିୟାଲି ଅଦିକାରା ନୀଞ୍ଜୁଟିଏ ଅହାମାଞ୍ଜି □

୧୮ ଜାହୁଦିଆଆତାରି କାର୍‌ବି ଆହାମାଚେରି,  
ସାମା ନୀଏଁ ନୀ କପ୍ପା ଆନି ଦିନା ଝାଡ଼େ,  
ଇଞ୍ଜା ହାଡ଼ାରି ନୀଏଁ ନୀହାଁୟି କିଞ୍ଜିଆନେରି,  
ଇଞ୍ଜା ନୀ ହଲିୟାଙ୍ଗା ମାହାପୁରୁ ଅଣ୍‌ପୁଡ଼ି ବଲ୍ଲ ଝେହ୍‌ନାରି,

ମାହାପୁରୁ ଲକ୍ଷ୍ମୀ, ଅଡ଼େ ନୀ ଦରୁତି ଆଜିନି କାଜାରି ଇଚାରି  
 ବାରେ ଲକ୍ଷ୍ମୀ ଦାନା ବେଟାଆନ୍ଦେରି,  
 ଅଡ଼େ ଆମ୍ବାଆରି ଦାରୁତି ନାସା କିନେରି ଏଞ୍ଜାରି ଜିକେଏ  
 ନାସା ଆନ୍ଦେରି □”

୧୯ ☆ଏଚେଟିଏ ଲାକପୁରୁ ମାନି ମାହାପୁରୁ ଇଲୁତି ଦାରା  
 ଦେପିଆଡ଼େ, ଅଡ଼େ ତାନି ଇଲୁତା ମାନି ରାଜିମାନାତି ପେଡ଼ା  
 ତଞ୍ଜାଆଡ଼େ, ଅଡ଼େ ବିଲିବାଲା ମ୍ପୁହ୍ନାୟି, ହାରେକା ଗିୟାଁ, ହାଗୁ  
 ଗୁଣ୍ଡି ହାଡ଼ା, ଇଞ୍ଜା ବୁମି ଖାଡ଼ିତେ ଅଡ଼େ ହାରେକା ଆଜିୟାଁ ରିଡୁ  
 □

## ୧୨

### ଆୟାଟି ଅଡ଼େ ରାତୁ

୧ ତାୟୁ କାବାଆନି ଲେହେଁତି ସିନା ହାଗୁତା ତଞ୍ଜାଆଡ଼େ,  
 ର. ଆୟାଟି ଲେଞ୍ଜୁ ଲାକ ନିଚାମାଚେ ଅଡ଼େ ଝେଡ଼ାତି ଉଜେଡ଼ି  
 ପରହାମାଚେ □ ଏଦାଣି ତାୟୁଁ ତୁ ବାରଗଟା ହୁକାୟାଁଗାଟି ଟପେରି  
 ମାଚେ □

୨ ଏଡ଼ି ପୁରା ମାସା ଆହାନା ଜାନି କିନି ବେଲାତା ଲୁଞ୍ଜିନି ବାସା  
 ତାକି କସ୍ତୁ ବେଟାଆନ୍ଦିମାଚେ □

୩ ଏଚିବେଲା ହାଗୁ ଲାକ କାବାଆନି ର ସିନା ତଞ୍ଜାଆଡ଼େ, ଏମ୍ବାଆଁ  
 ପାଟୁ ଖାଣାଗାଟି କାଜା ରାତୁ ଏ ରାତୁକି ସାଡ଼ାଗଟା ତାକାଁ, ଇଞ୍ଜା  
 ଦସଗଟା କମ୍‌କା, ଅଡ଼େ ତାକାଁ ଲାକ ସାଡ଼ାଗଟା ଟପେରିକା ମାଟୁ  
 □

୪ ତାନି ଲେଂଗୁଣି ତଲେ ହାଗୁତି ତାନି ବାଗା ହୁକାୟାଁଣି ଦାରୁତି  
 ଲାକ ମେଡ଼ହେ, ଇଞ୍ଜା ଏ ରାତୁ, ଜାନି କିନି ଦେବୁଣିଏ ଇୟାନି  
 ତାଲୁତି ଗୁସାଲି ଏଦାନି ନକିତା ନିତେ □

୫ ଆମ୍ବାଆସି ବାରେ କୃଡ଼ାତି ଲକ୍ଷ୍ମଣି ଲହ୍ ବାଡ଼ଗା ତଲେ ସାଲୁଞ୍ଜି  
 କିନେସି ଇଲେତି ର କକାଣି ତାଲୁଇଁ ଏ ଇୟା ଜାନି କିତେ, ଅଡ଼େ  
 କକାଣି ତାଲୁଇଁ ମାହାପୁରୁ ଇଞ୍ଜା ତାନି ସିଂଗାସାଣି ନକିତା ପେରହା  
 ଅଞ୍ଜିଆଡ଼େ □

୬ ଅଡ଼େ ଏ ଇୟା ଲକ୍ଷ୍ମୀ ହିଲାଆ ବାଟାତା ହଟେ, ଏମ୍ବାଆଁ ୧,୨୬୦ ଦିନା ପାତେକା ପହିକିଝି ଆୟାଲି ମାହାପୁରୁ ତାଣାଟି ଏମ୍ବାଆଁ ଏଦାନାକି ର ଟାୟୁ କେପି ଆହାମାଟେ □

୭ ☆ଏମ୍ବାଟିଏ ଲାକପୁରୁ ଜୁଜୁ ଆଡ଼େ, ମିକାୟେଲ ଅଡ଼େ ତାନି ଦୂତୁୟାଁ ଏ ରାରୁ ତଲେ ଜୁଜୁ କିତୁ, ଏଚେଟିଏ ଏ ରାରୁ ଅଡ଼େ ତାନି ଦୂତୁୟାଁ ଜିକେଏ ଜୁଜୁ କିତେରି □

୮ ସାମା ରାରୁ ଇଞ୍ଜା ତାନି ଦୂତୁୟାଁ ଜୀଣା ଆହାଲି ଆଡ଼ାଆତୁ, ଇଞ୍ଜା ଲାକପୁରୁ ଏଝି ଟାୟୁ ବେଟାଆଆତୁ □

୯ ☆ଏଟିବେଲା ଦାର୍‌ତିତି ନାଡ଼ିକିନି ପଲ୍‌ଆ ପେନୁ ଇଞ୍ଜା ସୟତାନ ଦରୁଟି ଝେଜ୍‌ତି କାଜା ରାରୁ ଏ ପ୍ଲାଃଇ ନାଗା, ଏଦି ତାନି ଦୂତୁୟାଁ ତଲେ ଦାର୍‌ତିତା ମେଡ଼ପି ଆଡ଼େ □

୧୦ ଏଚେଟିଏ ଲାକପୁରୁଟି ଏଲେଇଞ୍ଜି ର କାଜା ହାଡ଼ା ଝେଚେଏଁ, ନୀଏଁ ମାହାପୁରୁ ତାଣାଟି ଗେଲ୍‌ପିନାୟି ଏଗାଝାଡ଼େ, ତାନି ରାଜି ଅଡ଼େ ବାଡ଼ୁୟୁ ଇଞ୍ଜା କ୍ରୀସ୍ତତି ଅଦିକାରା ଝାହାମାନେ, ଇଚିହଁ ଆମିନି ସାତୁ ମା ତାୟି ତାଜିସ୍ତା କପାଟି ନିଙ୍ଗାନା ଲାଆଁ ମାଦେନା ମାହାପୁରୁ ନକିତା ଦାଝା କିହିମାଟେ, ଏଦି ଲାକପୁରୁଟି ଦାର୍‌ତିତା ମେଡ଼ପି ଆହାମାନେ □

୧୧ ଏଝାରି ମେଣ୍ଡା ତାଲୁତି ନେତେରି ତଲେ ଅଡ଼େ ଝେକ୍‌ହାମାନି ସାତା କାତାତଲେ ଜୀଣା ଆହାମାନେରି ଇଞ୍ଜା ଏଝାରି ହାହାଲିତାକି ଜିକେଏ ତାନି ଜୀଝୁଇଁ ଜୀଝୁ ନହଁ ହିଲାଆତେରି □

୧୨ ଏଦାଆଁତାକି ଏ ଲାକପୁରୁ ଅଡ଼େ ଏମ୍ବାଆଁ ବାସା ଆହାମାନାତେରି ରାହଁ ଆଦୁ, ସାମା ଦାର୍‌ତି ଅଡ଼େ ସାମଦୁରି ମୀରୁ ତଣ୍ଡ ବେଟା ଆନାତେରି ଏନାଆଁତାକି ଇଚିହଁ ତାନି ବେଲା ହାଡ଼େକା ଉଣା ମାନେ ଇଞ୍ଜା ପୁଞ୍ଜାନା ପଲ୍‌ଆ ପେନୁ ସୟତାନ ହାଡ଼େକା କପାତଲେ ମୀ ତାଣା ରେଟା ଝାହାମାନେ □

୧୩ ରାରୁ ଜାହାରାଇଁ ଦାର୍‌ତିତା ମେଡ଼ପି ଆହାମାନାଣି ମେସାନା ଏ କକାଣି ତାଲୁଇଁ ଜାନି କିତି ଇୟାନି ଜେଟ ଜେଟ ପେରହା ଅଡ଼େ □

☆ ୧୨:୭ ୧୨:୭ ଜୀହୁଦା ୧:୯ ☆ ୧୨:୯ ୧୨:୯ ଲୁକ ୧୦:୧୮

୧୪ ଏଚେଟିଏ ଏ ଇୟା ରାରୁ ଗୁଡିଟି ଏନିକି ଗେଲ୍ପିଆହ୍ନା ତାନି ବାର୍ଯା ସ ଲେଞ୍ଜୁ ପାତେକା ପହିକିଝି ଆଡେନ, ଏଦାଆଁତାକି ଲକୁ ହିଲାଆ ବାଟାତି ତାନି ଟାୟୁତା ଉୟାହାଜାଲି ଲେଡ଼ଡୁ ରୀ ମାରାୟା ହୀପକି ଆତୁ □

୧୫ ଏଚେଟିଏ ଏ ଇୟାନି ଅଝି କିୟାଲି ରାରୁ ତାନି ଗୁଡିଟି ର କାଜା କାତା ଏୟୁ ହପ୍ସହେ □

୧୬ ସାମା ଏ ଇୟାନି ସାୟେନି କିହାଲି ଦାରୁତି ତାନି ଗୁଡିତି ଦେଚାନା ରାରୁ ଗୁଡିଟି ହଡି କାତା ଏୟୁଣି ଗୁସ୍ତେ □

୧୭ ଏଚେଟିଏ ରାରୁ ଏ ଇୟାନି ହାରେକା କପା ଆହ୍ନା ତାନି କୁଡାତାରି ଏଚେକା ଲକୁ ମାହାପୁରୁତି ହୁକୁମି ମାନଝି ଆହ୍ନା ଜୀସୁତି କାତା ଝେସିମାନେରି, ଏଝାରିତଲେ ଜୁଜୁ କିହାଲି ହାଚେ □

୧୮ ଇଞ୍ଜା ରାରୁ ସାମ୍ବୁରି ଗାରୁତି ବାଝଲିତା ନିତେ □

## ୧୩

### ରୀ ଜନ୍ତୟାଁ

୧ ☆ଏଚେଟିଏ ନାନୁ ସାମ୍ବୁରି ମାଦିଟି ହଚାଝାହିମାନି ର ଜନ୍ତ ମେସ୍ତେସ୍, ଏଝାଣାକି ଦସଗଟା କମ୍କା ଅଡେ ସାଡାଗଟା ତାର୍କା, ତାନି କମ୍କାଣା ଦସଗଟା ଟପେରିକା ଇଞ୍ଜା ତାର୍କା ଲାକ ମାହାପୁରୁ ନିୟାକିନି ର ର ଦରକା ମାରୁ □

୨ ଏ ଜନ୍ତ ତୀରିରେଙ୍ଗା କ୍ଳାଝନି ଲେହେଁ ତଞ୍ଜାଆହିମାଚେ, ତାନି କତାୟାଁ ଅଝଅଡି କତାୟାଁ ଲେହେଁ ଇଞ୍ଜା ଗୁଡି ସିହ୍ନୁଞ୍ଜାଝନି ଗୁଡି ଲେହେଁ ଏ କାଜା ରାରୁ ଜନ୍ତକି ତାନି ବାଡ଼ୟୁ, ସିଂଗାସାଣି, ଅଡେ ବାରେ ଅଦିକାରା ହୀତେ □

୩ ଏ ଜନ୍ତତି ତାୟୁଁତୁ ଆମିନି ହାନିଲେହେଁତି ଗାହ୍ନା ତଞ୍ଜାଆହିମାଚେ, ସାମା ଏ ଗାହ୍ନା ନେହଁ ଆଡେ, ଅଡେ ଦାରୁତିତା ମାନାରି ବାରେ କାବା ଆହ୍ନା ତାନି ଜେଚ ହାଚେରି □

୪ ଅଡେ କାଜା ରାରୁ ଜନ୍ତକି ତାନି ଅଦିକାରା ହୀତାକି ଏଝାରି ରାରୁଇଁ ଜହରା କିତେରି, ଏଝାରି ଏ ଜନ୍ତଇଁ ଜିକେଏ ଜହରା

☆ ୧୩:୧ ୧୩:୧ ଝେ ବଲ୍ଲ ୧୭:୩,୭-୧୨

କିହାଁ ଏଲେଇଚେରି, “ଆମ୍ବାଆସି ଇ ଜନ୍ତୁ ଲେହେଁ ଆନେସି ଅଡ଼େ ଆମ୍ବାଆସି ଏଦାଣି ତଲେ ଜୁଜୁ କିହାଁ ଜୀଣା ଆନେସି □”

୫ ଏଦାନାକି ଆଙ୍କାରା ଅଡ଼େ ମାହାପୁରୁ ନିନ୍ଦାତି କାତା ଝେସାଲି ଗୁତି ହାଝିଆଡ଼େ, ଅଡ଼େ ରୀ କଡ଼ି ରୀ ଲେଞ୍ଜୁ ପାତେକା ସାଲଝି କିୟାଲି ଅଦିକାରା ହାପୁକିଆଡ଼େ □

୬ ଏମ୍ବାଟିଏ ଏଦି ତାନି ଗୁତି ଏକହାନା ମାହାପୁରୁ ନିନ୍ଦା କାତା ଜଲାନା, ମାହାପୁରୁ ଦରୁ, ମାହାପୁରୁ ବାସାଆନି ଟାୟୁ, ଅଡ଼େ ଲାକପୁରୁ ବାସା ଆହାମାନାରାଇଁ, ବାରେତି ନିନ୍ଦା କିତେ □

୭ ବାରେ ମାହାପୁରୁ ଲକୁଇଁ ଜୁଜୁ କିହାଁ ଜୀଣା ଆହାଲି ଅଦିକାରା ହାଝିଆହାମାଚେ, ଅଡ଼େ ବାରେ ଗତି, କୂଡ଼ା, ହାଡ଼ା, ଦେସା, ଲାକ ଅଦିକାରା ହାଝିଆହାମାଚେ □

୮ ଆମ୍ବାଆରି ଦରୁ ଦାର୍ଡିତି ଗାଡ଼ି ଆଆ ନକେଏ ପୂଜା ମେଣ୍ଡା ଡାଲୁତି ଜୀଝୁଗାଟି ପତିତା ରାସୁକି ଆହାହିଲେଏ, ଦାର୍ଡିତା ବାସା କିହାମାନି ଏ ବାରେ ଲକୁ ଏ ଜନ୍ତୁଇଁ ଜହରା କିନେରି □

୯ “ଆମ୍ବାଆରାକି କୀର୍କା ମାନୁ ଏଝାସି ଝେଣ୍ଡାସି!

୧୦ ଆମ୍ବାଆସି ଦସାହାଁ ଅନେସି, ଏଝାସି ଏଲେକିହୁଏ ଦସପି ଆନେସି, ଆମ୍ବାଆସି କାଣ୍ଡାତଲେ ପାୟିନେସି, ଆତିହୁଏ ଏଝାସି ଏଲେଆହୁଏ କାଣ୍ଡାତଲେ ପାୟୁଝି ଆନେସି, ଏତିବେଲାତା ମାହାପୁରୁ ଲକୁତାକି ନାମୁ ଅଡ଼େ ଅରୁହିନାୟି ଲଡ଼ାମାନେ □”

୧୧ ଏଚେଟିଏ ନାନୁ ର ଜନ୍ତୁଇଁ ବୁମି ବିତ୍ରାଟି ହଡ଼ାଝାଡ଼ାଣି ମେସ୍ତେଏଁ, ମେଣ୍ଡା ଡାଲୁ ଲେହେଁ ଜଡ଼େକା କମକା, ଅଡ଼େ ଏଦି ରାତୁ ଲେହେଁ କାତା ଆହିମାଚେ □

୧୨ ଏ ଜନ୍ତୁ ନକେଏତି ଜନ୍ତୁ ନକିତା ତାନି ବାଡ଼ୁୟୁ ତସାନା ଏମିନି ନକେଏତି ଜନ୍ତୁକି ହାନିଲେହେଁତି ଗାହାଁ ମାଡ଼ାମାଚେ, ଏଦାନି ଜହରା କିହାଲି ଦାର୍ଡି ଅଡ଼େ ଏମ୍ବାଆଁ ବାସା ଆହାମାନାରାଇଁ ବାଲାମାତମି କିନେ □

୧୩ ଏ ଜନ୍ତୁ କାବାଆନି କାମାୟାଁ କିନେ, ଏଦି ବାରେ ଲକୁ ନକିତା ହାଗୁଟି ଦାର୍ଡିତା ହିରୁ ରିଝିକିନେ □

୧୪ ଇଞ୍ଜାଁ ଏ ତଲିତି ଜନ୍ତୁ ନକିତା ଆମିନି କାବାଆନି କାମା କିହାଲି ଅଦିକାରା ବେଟାଆହାମାଚେ, ଏମ୍ବାଟି ଦାର୍ଡିତା ବାସାଆହାମାନି

ଲକ୍ଷ୍ମଣ ନାଡ଼ିକିହାଁ, ଆମିନି ଜନ୍ତୁ କାଣ୍ଡାତଲେ ଗାହାଁ ଆହାମାଟି ଜିକେଏ ନୀଡ଼ିତେ, ଏଦାନି ର ବମା କିହାଲି ଏଞ୍ଜାରାଇଁ ଏଲେଇନେ □

୧୫ ଏ ଜନ୍ତୁଟି ବମା ଏନିକି ଜଲ୍ଲାଲି ଆଡ଼ିନେ ଅଡ଼େ ଏରେକା ଲକ୍ଷ୍ମଣ ଜନ୍ତୁଟି ବମାଟି ଜହରା କିଅରି, ଏଞ୍ଜାରି ଏନିକି ପାୟୁଡ଼ି ଆନେରି, ଏଦାଆଁତାକି ତାୟୁଡ଼ି ଜନ୍ତୁକି ତଲିତି ଜନ୍ତୁଟି ବମାକି ଜୀଞ୍ଜୁ ହାହାଲି ଅଦିକାରା ହାପକିଆଡ଼େ □

୧୬ ଅଡ଼େ ଏ ଜନ୍ତୁ ଉଣା, କାଜାରି, ବାଡ଼କୁ ଗାଟାରାଇଁ, ହାକି ଗାଟାରାଇଁ, ହଲିୟାଜା, ହଲିୟାଜା ଆଆତାରାଇଁ, ବାରେଜାଣାତି ତାମି ଚିନି କେୟୁତା ଆଆତା ମୁଞ୍ଜୁତା ର ସିନା ଇଟା କଡାଲି ବାଲାମାତମି କିନେ □

୧୭ ଅଡ଼େ ଏ ସିନା ଇଚିହାଁ ଜନ୍ତୁଟି ଦରୁ ଆଆତା ତାନି ଦରୁତି ଲମ୍ବର ଇଟା କଡାଆତି ଲକ୍ଷ୍ମଣ ଏନାଆଁ କଡାଲି କି ପାରଟାଲି ହାଏ □

୧୮ ଏ ବାରେତାକି ବୁଦି ଲଡ଼ାମାନେ, ଆମ୍ବାଆରାକି ବୁଦି ମାନେ ଏଞ୍ଜାସି ଏ ଜନ୍ତୁଟି ଲମ୍ବର ଏଜିକିପାସି, ଏନାଆଁତାକି ଇଚିହାଁ ଏଦି ର ମାଣ୍ଡସିତି ଲମ୍ବର ଅଡ଼େ ଏ ଲମ୍ବର ଆହିମାନେ ସ ଞ୍ଜାଞ୍ଜା ତାନିକଡ଼ି ସ □

## ୧୪

### ମେଣ୍ଡା ଡାଲୁ ଅଡ଼େ ତାନି ଲକ୍ଷ୍ମଣ

୧ \*ଏରେଟିଏ ନାନୁ ସିନିକିହାଁ ମେଣ୍ଡେସାଁ, ଅଡ଼େ ମେଣ୍ଡା ଡାଲୁ ସିୟନ ହରୁତା ନିଚାମାନେ, ଅଡ଼େ ଆମ୍ବାଆରି ମୁଞ୍ଜୁତା ମେଣ୍ଡା ଡାଲୁ ଇଞ୍ଜା ତାନି ଆବାତି ଦରୁ ରାୟକି ଆହାମାଟେ ଇଲେତି ଲକ୍ଷ୍ମଣ ସାଡ଼ାକଡ଼ି ସାରି ମାଣ୍ଡା ଲକ୍ଷ୍ମଣ ତାନିତଲେ ନିଚାମାଟାଣି ମେଣ୍ଡେସାଁ □

୨ ଅଡ଼େ ଲାକପୁରୁଟି ଲଦ ଲଦ ଆହି ରିନି ଏୟୁ ଇଞ୍ଜା ହାଗୁ ଗୁଣ୍ଡିଲେହେତି ର କାଜା ହାଡ଼ା ଝେଚେସାଁ, ଆମିନି ହାଡ଼ା ନାନୁ ଝେଚେସାଁ ଏଦି ସେରଜି ଡ଼ିଡ଼ିହିମାନାରି ହାଡ଼ାଲେହେଁ ଝେଜିମାଟେ □

☆ ୧୪:୧ ୧୪:୧ ଝେ ବଲ୍ଲୁ ୭:୩

୩ ସିଂଗାସାଣି ସାରିଗଟା ଜନ୍ତୁ ଅଡ଼େ ପ୍ରାତିନାଙ୍ଗା ନକିତା ର ପୁଃନି ପାରୁ ପାଟିମାଚେରି, ଅଡ଼େ ଦାରତିଟି କଡ଼ଝି ଆହାମାନି ସାଡ଼ାକଡ଼ି ସାରି ମାଣା ଲକୁ ପିସ୍‌ପେ ଆମ୍ବାଆରି ଏ ପାରୁ ପାଟାଲି ଆଡ଼ାଆଚେରି  
 □ ବାରେ ମାଣ୍‌ସି କୁଡ଼ା ବିତ୍ରାଟି ଖାରଇ ଏଞ୍ଜାରିଦେଁ ଗେଲ୍‌ପି ଆହାମାଚେରି □

୪ ଏଞ୍ଜାରି ଇୟାସିକା ତଲେ କାଲ୍‌ହାନା ତାମ୍ବୁଜାହାରାଇଁ ଦହ କିହାଁ କଡ଼ା ହିଲାଆଚେରି, ଇଚିହଁ ଏଞ୍ଜାରି ଅଟ୍‌ହାରି, ମେଣ୍ଡା ଡାଲୁ ଆମ୍ବିୟାଞ୍ଜାକି ହାନେ ଏଞ୍ଜାରି ତାନି ଜେଚ ହାନେରି, ଏଞ୍ଜାରି ମାହାପୁରୁ ମେଣ୍ଡା ଡାଲୁତି ତଲିତି ପାଡ଼େୟି ସମାନା ମାଣ୍‌ସିୟାଁ ବିତ୍ରାଟି ଗେଲ୍‌ପି ଆହାନା ମେଣ୍ଡା ଡାଲୁ ନକିତା ହେରପିଆହାମାନେରି □

୫ ଏଞ୍ଜାରି ଗୁତିତା ଏନି ମିଚି ଜଲିନାୟି ହିଲେଏ, ଏଞ୍ଜାରି ଦହ ହିଲାଆ ଗାଟାରି □

**ତାନି ଜାଣା ଦୂତୁ**

୬ ଏଚେଚିଏ ନାନୁ ହାଗୁତି ମାଦି ଉମ୍ବିମାନି ର ଦୂତୁଇଁ ମେସ୍‌ସେଏଁ, ଏଞ୍ଜାସି ଦାରତିତା ବାସାଆହାମାନି ବାରେ ଗତି, କୁଡ଼ା, ହାଡ଼ା ଅଡ଼େ ଦେସାତି ଲକୁତାଣା ଝେକ୍‌ହାଲି କାଲ୍‌କାଲ୍‌ ତାକି ଡ଼ୟିନି ନେହଁ କାରୁ ଝେକ୍‌ହି ମାନେସି □

୭ ଏଞ୍ଜାସି କାଜା ଗିୟାତଲେ ଏଲେଇଚେସି, “ମାହାପୁରୁଇଁ ଆଜାଦୁ ଅଡ଼େ ଏଞ୍ଜାଣାଇଁ ଗାଞ୍ଜୁରମି ହୀଦୁ, ଇଚିହଁ ମାଣ୍‌ସିତି ନୀହାଁୟି କିନି ଦିନା ଏଗାଞ୍ଜାଡ଼େ, ଅଡ଼େ ଆମ୍ବାଆସି ହାଗୁ, ଦାରତି, ସାମ୍‌ଦୁରି ଇଞ୍ଜା ଜାରଣା ଏୟୁତି ଗାଡ଼ିକିହା ମାନେସି, ଏଞ୍ଜାଣାଇଁ ଜହରା କିଦୁ □”

୮ ☆ତାନି ତାୟୁ ଅଡ଼େ ର ଦୂତୁ ଇଚିହଁ ରୀ ଲମ୍ବର ଦୂତୁ ଞ୍ଜାହାନା ଏଲେଇଚେସି, “ଆମିନି କାଜା ଗାଡ଼ା ବାବିଲନ ବାରେ କୁଡ଼ାତି ଲକୁଇଁ ତାନି ଦାରିକାମା କିଞ୍ଜିକିନି କାଡ଼ ଡୁଚ୍‌ହାନା ହଡ଼ିକିହାମାଚେ, ଏଦି ରିହା ହାଜାମାନେ □”

୯ ଏଦାଣି ତାୟୁ ଅଡ଼େ ର ଦୂତୁ ଇଚିହଁ ତାନି ଲମ୍ବର ଦୂତୁ ଞ୍ଜାହାନା କାଜା ଗିୟାତଲେ ଏଲେଇଚେସି, “ଆମ୍ବାଆସି ଏ ଜନ୍ତୁ ଅଡ଼େ ତାନି

---

☆ ୧୪:୮ ୧୪:୮ ଝେ ବଲ୍ଲୁ ୧୮:୨



କିହାମାନି ବମାତି ଜହରା କିନେସି ଅଡ଼େ ମୁଞ୍ଜୁତା କି କେୟୁତା ତାନି ସିନା ଇଟା କଡ଼ିନେସି,

୧୦ ଏଝାସି ମାହାପୁରୁତି କପାଗାଟି ସଲ୍ଲାତା ଝାକ୍‌ହାମାନି ହାରେକା କାରବିତି କାଡ଼ୁଗହନେସି, ଆମ୍ବାଆରି ଇ କାମା କିନେରି ଏଝାରି ବାରେ ମେଣ୍ଡା ତାଲୁ ଅଡ଼େ ସୁଦୁ ଲାକପୁରୁତି ଦୂଡୁୟାଁ ନକିତା ହିରୁ ଅଡ଼େ ଗାନ୍ଧାଗାଟି ଗୁଣ୍ଡା ତଲେ କସ୍ତ ବେଟା ଆନେସି □

୧୧ ଇଲେତି ଲକୁଣି କସ୍ତ ହାନି ହିରୁ ବୟ୍ କାଲାକାଲା ତାକି ହଡ଼େମାନେ, ଆମିନି ଗାଟାରି ଜନ୍ତୁ ଅଡ଼େ ବମାତି ଜହରା କିନେରି ଅଡ଼େ ତାନି ଦରୁ ଇଞ୍ଜା ସିନା ବେଟା ଆହାମାନେରି, ଏଝାରି ଲାଆଁ ମାଦେନା ଜମାଲି ବେଟାଆଅରି □”

୧୨ ଇମ୍ବାଆଁ ମାହାପୁରୁ ଲକୁ ଇଚିହିଁ ମାହାପୁରୁତି ହୁକୁମି ମାନଝିଆନେରି, ଇଞ୍ଜା ଜୀସୁଇଁ ନାମିନେରି, ଏଝାରାକି ଅରହିନାୟି ଲଡ଼ାମାନେ □

୧୩ ଇଞ୍ଜା ଲାକପୁରୁଟି ଇ ହାଡ଼ା ଝେଚେଏଁ, ଇ କାତା ରାଟାମୁ, “ନୀଏଁ ଆମ୍ବାଆରି ମାହାପୁରୁ ତାଣା ମାଞ୍ଜାନା ହାନେରି, ଏଝାରି ନେହେଁ □” ଅଡ଼େ ନାନୁ ଝେଚେଏଁ ସୁଦୁଜୀଝୁ ଝେସିମାଞ୍ଜାନେ, “ଏଝାରି ତାମି କାମାତି ଝାହୁଟି ଜମିନେରି, ଇଚିହିଁ ଏଝାରି କାମାତି ପାଡ଼େୟି ଏଝାରିତଲେ ଡ଼ୟିନେ □”

### ତାସା ଦାନାୟି

୧୪ ଅଡ଼େ ନାନୁ ମେସେଏଁ, ଇତାୟି ଦବ୍‌ଲା ହାଗୁ ଇଞ୍ଜା ଏଦାଣି ଲାକ କୁଗାମାନେସି ର. ମାଣ୍ଡସି ମୀରୁଏସି ଲେହେଁତାସି; ତାନି ତାୟ୍ ତୁ ବାଂଗାରା ଚପେରି, ଇଞ୍ଜା କେୟୁତା ର. ଝାହନି କଚାତଖେଲି □

୧୫ ଏମ୍ବାଟିଏ ମାହାପୁରୁତି ଇଲୁଟି ର. ଦୂଡୁ ଝାହାନା ହାଗୁତା କୁଗାମାନାଣାଇଁ କାଜା ଗିୟାଁତଲେ ଏଲେଇଚେସି, “ନୀ କଚାତଖେଲି ଆସାନା ତାସା ଦାମୁ □ ଦାରତିତି ତାସା ଦାଝନି କାରୁ ଏଗାଝାତେୟିଏ □”

୧୬ ଇଦାଆଁ ଝେଞ୍ଜାନା ହାଗୁତା କୁଗାମାନି ମାଣ୍ଡସି ତାନି କଚାତଖେଲି ଅଗିତେସି ଇଞ୍ଜା ଦାରତିତି ତାସା ବାରେ କୃଡ଼ିକିଝିଆଡ଼େ □

୧୭ ଏଦାଆଁ ତାୟ୍ଲ ଲାକପୁରୁତି ମାହାପୁରୁ ଇଲୁଟି ଅଡେ ର ଦୁତୁ ହଚାଝାଡେସି, ଏ ଦୁତୁ କେୟୁତା ଜିକେଏ ଝାହ୍‌ନି କଚାତଖେଲି ମାଚେ  
□

୧୮ ଅଡେ ପୁଜା ପିଣ୍ଡାତି ହିରୁ ଅଦିକାରାତା ମାନି ର ଦୁତୁ କଚାତଖେଲି ଆସାମାନି ଅର ଦୁତୁଇଁ କାଜା ଗିୟାତଲେ ଏଲେଇଚେସି, “କଚାତଖେଲି ଅଗାନା ଦାରତିତି ଅଲୁରି ବାଡ଼ାଟି ଅଲୁରିକା ବାରେ ଡଡ଼ହା ତୁହମ୍‌; ଏଝି ବାରେ କାମ୍‌ମାନୁ □”

୧୯ ଏମ୍‌ଗାଟିଏ ଦୁତୁ ଦାରତିତା ତାନି କଚାତଖେଲି ଅଗାନା ଅଲୁରିମାଡ଼ାୟାଟି ଅଲୁରି ଡଡ଼ହେ ଇଞ୍ଜା ଏଝାସି ମାହାପୁରୁ କାରବିତି ଅଲୁରି ପାଡ଼ିକିନି ଦନିତା ମେଡ଼ହେସି □

୨୦ ☆ଗାଡ଼ାତି ପାଙ୍ଗାତା ମାନି ଏ ଦନିତା ଅଲୁରି ପାଡ଼ିକିଝିଆଡେ ଇଞ୍ଜା ଏମ୍‌ଗାଟି ଗଡ଼ାୟା ବାକେରି ପାତେକା ନିଙ୍ଗାନା ତାନି ଝାଞ୍ଜା କିଲମିଟର ହେକ ପାତେକା ଇଞ୍ଜା ରା ମିଟର ଲାକ ପାତେକା ନେତେରି ଝାଙ୍ଗିଡେ □

## ୧୫

### ସାଡ଼ାଗଟା ରଗ କିନି ସାଡ଼ାଗଟା ଦୁତୁୟାଁ

୧ ଏମ୍‌ଗାଟିଏ ନାନୁ ହାଗୁତା ଅଡେ ର କାବାଆନି ଲେହେଁତି ସିନା ମେସ୍‌ସେସି, ସାଡ଼ାଗଟା ଦୁତୁୟାଁ ସାଡ଼ାଗଟା ରଗୟାଁ ତାନି କେୟୁତା ଆସାନା ତଞ୍ଜାଆତୁ, ଏ ରଗୟାଁ ମାହାପୁରୁତି କପା ତହ୍‌ନାୟି ରାନାୟି ମାଚେ □

୨ ଅଡେ ନାନୁ ମେସ୍‌ସେସି, ହିରୁ କାଲୁହି ଦାପେଣି ଲେହେଁତି ସାମ୍‌ଦୁରି, ଆମ୍‌ଆରି ଜନ୍ତୁ, ଏଦାନି ବମା ଇଞ୍ଜା ଏଦାନି ଦରୁତି ଲମ୍‌ରଟି ଜାଣା ଆଡ଼ାରି, ଏଝାରି ମାହାପୁରୁ ହାହାମାନି ସେରଞ୍ଜି ଆସାନା ଗାକୁ ଲେହେଁତି ସାମ୍‌ଦୁରି ଗିରୁତା ନିଚାମାଚେରି □

୩ ଏଝାରି ମାହାପୁରୁ ହୀତି ରାମଗଂଟା ଝେଟିହିଁ ମାହାପୁରୁତି ସେବାକିନି ମସାତି ପାରୁ ଇଞ୍ଜା ମେଣ୍ଡା ତାଲୁତି ପାରୁ ପାଡ଼ିହିଁ ଏଲେ ଇଞ୍ଜାଁ ମାନେରି,

“ବାରେତି କିହାଁ ବାଡ଼ୟୁ ଗାଟି ପ୍ରୁ ମାହାପୁରୁତି,

ନୀ କାମା ଏଚେକା କାଜାୟି ଅଡ଼େ କାବା ଆନାୟି,  
 ବାରେ ଲକ୍ଷୁତି ରାଜାତି,  
 ନୀ କାମାତି ଜିରୁ ବାରେ ନୀହାୟି ଗାଟାୟି ଇଞ୍ଜା ସାତାତାୟି □  
 ୪ ପ୍ରଭୁ! ନିଜେ ଆମ୍ବାଆସି ଆଜାଆ ଗାଟାସି ମାନେସି ?  
 ଆମ୍ବାଆସି ନୀ ଗାଞ୍ଜୁରମି ଝେକ୍‌ଆଗାଟାସି ମାନେସି ?  
 ଇଚିହିଁ ନୀନୁ ରଅତିଏ ସୁଦୁ ଗାଟାତି;  
 ବାରେ କୂଡ଼ାତି ଲକ୍ଷୁ ଖାହାନା ନୀ ପୂଜା କିନେରି,  
 ଏନାଆଁତାକି ଇଚିହିଁ ନୀ ଦାମ୍ବୁଗାଟି ନୀହାୟିତି କାମାୟି  
 ବାରେଜାଣା ମେସାମାନେରି □”

୫ ଏମ୍ବାଟିଏ ନାନୁ ମେସ୍ତେଏଁ, ଲାକପୁରୁତି ସାକି ହାନି ତୁମୁ  
 ଦେଝୁଡ଼ିତି ଦାରା ଦେପିଆଡେ

୬ ସାଡ଼ାଗଟା କସ୍ତୟି ଆସାମାନି ସାଡ଼ାଗଟା ଦୁତୁୟି ଲାକପୁରୁତି  
 ଦେଝୁଡ଼ିତି ହରାଝାଡେରି; ଏଞ୍ଜାରି ଅପହି ମୁହନି ହିମ୍ବୁରିକା  
 ହୁଟାମାଚେରି ଇଞ୍ଜା ଏଞ୍ଜାସିକା ବକ ସାରିସୁରୁ ବାଂଗାରା ପାଟା  
 ଦସାମାଚେରି □

୭ ସାରିଗଟା ଜନ୍ତୁୟି ବିତ୍ରାଟି ର ଜନ୍ତୁ କାଚଲଏତାକି ନୀତାମାନି  
 ମାହାପୁରୁ କପାତଲେ ନେଞ୍ଜାମାନି ସାଡ଼ାଗଟା ବାଂଗାରା ଗିନାୟି ଏ  
 ସାଡ଼ାଗଟା ଦୁତୁୟିକି ହୀଡେସି □

୮ ମାହାପୁରୁତି ଗାଞ୍ଜୁରମି ଅଡ଼େ ତାନି ବାଡ଼ୁୟୁଟି ହଟିମାନି ବୟି  
 ଦେଝୁଡ଼ିତା ନେଞ୍ଜାହାଚେ; ସାଡ଼ାଗଟା ଦୁତୁୟି ତାଚାମାନି ସାଡ଼ାଗଟା  
 ରଗାୟି ରାଆ ପାତେକା ଏ ଦେଝୁଡ଼ି ବିତ୍ରା ଆମ୍ବାଆସି ହଡ଼ାଲି  
 ଆଡ଼ାଆଡେସି □

## ୧୭

### ମାହାପୁରୁ କପାତି ସାଡ଼ାଗଟା ଗିନାୟି

୧ ଏଚେଟିଏ ନାନୁ ଝେଚେଏଁ, ଦେଝୁଡ଼ିତି ରଅସି କାଜା ଗିୟିତଲେ  
 ଏ ସାଡ଼ାଗଟା ଦୁତୁୟିକି ଝେସିମାଚେସି, “ହାଲୁ, ସାଡ଼ାଗଟା  
 ଗିନାୟିଣା ନେଞ୍ଜାମାନି ମାହାପୁରୁତି କପାତି ଦାରତି ଲାକ ଖାକ୍‌ଦୁ  
 □”

୨ ଏଚେଟିଏ ମୂଲୁତି ଦୂତୁ ହାଜାନା ତାନି ଗିନାତା ଏନାୟି ମାଚେ, ଦାରତି ଲାକ ଝାକ୍‌ହେସି; ଏ ଦେବୁଣିଏ ଆମ୍ବାଆରି ତାଣା ଜନ୍ତତି ସିନା ମାଚେ, ଇଞ୍ଜା ତାନି ବମାତି ପୂଜା କିହାମାଚେରି, ଏଝାରି ଆକ୍ମାତା ହାରେକା କସ୍ତଗାଟି ବୀସା ପଟ୍‌କାୟି ହତୁ □

୩ ଏଚେଟିଏ ରୀ ଲମ୍ବର ଦୂତୁ ତାନି ଗିନାତାଣି ସାମ୍‌ଦୁରି ଲାକ ଝାକ୍‌ହେ; ଇଞ୍ଜା ସାମ୍‌ଦୁରିତି ଏୟୁ ହାଡି ଲକୁତି ନେତେରିଲେହେ ଆତୁ, ଇଞ୍ଜା ସାମ୍‌ଦୁରିତା ମାତି ବାରେ ଜନ୍ତୟି ହାହାହାତୁ □

୪ ତାନି ଲମ୍ବର ଦୂତୁ ତାନି ଗିନାତା ଏନାୟି ମାଚେ, କାତା ଇଞ୍ଜା ଉସା ଏୟୁ ଲାକ ଝାକ୍‌ହେସି; ଇଞ୍ଜା ଏ ଏୟୁ ବାରେ ନେତେରି ମିଶ୍‌ହା ହାତୁ □

୫ ଏଚିବେଲାତା ନାନୁ ଝେଚେଏ, ଏୟୁ ଲାକ ଅଦିକାରା ବେଟାଆହାମାନି ଦୂତୁ ଏଲେଇଞ୍ଜିମାଚେସି, “ନାନୁ ସୁଦୁ ଗାଟାତି, ନୀଏ ମାନାତି ଅଡେ ତଲିଏ ମାଟାତି; ନାନୁ ତୀର୍‌ପୁତଲେ ନୀହାୟି କିହାମାଞ୍ଜି □

୬ ଏଝାରି ମାହାପୁରୁ ଲକୁଇଁ ଇଞ୍ଜା ମାହାପୁରୁ ଅଶ୍‌ପୁତି ବଲ୍ଲୁ ଝେହ୍‌ନାରି ଆମିନି ନେତେରି ବକ୍‌ହାମାଚେରି, ଏଦାଆଁ ମୀରୁ ଏଝାରାଇଁ ଉଚ୍‌ହାମାଞ୍ଜି □ ଏଝାରି ଏନାଆଁ ବେଟାଆନାଣି ବେଟାଆହାମାନେରି □”

୭ ଏଚେଟିଏ ପୂଜା ପିଶ୍‌ଗାଟି ର ହାଡ଼ା ଝେଚେଏ, ବାରେତି କିହାଁ ବାଡ଼୍‌ମୁଗାଟି ମାହାପୁରୁ ପ୍ରବୁ! ନୀ ନୀହାୟି ବାରେ ସାତା ଅଡେ ଟିକାଣାତାୟି □

୮ ସାରି ଲମ୍ବର ଦୂତୁ ତାନି ଗିନାତା ମାଚାଣି ଝେଡ଼ା ଲାକ ଝାକ୍‌ହେସି, ଏଦାଆଁତାକି ଝେଡ଼ା ହାରେକା ଡ଼ାଞ୍ଜାନା ଲକୁଣି ହୁତିତେ □

୯ ଏଚିବେଲା ଲକୁ କଶଟା ହାତି କାରାତା ଝେହାହାଚେରି, ଅଡେ ଇ ସାସ୍ତି ଲାକ ଅଦିକାରା ମାନି ମାହାପୁରୁ ଦରୁତି ନିନ୍‌କାକିତେରି □ ସାମା ହିୟାଁ ବାଦଲି କିହାଁ ଏଝାଣି ଗାଝୁରମି କିଆତେରି □

୧୦ ପାସା ଲମ୍ବର ଦୂତୁ ତାନି ଗିନାତା ମାଚାଣି ଜନ୍ତତି ସିଂଗାସାଣି ଲାକ ଝାକ୍‌ହେସି, ଜନ୍ତତି ରାଜିତା ଆନ୍ଦେରି ଆହାହାଚେ, ଇଞ୍ଜା ଲକୁ କସ୍ତଲେ ତାନି ଝେନ୍‌ରିକା କାଟା କଡିତେରି □

୧୧ ଅଡ଼େ ଏଝାରି ଆଙ୍ଗାତି ରାଣାରାକା ତାକି ଇଞ୍ଜା ପଟ୍ଟକାୟାଁ ବୀସା ତାକି ଲାକପୁରୁତି ମାହାପୁରୁଇଁ ବାକା ଇଟିତେରି □ ସାମା ତାନି ଲାଗେଏତି କାମାଟି ମନ ଝେଟ୍‌ଆତେରି □

୧୨ ସ ଲମ୍ବର ଦୂତୁ ତାନି ଗିନାତା ମାଚାଣି ପରାଡ଼ କାଜା କାଡ଼ା ଲାକ ଝାକ୍‌ହେସି, ଏ କାଡ଼ାତି ଏୟୁ ଝାୟାହାରୁ, ଝେଡ଼ା ହପୁ ଝାକିଟି ଝାହିମାନି ରାଜାୟାକି ଜିରୁ ପାରଲିଆତେ □

୧୩ ଏଚେଟିଏ ନାନୁ ମେସ୍‌ସେଏଁ, ପାନାୟାଲେହେଁ ତଞ୍ଜାଆହିମାନି ତାନିଗଟା ଲାଗେଏତି ଜୀଝୁୟାଁ □ ଏଝି ରାରୁ ଗୁତିଟି, ଜନ୍ତ ଗୁତିଟି, ମିତି ବଲ୍ଲୁ ଝେହନାରି ଗୁତିଟି ହଟାଝାହିମାରୁ □

୧୪ ଏ ଲାଗେଏତି ଜୀଝୁଗାଟି ବୁଡୁୟାଁ କାବାଆନ୍ତି କାମା କିହାଲି ଆଡ଼ିନୁ, ଏଝି ବାଡ଼ୁୟୁ ଗାଟି ମାହାପୁରୁତି ଦିନାତା ଜୁଜୁ କିହାଲିତାକି ଦାରୁତିତି ରାଜାୟାଣି କୁଡ଼ିକିହାଲି ହାଟାହାରୁ □

୧୫ ☆“ଝେଞ୍ଜୁ! ନାନୁ ସରୁଲେହେଁ ଝାକ୍‌, ଆମ୍ବାଆସି ଜାଗ୍ରାତା ଆହାଁ ସରୁ ତାଣାଟି ଜାହାରା ହିମ୍ବରିକା ଡ଼କୁହାଲି ଆଡ଼ିମାନେସି, ଏଝାସି ନେହେଁ □ ଏଝାସି ନାଗୁଡ଼ା ଆହାଁ ରେଅସି, ଅଡ଼େ ଏଝାସି ଲାଜା ବେଟାଆଅସି □”

୧୬ ପଲ୍ଲଆ ଜୀଝୁୟାଁ ଏ ବେଲାତା ଦାରୁତିତି ରାଜାୟାଣି ଆମିନି ଗାୟୁତା କୁଡ଼ିକିତୁ ଏବୁ ହାଡ଼ାତଲେ ଏଦାନି ଦରୁ ଆର୍ମାଗାଡେନ □

୧୭ ସାତା ଲମ୍ବର ଦୂତୁ ତାନି ଗିନାତା ମାଚାଣି ଗାଲି ଲାକ ଝାକ୍‌ହେସି, ଏଚେଟିଏ ଦେଝୁଡ଼ିତି ସିଂଗାସାଣିଟି ର କାଜା ହାଡ଼ା ଝେଜାତେ, “ଇଦାଆଁ କିଝିଆତେ!”

୧୮ ☆ଦେବୁଣିଏ ବିଲିବାଲା ଆହୁଁ ମୁଁସ୍ତେ ଇଞ୍ଜା ହାଗୁ ଗୁଣ୍ଡି ହାଡ଼ା ଆଡ଼େ, ଇଞ୍ଜା ହାରେକା ବୁମି ଝାଡ଼ିତେ, ଇଟିହୁଁ ଦାରୁତିତା ମାଣସିୟାଁ ଗାଡ଼ିଆଡ଼ି ଦିନାଟିଏ ଏଚେଲାଝା ଇଲେତି ବୁମି ଝାଡ଼ାହିଲାଆତେ, ଇଦି ବାରେକିହାଁ ଆଜିହପେତି ବୁମି ଝାଡ଼ିନାୟି ମାତେ □

୧୯ ଏମ୍ବାଟିଏ ଏ କାଜା ଗାଡ଼ା ତାନି ବାଗା ତଲେ ବାଗା ଆଡ଼େ ଅଡ଼େ ଦାରୁତିତି ବାରେ ଗାଡ଼ାୟାଁ ବିଡ଼ହାହାରୁ, ଅଡ଼େ କାଜା ଗାଡ଼ା

☆ ୧୬:୧୫ ୧୬:୧୫ ମାତି ୨୪:୪୩,୪୪; ଲୁକ ୧୨:୩୯,୪୦; ଝେ ବଲ୍ଲୁ ୩:୩ ☆ ୧୬:୧୮ ୧୬:୧୮ ଝେ ବଲ୍ଲୁ ୮:୫; ୧୧:୧୩,୧୯

ବାବିଲନତି ମାହାପୁରୁ ବାଣା ଆହା ହିଲୀଆତେସି, ଏଝାସି ତାନି  
ଗହନି ସଲୀତି ତାନି ହାରେକା କପାଗାଟି କାଡ଼ୁ ଏଦାଣି ଉର୍ହେସି  
□

୨୦ ✨ସାମଦୁରି ମାଦି ମାନି ଦେସାୟା ମେଣ୍ଟାହାତୁ ଇଞ୍ଜା ହରକା  
ବାରେ ଡଗୁା ହାତୁ □

୨୧ ✨ରୀ କଡ଼ି ଦସ କେଜି ବଜୁଗାଟି ଆଜିୟା ହାଗୁ ଲାକଟି  
ମାଣସିୟା ଲାକ ରିତୁ, ଲକୁ ଇ ମରଡ଼ି ତାକି ମାହାପୁରୁଇଁ  
ନିନ୍ଦାକିତେରି □

## ୧୭

### ଝେକ୍ତି ଦାରେଣି

୧ ଏମ୍ବାଟିଏ ସାଡ଼ାଗଟା ଗିନାୟା ଆସାମାନି ଦୁତୁ ବିତ୍ରାଟି ରଅସି ନା  
ଡାଗେ ଖାହାନା ଏଲେଇଞ୍ଜାତେସି, “ଇମ୍ବାଆଁ ଖାମୁ ହାରେକା କାଡ଼ା  
ଦାରି ଗାଡ଼ି ଆହାମାନି ଦାରେଣି ଲେହେଁତି କାଜା ଗାଡ଼ା ଏନି ସାସ୍ତି  
ବେଟାଆନେ ଏଦାଆଁ ତସ୍ତାଇଁ □

୨ ଦାରଡ଼ିତି ରାଜାୟା ଏ ଦାରେଣି ତଲେ ଦାରିକାମା  
କିହାମାନେରି, ଇଞ୍ଜା ଦାରଡ଼ିତା ବାସା ଆହାମାନାରି ବାରେ ଦାରି  
କାମାଲେହେଁତି କାଡ଼ୁ ଗୁସାହାଁ ହରାମାନେରି □”

୩ ✨ଏଚିବେଲାତା ସୁଦୁଜୀଝୁ ନା ତାଣା ଖାଡ଼େ ଇଞ୍ଜା ଏ ଦୁତୁ ନାଜେ  
ବାଃଲି ବୁମିତା ଅୟାତେସି □ ଏମ୍ବାଆଁ ନାନୁ ମେସ୍ତେସ୍, ର ପାଟୁ  
ଝାଣାଗାଟି ଜନ୍ତ ଲାକ ର ଇୟା କୁଗାମାରେ □ ଏ ଜନ୍ତୁଟି ଆଜ୍ଞାତା  
ମାହାପୁରୁ ନିନ୍ଦାକିନି ଦରକା ରାସ୍କି ଆହାମାତୁ, ଅଡ଼େ ଏଦାନାକି  
ସାଡ଼ାଗଟା ତାର୍କା ଇଞ୍ଜା ଦସଗଟା କମ୍‌କା ମାତୁ □

୪ ଏ ଇୟା ହେୟା ଲେହେଁତି ଝାଣା ଅଡ଼େ ପାଟୁ ଝାଣାଗାଟି ହିମ୍ବୁରି  
ହୁଟାମାରେ, ଇଞ୍ଜା ଏଦି ବାଂଗାରା ଅଡ଼େ ଗାଡ଼ି ଦାରାଗାଟି ମଣି,  
ମୁକ୍ତା ତଲେ ସାଜୁ ଆହାମାରେ, ତାନି ନାଡ଼ିକିନି ପାଡ଼େୟିକା ଲେହେଁ  
ଅପାଆଗାଟି ଦିଣ୍ଟୁ ଇଞ୍ଜା ଦାରିକାମା କିନି ଲାଗେଏତି କାମା ତଲେ  
ନେଞ୍ଜାମାନି ର ବାଂଗାରା ଗିନା ଏଦି ଆସାମାରେ □

☆ ୧୭:୨୦ ୧୭:୨୦ ଝେ ବଲ୍ଲ ୭:୧୪ ☆ ୧୭:୨୧ ୧୭:୨୧ ଝେ ବଲ୍ଲ ୧୧:୧୯ ☆ ୧୭:୩  
୧୭:୩ ଝେ ବଲ୍ଲ ୧୩:୧

୫ ଏଦାନି ମୁଞ୍ଚୁତା ଡଗ୍ଗାମାନି ର ଦରୁ ରାସ୍ତକି ଆହାମାତେ, “କାଜା ଗାଡ଼ା ବାବିଲନ ଦାରତତି ବାରେ ଦାରି ଇଞ୍ଜା ଅପାଆଗାଟି କାମାତି ତାଲି □”

୬ ନାନୁ ଅଡ଼େ ମେସ୍ତେଏଁ, ଏ ଆୟାଟି ମାହାପୁରୁ ଲକୁ ଇଞ୍ଜା ଜୀସୁ ତାଣା ମାନି ତଲେ ମାଞ୍ଜା ସାକି ହୀହାନା ହାହାମାନି ଲକୁତି ନେତେରି ଗସାନା ହରାମାତେ □ ନାନୁ ଏଦାନି ମେସାନା ହାରେକା କାବା ଆଡ଼େଏଁ □

୭ ଅଡ଼େ ଦୂତୁ ନାଜେ ଏଲେଇଞ୍ଜାତେସି, “ଏନାଆଁତାକି କାବା ଆହିମାଞ୍ଜି ? ନାନୁ ଏ ଆୟାଟି ଅଡ଼େ ସାତା ଗଟା ତାର୍କା ଇଞ୍ଜା ଦସଗଟା କମକା ଗାଟି ଏଦାଣି ଡେକାମାନି ଜନ୍ତୁତି ଡଗ୍ଗାମାନି କାତା ନାନୁ ନିଜେ ଝେସିମାଞ୍ଜାଇଁ, ଝେନାମୁ □

୮ ✧ଜନ୍ତୁ ର ଦିନା ନୀତାମାତେ; ନୀଏଁ ଅଡ଼େ ନୀତାହିଲେଏ, ସାମା ତବେ ତାଡ଼େପୁରୁଟି ନିଜା ଖାନ୍ନେ ଇଞ୍ଜା ଅର ଦେବା ନାସା ଆନ୍ନେ □ ଦାରତି ଗାଡ଼ି ଆଡ଼ି ନକେଏ ଆମ୍ବାଆରି ଦରୁ ଜୀଞ୍ଜୁତି ପତିତା ରାସ୍ତକି ଆହାହିଲେଏ, ଦାରତିତା ବାସାଆହାମାନି ବାରେ ଲକୁ ଜନ୍ତୁଇଁ ମେସାଁ କାବାଆନ୍ନେରି □ ଏଦି ର ଦିନା ନୀତାମାତେ, ନୀଏଁ ଅଡ଼େ ହିଲେଏ, ସାମା ଅଡ଼େ ର ଦେବା ତଞ୍ଜାଆନ୍ନେ □”

୯ “ଇ ବାରେ କାତା ତେଲହାଲି ତାକି ବୁଦି ଲଡ଼ାମାନେ □ ଜନ୍ତୁତି ସାଡ଼ାଗଟା ତାର୍କା ସାତେଏ ସାଡ଼ାଗଟା ହରକା, ଆମିନି ଲାକ ଆୟାଟି କୁଗାମାନେ □ ଏଞ୍ଜାରି ଜିକେଏ ସାଡ଼ା ଜାଣା ରାଜାୟାଁ ଲେହେଁ □

୧୦ ଏଞ୍ଜାରି ବିତ୍ରାଟି ପାସାଜାଣା ମେଶ୍ଟା ହାଜାମାନେରି, ନୀଏଁ ରଅସି ମାନେସି, ଅଡ଼େ ରଅସି ନୀଏଁ ପାତେକା ଖାହାହିଲଅସି, ଏଞ୍ଜାସି ଖାଡ଼ିସାରେ ଗାଡ଼େକା ତାକିଏ ସାଲଞ୍ଜି କିନେସି □

୧୧ ଅଡ଼େ ଆମିନି ଜନ୍ତୁ ର ଦିନା ନୀତାମାତେ, ଏଦି ଆଟା ଲମ୍ବର ରାଜା, ଏ ବାରେ ରାଜାୟାଁ ବିତ୍ରାଟି ରଅସି ଇଞ୍ଜା ଏଞ୍ଜାସି ଜିକେଏ ତବେ ନାସା ଆନ୍ନେସି □”

୧୨ “ମୀରୁ ମେସାମାନି ଦସଗଟା କମକା, ଦସ ଜାଣା ରାଜାୟାଁ ଲେହେଁ, ଏଞ୍ଜାରି ନୀଏଁ ପାତେକା ସାଲଞ୍ଜି କିହାହିଲଅରି □ ସାମା

ଜନ୍ମ ତଳେ ସାଲୁକି କିହାଲିତାକି ର. ଗଂଟା ତାକି ଏଝାରାକି ବାଡ଼ୁୟୁ  
ହୀପୁକିଆନେ □

୧୩ ଏଝାରି ରଣ୍ଡିଏ ଅଣ୍ଟପୁ ତଳେ ମାଞ୍ଜାନା ତାମି ବାଡ଼ୁୟୁ ଅଡ଼େ  
ଅଦିକାରା ଏ ଜନ୍ମକି ହୀନେରି □

୧୪ ଏଝାରି ମେଣ୍ଡା ତାଲୁ ତଳେ ଜୁକୁ କିନେରି, ଅଡ଼େ ମେଣ୍ଡା ତାଲୁ  
ଏଝାରାଇଁ ଜୀଣା ଆନେ, ଇଚିହଁ ଏଝାସି ପ୍ରବୁ କିହଁ ପ୍ରବୁ ଅଡ଼େ  
ରାଜା କିହଁ ରାଜା, ଅଡ଼େ ଆମିନି ଗାଟାରି ଏଝାଣିତଳେ ମାନେରି  
ଏ ହାଟାମାନାରି, ଆଟାମାନାରି ଅଡ଼େ ନାମୁଗାଟାରି ଜିକେଏ ଜୀଣା  
ଆନେରି □”

୧୫ ଦୁତୁ ନାଙ୍ଗେ ଅଡ଼େ ଏଲେଇଞ୍ଜାତେସି, “ନୀନୁ ଆମିନି ଏୟୁଣି  
ମେସି, ଆମିନି ଲାକ ଏ ଦାରେଣି କୁଗାମାନେ, ଏଦି ଆହିମାନେ  
ଏଟକା ଏଟକାତି ଦେସା, କୂଡ଼ା, ଗଚି ଇଞ୍ଜା ହାଡ଼ାଗାଟି କୁଲମି □

୧୬ ନୀନୁ ମେସାମାନି ଦସଗଟା କମକା ଇଞ୍ଜା ଏ ଜନ୍ମ, ଦାରେଣିନି  
ଅପାତ; ଏଝି ଏଦାନି ତାଣାଟି ବାରେ ପିସ୍ପିକିହା ଅହାନା ନାଗଡ଼ା  
କିହାନା ପିହ୍ନୁ □ ଏଝି ଏଦାନି ଉଞ୍ଜା ତିଞ୍ଜାନା ହିରୁତା ହୁଡ଼ାନା ନାସା  
କିନୁ □

୧୭ ଏନାଆଁତାକି ଇଚିହଁ, ମାହାପୁରୁ ତାନୁ ଅଣପାମାନାଣି  
କିହାଲିତାକି ଏଝାଆଁତାକି ଇ ଅଣ୍ଟପୁ ହୀହାମାନେସି □ ଏଝି ରଣ୍ଡିଏ  
ମନ ଆହାନା କାମା କିନୁ ଇଞ୍ଜା ମାହାପୁରୁତି ବଲ୍ଲୁ ସାତାତଳେ  
ଆଆପାତେକା ରାଜିତି ସାଲୁକି କିନି ବଜୁ ଏ ଜନ୍ମ କେୟୁତା  
ପିସାହୀନେସି □”

୧୮ “ଇଞ୍ଜା ଆମିନି ଆୟାଟି ମେସି, ଏଦି ଆହିମାନେ, ଦାର୍ତ୍ତିତି  
ରାଜାୟାଣି ସାଲୁକି କିହିମାନି ଏ କାଜା ଗାଡ଼ା □”

## ୧୮

### ବାବିଲନ ନାସା ଆନାୟି

୧ ଏତେଟିଏ ନାନୁ ଅଡ଼େ ର. ଦୁତୁଇଁ ଲାକପୁରୁତି ରେଟା  
ଝାହିମାଟାଣି ମେସେସି; ଏଝାସି କାଜା ଅଦିକାରା ଗାଟାସି, ତାନି  
ଗାଝୁରମି ତାକି ଦାର୍ତ୍ତି ବାରେ ଉଜେଡ଼ି ଆହାହାଟେ □



୨ ☆ ଏଝାସି କାଜା ହାଡ଼ାତଲେ କାଲ୍ଲି ଆହୁଁ ଏଲେଇଚେସି,  
 “କାଜା ଗାଡ଼ା ବାବିଲନ ମେଣ୍ଡିଙ୍ଗିତେ! ଏଦି ବାରେ ମେଣ୍ଡିଙ୍ଗିତେ!  
 ଏଦି ବୁଡୁୟା ବାସାଟାୟୁ ଅଡେ ପଲ୍ଲଆ ଜୀଝୁୟା ଅଡେ ପଲ୍ଲଆ  
 କାମାୟା, ଇଞ୍ଜା ଅପାଆଗାଟି ପଟାୟାତି ବାସାଟାୟୁ ଆହାମାନେ □

୩ ଇଚିହୁଁ ବାରେ ଜାଡ଼ିତାରି ତାନି ଦାରି କାମାଲେହେଡି  
 କାଡୁ ଗସାମାନେରି, ଦାରତିତି ରାଜାୟା ତାନିତଲେ ଦାରିକାମା  
 କିହାମାନେରି, ଅଡେ ଦାରତିତି ବେବାରା ଗାଟାରି ତାନି ଜୁପ୍‌କାଟି  
 ବାଡକୁ ଗାଟାରି ଆହାମାନେରି □”

୪ ଏଚେଟିଏ ନାନୁ ଲାକପୁରୁଟି ଅଡେ ର ହାଡ଼ା ଏଲେ ଇଞ୍ଜିମାନାଣି  
 ଝେଚେଏଁ,

“ଏ ମା ଲକୁଚେରି! ଏଦାଆଁତାକି ଏଦାନି ତାଣାଟି ହଡ଼ା ଝାଦୁ!

ମୀରୁ ଏନିକିଁ ଏଦାନି ପାପୁତା ଆଣୁଅତେରି;

ଇଞ୍ଜା ତାନି ତଣ୍ଡୁତି ବାଗା ବେଟାଆଅତେରି;

୫ ଏଦାଆଁତାକି ଇଚିହୁଁ ଏଦାନି ପାପୁ ବାରେ ଲାକପୁରୁ ପାତେକା  
 ଏଜାମାନେ,

ଅଡେ ଏଦି କିହାମାନି ଲାଗେଏଡି କାମା ମାହାପୁରୁ ମନତା  
 ଅଣ୍ଡପାମାନେସି □

୬ ଏଦି ମିଙ୍ଗେ ଏନି କିହାମାଞ୍ଜାନେ ଏଲେକିଁ ମୀରୁ ଏଦାନାକି କିଦୁ;  
 ତାନି କିହାମାନାଣି କିହାଁ ରୀ ଗୁଣୁ ଝେଟ୍‌ଦୁ,

ଏଦି ଆମିନି ସଲାତା କାଡୁ ଆଟ୍‌ହାମାନେ,

ଏମାଆଁ ରୀ ଗୁଣୁ କାଡୁ ତାନି ସଲାତା ଆଟ୍‌ଦୁ □

୭ ଏଦି ଏଚେକା ତାନି ଗାଝୁରମି କିହାମାନେ ଅଡେ ବତପଣ ତଲେ  
 ମାଞ୍ଜାମାନେ,

ଏଲେକିଁ ଏଦାନାକି ଦୁକୁ କସ୍ତ ହୀଦୁ;

ଏଦାଆଁତାକି ଇଚିହୁଁ ଏଦି ଜାହାରାଇଁ ମନତା ଝେସା କଡିମାନେ,

‘ନାନୁ ରାଣି ଆହାଁ କୁଗାମାଇଁ,

ନାନୁ ରାଣ୍ଡେଣିତେଏଁ ଆଏ,

ନାଙ୍ଗେ ଏଚେଲାଝା ଦୁକୁ କିହାଲି ଆଏ □’

୮ ଇଦାଣିତାକି ର ଦିନା ବିତ୍ରା ତଣ୍ଡୁ ପାଣ୍ଡନେ,

ଇଚିହଁ ହାକି, ଡାକି, ଅଡ଼େ କାରଖୁ ଆନେ,  
 ଅଡ଼େ ଏଦି ହିରୁଡ଼ା ଝେହାହାନେ,  
 ଇଚିହଁ ଏଦାନି ନୀହାଁୟି କିନାସି ପ୍ରବୁ ମାହାପୂରୁ ବାରେ  
 ବାଡ଼ୟୁ ଗାଟାସି □”

୯ ଦାରତିତି ବାରେ ରାଜାୟାଁ ତାନିତଲେ ଦାରିକାମା କିହାନା  
 ରାହାଁଟି ନୀଡ଼ାମାନେରି, ଏଞ୍ଜାରି ଏଦାନି ହୃଡ଼ିମାନି ହିରୁ ବୟୁ  
 ମେହନେରି, ଇଞ୍ଜାଁ ଏଦାନି ତାକି ଦୁକୁ ଆହାଁ ଡ଼ାନେରି;

୧୦ ଏଞ୍ଜାରି ଏଦାନି କାକୁଲିଟି ଆଜିତାକି ହେକ ନିଚାନା  
 ଏଲେଇନେରି, “ଆୟଡ଼ା, ଆୟଡ଼ା, କାଜା ଗାଡ଼ା, ବାଡ଼ୟୁ ଗାଟି  
 ଗାଡ଼ା ବାବିଲନ ନୀନୁ ବାକା ପଣ୍ଡନାତି, ଇଚିହଁ ରଣ୍ଡିଏ ଗଂଟା ବିତ୍ରା  
 ନୀ ଡ଼ଣ୍ଡି ଝାଡ଼େ □”

୧୧ ଅଡ଼େ ଦାରତିତି ବେବାରା ଗାଟାରି ଏଦାନି ତାକି ଦୁକୁ ଆହାଁ  
 ଡ଼ାନେରି, ଏନାଆଁତାକି ଇଚିହଁ ଆମ୍ବାଆରି ଏଞ୍ଜାରି ପାର୍ଦନି ଦିଶ୍‌ସୁ  
 କଡ଼ଅରି,

୧୨ ଇଚିହଁ ବାଂଗାରା, ଝେଣ୍ଡି, ଦାରା ଗାଟି ମଣି ଅଡ଼େ ମୁଲ୍ଲାୟାଁ,  
 ସିଲ୍ଲକୁ ହିମ୍ବରିକା, ହେୟାଁ ଝାଣାଗାଟି ହିମ୍ବରିକା, ପାଟୁ ହିମ୍ବରିକା,  
 ଏଟକା ଏଟକାତି ଅଜିତି ହିମ୍ବରିକା, ଚନ୍ଦନ ଇଞ୍ଜାଁ ଏଦାନି ଲେହେଁତି  
 ଗାନ୍ଦା ଗାଟି ମାରକା, ହାତି ପାଲକା, ଦାରା ଗାଟି ଝେସକା, ପିତାଡ଼ା,  
 ଲହ, ଅଜିତି ଡ଼ସୁପା ଝାଲକାତଲେ କେପିତି ବାରେ ଆସି □

୧୩ ଡ଼ାକନି ସାଲି, ଗାନ୍ଦାଗାଟି ଆସି, ଦୁପଣି, ଗାନ୍ଦାଗାଟି ରୁବିନି  
 ନିୟୁଁ, ଗାନ୍ଦାଗାଟି ଦୁପଣି, କାଡ଼ୁ ନିୟୁଁ, ଗୁଣ୍ଡା, ଗହଁ, କଡ଼ିୟାଁ,  
 ମେଣ୍ଡାୟାଁ, ଗଡ଼ାୟାଁ, ରାତାୟାଁ, କଡ଼ାମାନି ହଲିୟାଙ୍ଗା, ଅଡ଼େ  
 ମାଣସିୟାତି ଜୀଝୁ □

୧୪ “ନୀ ଜୀଝୁତି ଜୁପକା ଗାଟି ଅଣ୍ଡପୁତି ପାଡ଼େୟିକା ନୀ ତାଣାଟି  
 ମେଣ୍ଡାଙ୍ଗା ହାରୁ, ଅଡ଼େ ବାରେ ଡ଼ାକନାୟି, ରାହାଁତି ବାରେ ନୀ ତାଣାଟି  
 ଏଟକା କିଞ୍ଜି ଆହାଁ ନାସା ଆହାମାନେ, ଅଡ଼େ ଏତେଲାଞ୍ଜା ଏ ବାରେ  
 ମେଡ଼ା ଆୟେଏ □”

୧୫ ଇ ବାରେ ଦିଶ୍‌ସୁତି ବେବାରା କିନାରି ଏ କାଜା ଗାଡ଼ା ତଲେ  
 ବାଡ଼କୁ ଗାଟାରି ଆହାମାରେରି, ଏଞ୍ଜାରି ଏଦାନି କସ୍ତୁତି ଆଜିତାକି  
 ହେକ ନିଚାନା ଦୁକୁତଲେ ଡ଼ାହଁ ଏଲେଇନେରି □

୧୭ “ଆୟତା! କାଜା ଗାଡ଼ାତି! ନିଙ୍ଗେତାକି ଏତେକା ଆଜିହପେତି କସ୍ତୁ ଖାଡ଼େ, ନାନୁ ଅଜିତି ହିମ୍ବରିକା, ହେୟାଁ ଖାଣାଗାଟି ହିମ୍ବରିକା, ପାରୁ ହିମ୍ବରିକା ହୁରାମାଟି, ଅଡ଼େ ବାଂଗାରା, ଦାରାଗାଟି ମଣି ଇଞ୍ଜା ମୁନ୍ଧାୟାଁ ତଲେ ମିଶ୍‌ସି ମାଟି ସାଜୁୟାଁ ତୁରହାମାଟି □

୧୭ ଇଚିହଁ ରଣ୍ଡିଏ ଗଂଟା ବିତ୍ରା ଏ ବାରେ ଦନ ମେଣ୍‌ଙ୍ଗାହାଚେ □

ଏୟୁ ଜାଜାୟାଁ ସାଲ୍‌ଖି କିନାରି ଏମ୍‌ଆଁ କୁଗାମାନାରି ତଂଗାଁୟାଁ ସାଲ୍‌ଖି କିନାରି ଇଞ୍ଜା ସାମ୍‌ଦୁରିତା ଇତାଲା ଆତାଲା ରେଜିହଁ ବେବାରା କିନାରି ହେକ ନିଚାନା,

୧୮ ଏ ଗାଡ଼ାତି ହୁଡ଼ିମାନି ହିରୁ ବୟଁ ମେସାନା କାଜା ଗିୟାଁତଲେ ଏଲେଇନେରି, ଇ କାଜା ଗାଡ଼ା ଲେହେଁ ଆମିନି ଗାଡ଼ାମାନେ □

୧୯ ଏଞ୍ଜାରି ତାମି ତାକାଁ ଲାକ ଦୁଡ଼ି ତାଞ୍ଜା କତାନା ଦୁକୁତଲେ ତୀହି ତୀହି ଏଲେଇଚେରି, ଆୟତା ଏ କାଜା ଗାଡ଼ାତି, ନିଙ୍ଗେ ଏତେକା ଆଜିହପେତି ତଣ୍ଡି ଆଡ଼େ, ନୀ ବାଡ଼କୁ ତଲେ ସାମ୍‌ଦୁରିତି ଜାଜାଣା ରେଜିହଁ ବାଡ଼କା ମାଚେରି, ନୀଏଁ ରଣ୍ଡିଏ ଗଂଟା ବିତ୍ରା ଏ ବାରେ ମେଣ୍‌ଙ୍ଗାହାଚେ □”

୨୦ ଲାକପୁରୁ, ମାହାପୁରୁ ଲକ୍ଷ୍ମ, ପାଣ୍ଡୁଖି ଆହାମାନାଚେରି, ମାହାପୁରୁ ଅଣ୍‌ପୁଡ଼ି ବଲ୍ଲୁ ଝେହ୍‌ନାଚେରି, ମୀରୁ ଏଦାନି ନାସା ଆନାଣି ତାକି ରାହାଁ ଆଦୁ, ଏନାଆଁତାକି ଇଚିହଁ ମାହାପୁରୁ ମିଙ୍ଗେ କିହା ମାଞ୍ଜାନାଣି ତାକି ବାଦୁଲି ଅହାମାନେସି □

୨୧ ଏଚେଟିଏ ତାୟୁ ର କାଜା ଦୁଡ଼ୁ, ର ଜେତାଞ୍ଜାଲି ଲେହେଁତି ର ଞ୍ଜାଲି ସାମ୍‌ଦୁରି ଲାକ ମେଡ଼ହାନା ଏଲେଇଚେସି, “ଇଲେକଁ କାଜା ଗାଡ଼ା ବାବିଲନ ମେଡ଼ପି ଆନେ, ଅଡ଼େ ଏଡ଼ି ଏଚେଲାଞ୍ଜା ତଞ୍ଜା ଆଏ □

୨୨ ସେରଙ୍ଗିୟାଁ ଅଡ଼େ ପାଡ଼ିନାରି ହାଡ଼ା, ପୀରୁଡ଼ି ଉକିନାରି, ତୀଡ଼ି ଉକିନାରି ହାଡ଼ା ଏଚେଲାଞ୍ଜା ଏଦାନି ତାଣା ଝେଙ୍ଗେଏ, ନେହଁ ନେହଁ ସାଜୁ ଇଞ୍ଜା ଏଟକାତି ଆସ୍ତି କେପିନାରି ନୀ ତାଣା ତଞ୍ଜା ଆଅରି, ଅଡ଼େ ଜେତାଞ୍ଜାଲକା ତଲେ ନୁୟଁ ନାୟି ଏଚେଲାଞ୍ଜା ହାଡ଼ା ଝେଙ୍ଗେଏ □

୨୩ ଦୀର୍ଘଯାତି ଉଜେଡ଼ି ନୀ ତାଣା ଏଚେଲ୍‌ଆଞ୍ଜା ଡ଼ୀଞ୍ଜେଏ, ବୀହା ଆନି ମାୟ୍‌କା ଅଡ଼େ ବୀହା ଆନି କକାରି ହାଡ଼ା ନୀ ତାଣା ଏଚେଲ୍‌ଆଞ୍ଜା ଝେଜେଏ, ଏନାଆଁତାକି ଇଚିହିଁ ନୀ ତାଣା ବେବାରା କିନାରି ଦାରତିତା କାଜାରି ମାଚେରି, ଅଡ଼େ ନୀ ମାୟାମତ୍ତରତା ବାରେ କୃଡ଼ାତି ଲକୁ ମୁଞ୍ଜା ହାଜାମାଚେରି □”

୨୪ ଗାଡ଼ାତା ମାହାପୁରୁ ଅଣ୍‌ପୁତି ବଲ୍ଲୁ ଝେହ୍‌ନାରି, ମାହାପୁରୁ ଲକୁ, ଇଞ୍ଜା ଦାରତିତା ପାୟ୍‌ଞ୍ଜିଆହାମାନି ଲକୁତି ନେତେରି ଏଦାନି ତାଣା ତଞ୍ଜାଆହାମାଚେ □

## ୧୯

୧ ଏଚେଟିଏ ଲାକପୁରୁ ର କାଜା ମାୟା ଲକୁତି ହାଡ଼ାଲେହେଁତି ର କାଜା ହାଡ଼ା ଏଲେଇଞ୍ଜିମାଚାଣି ଝେଚେଏ, “ହାଲେଲୁୟା! ଗେଲ୍‌ପିନି, ଗାଞ୍ଜୁରମି ଅଡ଼େ କାଜାପାଣା ମା ମାହାପୁରୁଞ୍ଜାୟି □

୨ ଇଚିହିଁ ଏଞ୍ଜାଣି ନୀହାୟି ସାତା ଅଡ଼େ ନେହାୟି, ଆମିନି କାଜା ଦାରେଣି ତାନି ଦାରିକାମା ତଲେ ଦାରତିତି ଲକୁଣି ପଲ୍ଲଆ କିହାମାଚେ, ମାହାପୁରୁ ଏଦାନି ତଣ୍ଡ ହାହାନା ତାନି ହଲ୍ଲିୟାଙ୍ଗାଣି ପାୟିତି ନେତେରିତି ବାଦୁଲି ଅଡ଼େସି □”

୩ ଅଡ଼େ ଏଞ୍ଜାରି ରୀ ପାଲି ଏଲେଇଚେରି “ହାଲେଲୁୟା! ଏ ଗାଡ଼ା ଝେହିମାନି ବୟ୍‌ କାଲାକାଲାତାକି ହଚେମାନେ □”

୪ ଏଚେଟିଏ କଡ଼େ ସାରି ଜାଣା ପ୍ରାଚିନାଙ୍ଗା ଅଡ଼େ ସାରିଗଟା ଜନ୍ତୟା ମୁନୁ କୁତାନା ସିଂଗାସାଣିତା କୁଗାମାନି ମାହାପୁରୁଇଁ ଜହରା କିହାନା ଏଲେଇଚୁ, “ଆଫେନ୍ ହାଲେଲୁୟା □”

### ମେଣ୍ଡା ତାଲୁତି ବୀହା ବଜି

୫ ଏଚିବେଲା ସିଂଗାସାଣିଚି ର ହାଡ଼ା ହଚାନା ଝେଜିତେ, “ଏ ମାହାପୁରୁତି ହଲ୍ଲିୟାଙ୍ଗାଚେରି, ଏଞ୍ଜାଣାଇଁ ଆଜିନି କାଜାରି ଇଚାରି ବାରେଜାଣା ଚେରି ମୀରୁ ମାହାପୁରୁଇଁ ଜହରା କିଦୁ □”

୬ ଅଡ଼େ ନାନୁ କାଜା ମାୟା ଲକୁ ଲେହେଁତି ହାଡ଼ା, ଲଦ ଲଦ ରିହିମାନି ଏୟୁ ଲେହେଁତି ହାଡ଼ା, ଅଡ଼େ ହାଗୁ ଗୁଣ୍‌ହିମାନି କାଜା ହାଡ଼ାଲେହେଁ ଏଲେଇଞ୍ଜି ଝେସିମାନାଣି ଝେଚେଏ, “ହାଲେଲୁୟା!

ଇତିହିଁ ପ୍ରଭୁ ମା ବାଡ଼୍‌ୟୁଗାଟି ମାହାପୁରୁ ରାଜା ଆହାନା ପାଣା  
ବେଟା ଆହାମାନେସି □

୭ ଖାଦୁ ମାର ରାହାଁ ଆନ, ଇଞ୍ଜା ଏଝାଣି ଗାଝୁରମି ତାକି ଏଝାଣାଇଁ  
ଜହରା କିନ, ଏନାଆଁତାକି ଇତିହିଁ ମେଣ୍ଡା ତାଲୁତି ବାହା ଆନି ଦିନା  
ଏଦାତେୟିଏ, ଇଞ୍ଜା ଏଝାସି ବାହା ଆନି ମାଙ୍ଗା ତିୟାରା ଆହାମାନେ  
□

୮ ଏଦାନାକି ମ୍ଲିହୁନି ଅଡ଼େ ଅପ୍‌ନି ହିମ୍‌ରି ହୁଚାଲି ହାପକି ଆତୁ;”  
ଏ ଦବ୍‌ଲା ହିମ୍‌ରି ଇତିହିଁ ମାହାପୁରୁ ଲକୁତି ଦାମ୍‌ କାମାୟାଁ □

୯ ☆ଏତିବେଲା ଦୁତୁ ନାଙ୍ଗେ ଏଲେଇଞ୍ଜାତେସି, “ରାଗାମୁ, ଆମିନି  
ଗାଗାରି ମେଣ୍ଡା ତାଲୁତି ବାହା ବକିତା ହାଟକି ଆହାମାନେରି,  
ଏଝାରାକି ନେହେଁ □” ଅଡ଼େ ଏଝାସି ନାଙ୍ଗେ ଏଲେଇଞ୍ଜାତେସି, “ଇ  
ବାରେ ମାହାପୁରୁତି ସାତା ବଲ୍ଲୁ □”

୧୦ ଏଚେଟିଏ ନାନୁ ଏଝାଣାଇଁ ଜହରା କିହାଲି ତାନି କଡାୟାଁ ତୁଇ  
ରିତେସି, ଏଚେଟିଏ ଏଝାସି ନାଙ୍ଗେ ଏଲେଇଞ୍ଜାତେସି, “ଜାଗ୍ରାତା,  
ଇଲେ କିଆନି, ନାନୁ ଜାସୁ ଅଡ଼େ ମୀ ସାକି ଇଞ୍ଜା ମୀ ତାୟାୟାଁ ତଲେ  
ର ହରେଏଣା ଲେହେଁ; ନାନୁ ମାହାପୁରୁଇଁ ଜହରା କିମ୍‌,” ଜାସୁତି  
ସାକି ଏଡ଼ି ସାତା, ମାହାପୁରୁ ବଲ୍ଲୁ ଝେହ୍‌ନାରି ଜାଝୁ □

### ଦବ୍‌ଲା ଗଡ଼ା ମୁହେଁ କୁଗାମାନସି

୧୧ ଏଚେଟିଏ ନାନୁ ଲାକପୁରୁତି ଦେପିଆହାମାନାଣି ମେସ୍‌ସେସି,  
ଏମ୍‌ଆଁ ର ଦବ୍‌ଲା ଖାଣାଗାଟି ଗଡ଼ା ମାଚେ, ଏମ୍‌ଆଁ ହୁଚାମାନାଣି  
ଦରୁ ନାମିତାୟି ଅଡ଼େ ସାତାତାୟି; ଏଝାସି ନେହଁ କିଁ ନୀହାୟି  
କିନେସି, ଅଡ଼େ ଜୁହୁ କିନେସି □

୧୨ ଏଝାଣି କାଣକା ହିରୁ ଗୁଦ୍‌ଝା ଲେହେଁତାଇ, ତାନି ତାୟାଁ ତୁ  
ହାରେକା ଚପେରିକା, ଅଡ଼େ ଏଝାଣି ର ଦରୁ ରାସ୍‌କି ଆହାମାନେ, ଏ  
ଦରୁ ଏଝାଣି ପିସ୍‌ପେ ଆମ୍‌ଆରି ପୁନଅରି □

୧୩ ଏଝାସି ନେତେରିତା ଉଡ଼ହା ମାନି ର ହିମ୍‌ରି ହୁଚାମାନେସି,  
ଇଞ୍ଜା ଏଝାଣି ଦରୁ “ମାହାପୁରୁତି ବଲ୍ଲୁ □”

୧୪ ଲାକପୁରୁତି ଜୁଜୁ କିନାରି ଅପ୍ନି ଦବ୍‌ଲା ହିମ୍ବରକା ହୁଚାନା ଦବ୍‌ଲା ଖାଣା ଗଡ଼ାୟା ଲାକ କୁଗାନା ତାନି ଜେତ ହାଚେ □

୧୫ ☆ଏଝାଣି ଗୁତିଟି ଝାସ୍ତି କାଣ୍ଡା ହନେ, ଏ କାଣ୍ଡାତଲେ ବାରେ ଦେସାତି ଲକୁଇଁ ଚୁଣ୍ଡନେସି; ଏଝାସି ଏଝାରାଇଁ ଲହ୍ ବାଡ଼ଗା ତଲେ ସାଲୁଝି କିନେସି, ଅଡ଼େ ଏଝାସି ତାନୁଏ ବାରେ ବାଡ଼ମୁଗାଟି ମାହାପୁରୁ କାଜା କପା ଲେହେତି ଅଞ୍ଜୁରି ପାଡ଼େୟିକା ପୀତିନି ଗାଡ଼ମୁତା ମାନି ପାଡ଼େୟିକା ଝିହ୍‌ନେସି □

୧୬ ଏଝାଣି ହିମ୍ବରତା ଅଡ଼େ ଏଝାଣି କୁଦଗୁତା ଇ ଦରୁ ରାସ୍‌କି ଆହାମାନେ, “ରାଜା କିହାଁ ରାଜା ଅଡ଼େ ପ୍ରବୁ କିହାଁ ପ୍ରବୁ □”

୧୭ ଏଚେଟିଏ ନାନୁ ର ଦୁଡୁଇଁ ଝେଡ଼ା ଲାକ ନିଚାମାନାଣି ମେସ୍‌ସେଏ; ଏଝାସି ହାଗୁତି ମାଦି ଉମ୍ବିମାନି ବାରେ ପଚାୟାଣି କାଜା ହାଡ଼ାତଲେ ହାଟାନା ଏଲେଇଚେସି, “ଝାଦୁ ମାହାପୁରୁତି କାଜା ବଜିତା କୁଡ଼ା ଆଦୁ □

୧୮ ଏନିକି ମୀରୁ ରାଜାୟା, ଜୁଜୁ ତାକି କାଜାରି, ବାଡ଼ମୁ ଗାଟାରି, ଗଡ଼ାୟା ଅଡ଼େ ଗଡ଼ା ଲାକ କୁଗାମାନାରି, କଡ଼ାମାନି ହଲିୟାଙ୍ଗା, ହଲିୟାଙ୍ଗା ଆଆତାରି, କାଜାରି ଅଡ଼େ ଇଚାରି ବାରେତି ଉଙ୍ଗା ତିଞ୍ଜେରି □”

୧୯ ଡାୟୁ ନାନୁ ଜନ୍ତତି ଅଡ଼େ ଦାରତିତି ରାଜାୟାଣି ଅଡ଼େ ଏଝାରି ଜୁଜୁ କିନାରାଇଁ, ଏଝାରି ଗଡ଼ାୟା ଲାକ କୁଗାମାନାରି ଇଞ୍ଜାଁ ଏଝାରି ଜୁଜୁ କିନାରି କପାଟି ଜୁଜୁ କିହାଲି କୁଡ଼ା ଆହାମାନାଣି ମେସ୍‌ସେଏ □

୨୦ ଏ ଜୁଜୁତା ଜନ୍ତ ଅଡ଼େ ଏଦାନି ନକିତା କାବାଆନି କାମା କିହିମାନି ଏ ନାଡ଼ିକିନି କ୍ରୀସ୍‌ଇଁ ଆସାନା ଦସ୍‌ପିଆଡେ □ ଆମିନି ଲକୁତାଣା ଏ ଜନ୍ତତି ସିନା ମାଚେ ଇଞ୍ଜାଁ ଆମ୍ବାଆରି ଏଦାନି ବମାଡି ପୂଜା କିହିମାଚେରି, ଜନ୍ତ ତାନି କାବାଆନି କାମା ତଲେ ଏଝାରାଇଁ ନାଡ଼ି କିହିମାଚେ □ ଜନ୍ତ ଇଞ୍ଜାଁ ନାଡ଼ିକିନି କ୍ରୀସ୍‌ଇଁ ଡ଼ୀଞ୍ଜିମାନି ହିଚୁତା ଜୀଝୁତଲେ ମେଡ଼ପିଆଡେ □

୨୧ ଅଡ଼େ ଏଚେକା ଡ଼ୟିତି ଲକୁ ଗଡ଼ା ଲାକ କୁଗାମାନାଣି ଗୁତିଟି ହରିମାନି କାଣ୍ଡାତଲେ ପାୟୁଝିଆଡେରି; ଏଚେଟିଏ ବାରେ ପଚାୟାଁ ଏଝାରି ଉଙ୍ଗା ତିଞ୍ଜାନା ବାଣ୍ଡି ପାଞ୍ଜିଡୁ □

☆ ୧୯:୧୫ ୧୯:୧୫ ଝେ ବଲ୍ଲ ୧୪:୨୦

## ୨୦

ର.ମାଣା ବାର୍ଯ୍ୟାତି ରାଜି କିନାୟି

୧ ଏଚେଟିଏ ନାନୁ ର.ଦୁଡୁଇଁ ଲାକପୁରୁଟି ରେଚା ଝାହିମାଚାଣି ମେସ୍ତେସ୍, ଏଝାଣି କେୟୁତା ତାଡ଼େପୁରୁ ଗାଡ଼ୟୁତି କୁଟିକାଡ଼ି ଅଡ଼େ ର.କାଜା ହିକଣି ମାରୁ □

୨ ଏଝାସି କାଜା ରାରୁତି, ଏ.ପ୍ଲୁଃଇ ନାଗା, ଇଚିହିଁ ଦିୟାବଲ ଅଡ଼େ ସୟତାନତି ଆସାନା ର.ମାଣା ବାର୍ଯ୍ୟା ପାତେକା ଦସ୍ପା ଇଟିତେସି □

୩ ଅଡ଼େ ଏଦାନି ତାଡ଼େପୁରୁ ଗାଡ଼ୟୁତା ମେଡ଼ହାନା ଗାଡ଼ୟୁତି ଦୁଝେରି ସୁଶ୍ଚାନା ଏଦାନି ଲାକ ହାକିତି ମୁଦ୍ରା ଝେତେସି, ଇଞ୍ଜା ଏନିକିଁ ଏଦି ର.ମାଣା ବାର୍ଯ୍ୟା ରାଆ ପାତେକା ଦେସାତି ଲକୁଣି ନାଡ଼ି କିହାଲି ଆଡ଼େଏ; ଅଡ଼େ ତାୟୁ ଗାଡ଼େକା ତାକି ପିସ୍ପି କିଝି ଆନେ □

୪ ଏଚେଟିଏ ନାନୁ ଏଚରଗଟା ସିଂଗାସାଣିୟାଁ ମେସ୍ତେସ୍, ଏ.ବାରେ ଲାକ ଏଚରଜାଣା କୁଗିତେରି, ଏଝାରାକି ନୀହାଁୟି କିହାଲି ଅଦିକାରା ହୀପକିଆଡ଼େ, ଅଡ଼େ ଜୀସୁତି କାତା ଇଞ୍ଜା ମାହାପୁରୁତି ବଲ୍ଲୁ ତାକି ଆମ୍ବାଆରି ତାର୍କା ଦାପି ଆହାମାରୁ, ଇଞ୍ଜା ଆମ୍ବାଆରି ଏ.ଜନ୍ତ ଅଡ଼େ ତାନି ବମାତି ଜହରା କିହାଁ ହିଲାଆତେରି ଅଡ଼େ ତାନି ସିନାତି ମୁଞ୍ଜୁତା କି କେୟୁତା ବେଟାଆହା ହିଲାଆତେରି, ଏଝାରି ଜୀଝୁୟାଁ ମେସ୍ତେସ୍; ଏଝାରି ଝେଣ୍ଡେ ନୀତାନା କ୍ରୀସ୍ତ ତଲେ ର.ମାଣା ବାର୍ଯ୍ୟା ପାତେକା ସାଲୁଝି କିତେରି □

୫ ଅଡ଼େ ଏଚେକା ହାଡ଼ି ଲକୁ ଏ.ର.ମାଣା ବାର୍ଯ୍ୟା ରାଆ ପାତେକା ନୀତାଆତେରି, ଇଦିଏ ତଲିତି ହାକିତି ନିଜିନାୟି □

୬ ଆମ୍ବାଆରି ମୂଲୁ ଝେଣ୍ଡେ ନିଜିନି ତାଣା ଆଣ୍ଡିନେରି ଏଝାରି ନେହେଁ, ଅଡ଼େ ଏଝାରି ସୁଦୁଗାଟାରି; ଅଡ଼େ ଏଝାରି ମୁହେଁ ତାୟୁତି ହାକିତି ଏନି ଅଦିକାରା ହିଲେଏ, ସାମା ଏଝାରି ମାହାପୁରୁ ଅଡ଼େ କ୍ରୀସ୍ତ ପୂଜେରାଜା ଆହାନା ଏଝାଣିତଲେ ର.ମାଣା ବାର୍ଯ୍ୟା ପାତେକା ସାଲୁଝି କିନେରି □

ସୟତାନତି ହାରଝି ଆନାୟି

୭ ଏ ର ମାଣା ବାର୍ଷା ରାତିସାରେ ସୟତାନ ଦସ୍ପି ଆହାମାତି  
ଇଲୁଟି ପିସ୍ପି ଆନେ □

୮ ଏଚେଟିଏ ସୟତାନ ଦାର୍ତତି ସାରିସୁଟୁ ମାନି ଦେସାତାରାଇଁ  
ଇତିହିଁ ସାମ୍ବୁରିତି ବାଃଲି ସମାନା ହାରେକା ଗର୍ ଅଡ଼େ ମେଗର୍  
ଏଞ୍ଜାରାଇଁ ନାଡ଼ିକିହାନା ଜୁଜୁ ତାକି କୁଡ଼ିକିହାଲି ହଚାହାନେ □

୯ ଏଞ୍ଜାରି ଦାର୍ତତି ସାରିସୁଟୁ ହାଜାନା ମାହାପୁରୁ ଲକୁ ବାସାଆନି  
ତାଣା ଅଡ଼େ ମାହାପୁରୁ ଜୀଞ୍ଜୁ ନହାଁମାନି କାଜା ଗାଡ଼ାତା ମୁଚିତେରି,  
ଏରିବେଲା ଲାକପୁରୁଟି ହିରୁ ରିହାନା ଏଞ୍ଜାରାଇଁ ନାସା କିତେ □

୧୦ ଆମିନି ସୟତାନ ଏଞ୍ଜାରାଇଁ ନାଡ଼ି କିହାମାତେ, ଏଦାନି ହିରୁ  
ଅଡ଼େ ଗାନ୍ଧାଗୁଣ୍ଡା ତଲେ ଡ଼ାଞ୍ଜିମାନି ଗାଡ଼ୁମୁତା ମେଡ଼ପିଆଡ଼େ,  
ଏମ୍ପାଆଁ ଏ ଜଡ଼ ଇଞ୍ଜା ମାହାପୁରୁ ବଲ୍ଲୁ ମିଚି ଝେହ୍ନାସି ଜିକେଏ  
ମାନେସି; ଅଡ଼େ ଏଞ୍ଜାରି ଏମ୍ପାଆଁ ଲାଆଁ ମାଦେନା କାଲ୍ଲକାଲ୍ଲା ତାକି  
ଡ଼ଣ୍ଡ ବେଟାଆନେରି □

### ରାନି କାଲ୍ଲାତି ନୀହାଁୟି

୧୧ ଏଚେଟିଏ ନାନୁ ର କାଜା ଦବ୍ଲା ସିଂଗାସାଣି ଇଞ୍ଜା ଏମ୍ପାଆଁ  
ରଅସି କୁଗାମାନାଣି ମେସ୍ପେସ୍; ଏଞ୍ଜାଣି ନକିଟି ଦାର୍ତତି ଅଡ଼େ  
ହାଗୁପାକା ହଚାଡୁସ୍ତୁ ଏଞ୍ଜାସିକାକି ଅଡ଼େ ଚାୟୁ ମେଡ଼ା ଆଆଡେ □

୧୨ ଅଡ଼େ ନାନୁ ଇଚାରି କାଜାରି ବାରେ ହାଡ଼ାରାଇଁ ସିଂଗାସାଣି  
ନକିତା ନିଚାମାନାଣି ମେସ୍ପେସ୍, ଅଡ଼େ ପଡ଼ିୟା ବାରେ ଦେପିଆଡୁ;  
ତାୟୁ ଜୀଞ୍ଜୁତି ପତି ଇଞ୍ଜିଁ ଅଡ଼େ ର ପତି ଦେପିଆଡ଼େ; ଏ ପତିଣାଁ  
ରାସ୍ପକି ଆହାମାନି ଲେହେଁ ହାଡ଼ାରି ତାମି କିତି କାମା ଲେହେଁ ନୀହାଁୟି  
କିଞ୍ଜି ଆଡ଼େରି □

୧୩ ସାମ୍ବୁରି ତାନିତାଣାଟି ହାଡ଼ାରାଇଁ ହେରପିତେ, ଇଞ୍ଜା ହାକି  
ଅଡ଼େ ତାଡ଼େପୁରୁ ତାନି ତାଣା ହାଡ଼ାରାଇଁ ହେରପିତୁ; ଇଞ୍ଜା ଏଞ୍ଜାରି  
ବାରେ ତାମି କିତି କାମା ତଲେ ନୀହାଁୟି କିଞ୍ଜି ଆଡ଼େରି □

୧୪ ଏଚେଟିଏ ହାକି ଅଡ଼େ ତାଡ଼େପୁରୁଟି\* ହିରୁତଲେ ଡ଼ାଞ୍ଜିମାନି  
ଗାଡ଼ୁମୁତା ମେଡ଼ପିଆଡ଼େ, ଇ ତାୟୁତି ହାକି ଇତିହିଁ ହିରୁ ଗାଡ଼ୁମୁ  
□

\* ୨୦:୧୪ ୨୦:୧୪ ହାଡ଼ାରି ମାନି ଦେସାତି



୧୫ ଆତ୍ମାଆରି ଦରୁ ଜୀଝୁତି ପତିତା ରାସ୍‌କି ଆହା ହିଲାଆତେ ଏଝାରାଇଁ ଡ଼ାଞ୍ଜିମାନ ହିରୁ ଗାଡ଼୍‌ମୁତା ମେଡ଼ପିଆଡ଼େ □

## ୨୧

ପୁଝନି ହାଗୁପାକା ଅଡ଼େ ପୁଝନି ଦାରତି

୧ \*ଏମ୍‌ପାଟିଏ ନାନୁ ର ପୁଝନି ହାଗୁପାକା ଅଡ଼େ ପୁଝନି ଦାରତି ମେସ୍‌ସ୍‌ସ୍‌, ଇଚିହିଁ ତଲିତି ହାଗୁପାକା ଅଡ଼େ ତଲିତି ଦାରତି ମେଶ୍‌କ୍‌କା ହାଜାମାନେ, ଇଞ୍ଜା ସାମ୍‌ଦୁରି ଅଡ଼େ ହିଲାଆତେ □

୨ \*ଅଡ଼େ ନାନୁ ସୁଦୁ ଗାଡ଼ା ଇଚିହିଁ ପୁଝନି ଜିରୁସାଲମତା ତାନି ବୀହା ଆନି ତକ୍ରାଇ ବେଟାଆୟାଲି ତିୟାରା ଆହାମାନି ଡ଼ାଆ ମାକ୍‌କାଲେହେଁ ଲାକପୁରୁତି ମାହାପୁରୁ ତାଣାଟି ରେଟାଝାହି ମାଚାଣି ମେସ୍‌ସ୍‌ସ୍‌ □

୩ ଅଡ଼େ ନାନୁ ସିଂଗାସାଣିଟି ର କାଜା ହାଡ଼ା ଏଲେ ଇଞ୍ଜିମାଚାଣି ଝେରେଏଁ, “ମେହ୍‌ମୁ ମାଣସିୟାଁ ତାଣା ମାହାପୁରୁତି ବାସାଗାୟା ମାନେ, ଏଝାସି ଏଝାରିତଲେ ବାସା ଆନେସି, ଇଞ୍ଜା ଏଝାରି ଏଝାଣି ଲକୁ ଆନେରି,

୪ ଅଡ଼େ ମାହାପୁରୁ ତାନୁଏ ଏଝାରିତଲେ ଡ଼ୟିନେସି, ଇଞ୍ଜା ଏଝାରି କାନୁତି ବାରେ କାଣ୍ଡୁ ଡ଼େଜାଡ଼ୁହନେସି; ଏମ୍‌ପାଆଁ ହାକି ଅଡ଼େ ଝାଏ; ଦୁକୁ, ଡ଼ାକି, ଇଞ୍ଜା ବୀସା ଅଡ଼େ ଡ଼ୟେଏ; ଇଚିହିଁ ପୁଝଆୟି ବାରେ ମେଶ୍‌କ୍‌କା ହାଜାମାନେ □”

୫ ଏଚେଟିଏ ସିଂଗାସାଣିତା କୁଗାମାନାସି ଏଲେଇଚେସି, “ମେହ୍‌ମୁ ନାନୁ ବାରେ ପୁଝନି କିହିମାଇଁ!” ଅଡ଼େ ଏଝାସି ଏଲେଇଞ୍ଜାଚେସି, “ରାଡ଼ାମୁ, ଏନାଆଁତାକି ଇଚିହିଁ ଇ ବାରେ କାତା ସାତାତାୟି ଅଡ଼େ ନାମୁଗାଚାୟି □”

୬ ଏଝାସି ନାକ୍‌କେ ଅଡ଼େ ଏଲେଇଞ୍ଜାଚେସି, “ବାରେ ରାଡ଼େୟିଏ, ନାନୁ ଆଲ୍‌ପା ଅଡ଼େ ଅମେଗା, ମାଡ଼ନାଚେଏଁ ଅଡ଼େ ରାପ୍‌ନାଚେଏଁ, ଆତ୍ମାଆସି ଏସ୍‌କି ଗାଚାସି ଏଝାଣାକି ଜୀଝୁହାନି ଜାର୍‌ଶାଟି ତାବୁୟାଁ ହୀଆନା ଏୟୁ ଗସାଲି ହୀଇଁ □

୭ ଆମ୍ବାଆସି ଜୀଣା ଆନେସି, ଏଞ୍ଜାସି ଇ ବାରେଡି ଅଦିକାରା ଆନେସି; ନାନୁ ଏଞ୍ଜାଣି ମାହାପୁରୁ ଆଇଁ, ଇଞ୍ଜା ଏଞ୍ଜାସି ନା ମୀରୁଏସି ଆନେସି □

୮ ସାମା ଆମ୍ବାଆରି ଆଜିନାରି, ନାମୁ ହିଲାଆ ଗାଟାରି, ଅପାଆଗାଟି କାମାକିନାରି, ଲକୁଣି ପାୟିନାରି, ଦାରି କିନାରି, ଗୁଣି ଗାରୁଡି କିନାରି, ପେଣକା ବମାୟା ପୂଜା କିନାରି, ଏଞ୍ଜାରି ଅଡେ ବାରେ ମିତି କାତା ଝେହ୍ନାରି, ହିରୁ ଅଡେ ଗାନ୍ଦାଗୁଣ୍ଡା ତଲେ ଡାଞ୍ଜିମାନି ଗାଡ଼ମୁତା ଟାମୁ ବେଟାଆନେରି, ଏଦି ଡାମୁଡି ହାକି □”

### ପୁଃନି ଜିରୁସାଲମ

୯ ଏରେଟିଏ ସାଡାଗଟା ଦୁଡୁୟା ଡାମୁଡି ସାଡାଗଟା ଡଣ୍ଡୟାଁଇଁ ଆସାମାନି ସାଡାଗଟା ଗିନାୟାଣା ସାଡାଗଟା ଦୁଡୁୟା ବିଡ୍ରାଟି ର ଦୁଡୁ ନା ଡାଣା ଖାହାନା ଏଲେଇଞ୍ଜାଡେସି, “ଇମ୍ବାଆଁ ଖାମୁ, ବାହା ଆହିମାନି ଡାଆମାଙ୍ଗା ଇଚିହିଁ ମେଣ୍ଡା ଡାଲୁଡି ଡକ୍ରିନି ନିଙ୍ଗ ତସାଇଁ □”

୧୦ ଏରେଟିଏ ଏ ଦୁଡୁ ନାଙ୍ଗେ ସୁଦୁଜୀଞ୍ଜୁ ବାଡ଼ମୁଡି ର କାଜାୟି ଅଡେ ପାଡାଆଡି ହରୁଡା ଅହାନା ଏ ସୁଦୁ ଗାଡା ଜିରୁସାଲମତି ତସାଡେସି, ଏଦି ଲାକପୁରୁଟି ଇଚିହିଁ ମାହାପୁରୁ ଡାଣାଟି ରେଟା ଖାହିମାରେ,

୧୧ ଅଡେ ଏଦି ମାହାପୁରୁଡି ଗାଞ୍ଜୁରମି ତଲେ ମିଣ୍ଡିମାରେ, ଏଦାନି ଉଜେଡି ହାରେକା ଦାରାଗାଟି ମଣି ଅଡେ ଝେଡାଡି ଅପ୍ନି ଦାପେଣିଲେହେଁ □

୧୨ ଏଦାନି ସାରିସୁରୁ ର କାଜାୟି ଅଡେ ପାଡାଆଡି କଟା ମାନେ, ଏମ୍ବାଆଁ ବାରଗଟା ଦୁଝେରିକା, ଏ ଦୁଝେରିକାଣା ବାରଜାଣା ଦୁଡୁୟା ଇଞ୍ଜା ଦୁଝେରିକା ଲାକ ଇସାୟେଲ ମୀରକାଡି ବାର କୁଡାଡି ଦରକା ରାସକି ଆହାମାନେ □

୧୩ ଝେଡା ହପୁଞ୍ଜାକି ଡାନିଗଟା ଦୁଝେରିକା, ଟିଃନିଞ୍ଜାକି ଡାନିଗଟା ଦୁଝେରିକା, ଟେବ୍ରିଞ୍ଜାକି ଡାନିଗଟା ଦୁଝେରିକା, ଅଡେ ଝେଡା କୁଡ଼ନି ଞ୍ଜାକି ଡାନିଗଟା ଦୁଝେରିକା □

୧୪ ଏ ଗାଡ଼ାତି କଟା ବାରଗଟା ପୁନାଦିକା ଇଟ୍‌କି ଆହାମାନୁ, ଏ ଖାଲ୍‌କା ଲାକ ମେଣ୍ଡା ତାଲୁ ତାଣାଟି ବାରଜାଣା ପାଣ୍ଡୁଝି ଆହାମାନାରି ବାରଗଟା ଦରକା ରାସ୍‌କି ଆହାମାନୁ

୧୫ ନା ତଲେ କାତା ଆହିମାଟି ଦୂତୁତି କେୟୁତା ଗାଡ଼ାତି, ଇଞ୍ଜା ଏମ୍‌ପାତି ଦୁଝେରିକା ଅଡ଼େ ସାରିସୁରୁତି କଟା ଲାଟାଲି ର ବାଂଗାରା ବାଡ଼ଗା ମାଟେ □

୧୬ ଏ ଗାଡ଼ାତି ସାରି କନ, ତାନି ଲାମ୍‌ପା ଅଡ଼େ ଅସାରା ରଣ୍ଡିଏ ସମାନା; ଏଝାସି ଏ ଗାଡ଼ାତି ଏ ବାଡ଼ଗା ତଲେ ଲାଟାଲିଏ ବାର ମାଣା ବାଡ଼ଗା ଆଡ଼େ; ଏମ୍‌ପାତି ଲାମ୍‌ପା ଅସାରା ଅଡ଼େ ପାଡ଼ଣି ଜିକେଏ ସମାନା ଆଡ଼େ □

୧୭ ଅଡ଼େ ତାୟୁ ଏଦି ଗାଡ଼ାତି ସାରିସୁରୁ କଟା ଲାଟାଲିଏ ଏଦି ମାଣସିତି ଲେକାତଲେ ସାଡ଼ାକଡ଼ି ସାରି ହାଡ଼ା ଆଡ଼େ, ଦୂତୁ ଏ ଲେକାତଲେ ଲାଟି ମାଟେସି □

୧୮ ଏ ସାରିସୁରୁତି କଟା ଝେଡ଼ାତି ଅପ୍‌ନି ଦାପେଣି ଲେହେଁତି ମଣି ତଲେ କେପି ଆହାମାନେ, ଅଡ଼େ ଗାଡ଼ା ଅପ୍‌ନି ଦାପେଣି ଲେହେଁତି ସୁଦୁ ବାଂଗାରା ତଲେ କେପି ଆହାମାନେ □

୧୯ ଗାଡ଼ାତି ସାରିସୁରୁ କଟାତି ପୁନାଦି ଏଟକା ଏଟକାତି ହାରେ ଦାରାଗାଟି ମଣି ଖାଲ୍‌କାତଲେ ଅଜିକିଝି ଆହାମାନେ, ତଲିତି ପୁନାଦି ଜାସପର, ରା ଲମ୍‌ପର ପୁନାଦି ନିଲକାନ୍ତମଣି, ତାନି ଲମ୍‌ପର ପୁନାଦି ବଦୁଜ୍ୟମଣି, ସାରି ଲମ୍‌ପର ପୁନାଦି ମରକତମଣି,

୨୦ ପାସା ଲମ୍‌ପର ପୁନାଦି ପଲକମଣି, ସ ଲମ୍‌ପର ପୁନାଦି ମାଣିକ୍ୟ ମଣି, ସାତା ଲମ୍‌ପର ପୁନାଦି ପୁସ୍‌ପରାଗମଣି, ଆଟା ଲମ୍‌ପର ପୁନାଦି ପିରଜମଣି, ନ ଲମ୍‌ପର ପୁନାଦି ଗମେସଦକ ମଣି, ଦସ ଲମ୍‌ପର ପୁନାଦି ଇସ୍‌ନିୟମଣି, ଏଗାର ଲମ୍‌ପର ପୁନାଦି ଦାରଣକି ଝାଣାଗାଟି ମଣି, ବାର ଲମ୍‌ପର ପୁନାଦି ନେହଁ ଗାନ୍ଧାଗାଟି ମଣି ମାଟେ □

୨୧ ବାର ଗଟା ଦୁଝେରିକାଣା ବାରଗଟା ମୁଲ୍‌ଲାୟା, ର ଦୁଝେରିତି ର ମୁଲ୍‌ଲା ତଲେ କେପି ଆହାମାନୁ; ଅଡ଼େ ଗାଡ଼ାତି ଆଂଗେଣିକା ନେହଁ ଦାପେଣି ଲେହେଁତି ସୁଦୁ ବାଂଗାରା ତଲେ ଆହାମାନୁ □

୨୨ ନାନୁ ଏ ଗାଡ଼ାତା ଏଦି ଦେଝୁଡ଼ି ଜିକେଏ ମେହ୍‌ଆତେଏଁ, ଇତିହଁ ପ୍ରବୁ ବାରେ ବାଡ଼ୟୁ ଗାଟି ମାହାପୂରୁ ଅଡ଼େ ମେଣ୍ଡା ତାଲୁଏ

ଏମ୍ବାତି ଦେଖୁଡ଼ି ସମାନା □

୨୩ ଉଜେଡ଼ି ତାକି ଏମ୍ବାଆଁ ଝେଡ଼ା କି ଲେଞ୍ଜୁତି ଲଡ଼ା ଆଏ, ଇଚିହଁ ମାହାପୁରୁତି ଗାଝୁରମିଏ ଏମ୍ବାଆଁ ଉଜେଡ଼ି କିନେ, ଅଡ଼େ ମେଣ୍ଡା ତାଲୁ ଏମ୍ବାତି ଦାଝିଁ ସମାନା □

୨୪ ଏମ୍ବାତି ଉଜେଡ଼ି ତଲେ ବାରେ ଦାରତିତି ଲକୁ ତାକିନେରି, ଅଡ଼େ ଦାରତିତି ରାଜାୟାଁ ତାମି ହାରେକା ଦନ ଏ ଗାଡ଼ା ବିତ୍ରା ତାନେରି □

୨୫ ଏମ୍ବାତି ଦୁଝେରିକା ମାଦେନା ବେଲା ଦେପି ଆହାଁ ଡ଼ୟିନୁ; ଏଝି ଏଚେଲା ଜିକେଏ ସୁଣୁକି ଆଡ଼, ଇଚିହଁ ଏ ଟାୟୁତା ଲାଆଁୟାଁ ଇନାୟି ହିଲେଏ □

୨୬ ବାରେ କୁଡ଼ାତି ଲକୁ ତାମି ଗାଝୁରମି ଅଡ଼େ ହାରେକା ଦନ ଏ ଗାଡ଼ାତା ତାନେରି □

୨୭ ଏନି ପଲ୍ଲଆ ଗାଟାରି କି ଅପାଆଗାଟି କାମାକିନାରି, ମିତି ଜଲିନାରି ଆମ୍ବାଆରି ଏମ୍ବାଆଁ ହଡ଼ାଲି ଆଡ଼ଅରି; ସାମା ଆମ୍ବାଆରି ଦରୁ ମେଣ୍ଡା ତାଲୁତି ଜୀଝୁତି ପତିତା ରାସ୍ତକି ଆହାମାନେ, ଏଝାରି ହଡ଼ାଲି ଆଡ଼ିନେରି □

## ୨୨

୧ ଡାୟୁ ଦୂତୁ ନାଜେ ଜୀଝୁହାନି ଏୟୁତି ର କାଡ଼ା ତସ୍ତାତେସି, ଏଡ଼ି ଅପ୍ପନି ଦାପେଣିଲେହେଁ ଉଜେଡ଼ି, ଅଡ଼େ ମାହାପୁରୁ ଇଞ୍ଜା ମେଣ୍ଡା ତାଲୁତି ସିଂଗାସାଣିଟି ହଟାନା ଗାଡ଼ାତି ଜିରୁ ମାଦିଟି ହାଜିମାନେ □

୨ ଏ କାଡ଼ାତି ରିକଝାକି ବାର ଦେବା ପାଡ଼େୟି ଆୟିନି ଜୀଝୁତି ମାରୁନୁ ମାନେ, ଏମ୍ବାଆଁ ଲେଞ୍ଜୁ ତାକି ଲେଞ୍ଜୁ ପାଡ଼େୟି ଆୟିନେ, ଇଞ୍ଜା ଏ ମାରୁନୁତି ଆକା ବାରେ କୁଡ଼ାତାରାଇଁ ରଗିଟି ନେହଁ କିନାଇ □

୩ ଏମ୍ବାଆଁ ଏନି ବାକା ଡ଼ୟେଏ, ମାହାପୁରୁ ଅଡ଼େ ମେଣ୍ଡା ତାଲୁତି ସିଂଗାସାଣି ଗାଡ଼ା ମାଦିଏ ଡ଼ୟିନେ, ଇଞ୍ଜା ଏଝାଣି ହଲିୟାଙ୍ଗା ଏଝାଣି ସେବା କିନେରି □

୪ ଏଝାରି ତାନି ମୁମ୍ପୁ ମେହ୍ନେରି, ଇଞ୍ଜା ତାନି ଦରୁ ଏଝାରି ମୁଞ୍ଜୁତା ରାଡ଼ିନେସି □

୫ ଏମ୍ବାଆଁ ଲାଆଁୟାଁ ଆଏ, ଏଞ୍ଜାରାକି ଦୀଞ୍ କି ଝେଡ଼ାତି ଉଜେଡ଼ି ଲଡ଼ା ଆଏ, ଇଚିହିଁ ପ୍ରବୁ ମାହାପୁରୁ ଏଞ୍ଜାରି ମୁହେଁ ଉଜେଡ଼ି ଲେହେଁ ଆନେସି, ଇଞ୍ଜା ଏଞ୍ଜାରି କାଲ୍ଲାକାଲ୍ଲା ତାକି ରାଜି କିନେରି □

**ଜୀସୁ ଝେଣ୍ଡା ଝାନାୟି**

୬ ଏଚେଟିଏ ଦୂତୁ ନାଙ୍ଗେ ଏଲେଇଚେସି, “ଇ ବଲ୍ଲୁ ସାତା ଇଞ୍ଜା ନାମୁଗାଟାୟି; ଏନାୟି ଗାଡ଼େକେଏ ଗଟଞ୍ଜି ଆନେ, ଏ ବାରେ ତାନି ସେବା କିନାରାଇଁ ତସାଲି ତାକି, ପ୍ରବୁ, ମାହାପୁରୁ ଅଣ୍ଡପୁତି ବଲ୍ଲୁ ଝେହନାରି ଜୀଞ୍ଜୁୟାଁତି ମାହାପୁରୁ, ତାନି ଦୂତୁଇଁ ପାଣ୍ଡାମାଞ୍ଜାନେସି □”

୭ “ମେହ୍‌ମୁ ନାନୁ ତବେ ଝାହିମାଇଁ; ଆମ୍ବାଆସି ଇ ପତିତି ବଲ୍ଲୁତି ମାନଞ୍ଜି ଆନେସି ଏଞ୍ଜାସି ନେହେଁ □”

୮ ନାନୁ ଜହନତେଏଁ, ଇ ବାରେ ଝେଟି ଅଡ଼େ ମେସି ତାୟୁ ଆମିନି ଦୂତୁ ନାଙ୍ଗେ ଏ ବାରେ ତସ୍ତାତେସି, ନାନୁ ଏଦାନି ଜହରା କିହାଲି ତାନି ପାଞ୍ଚଆନା କତାଣା ରିତେଏଁ □

୯ ସାମା ଏଞ୍ଜାସି ନାଙ୍ଗେ ଏଲେଇଞ୍ଜାତେସି, “ଜାଗ୍ରାତା ଏଲେକିଆନି, ନାନୁ ଜିକେଏ ନୀ ତଲେ ମାହାପୁରୁ ଅଣ୍ଡପୁତି ବଲ୍ଲୁ ଝେହନି ନୀ ତାୟିୟାଁ ତଲେ, ଅଡ଼େ ଇ ପତିତା ରାସ୍‌କି ଆହାମାନି ବଲ୍ଲୁତି ବାରେ ମାନଞ୍ଜି ଆନାରି ତଲେ ର ହଲେଏଣା ଲେହେଁ; ମାହାପୁରୁଇଁ ଜହରା କିମୁ □”

୧୦ ଅଡ଼େ ଏଦି ନାଙ୍ଗେ ଏଲେଇଞ୍ଜାତେସି, “ନାନୁ ଇ ପତିତି ତାୟୁ ଗଟଞ୍ଜି ଆନି ବଲ୍ଲୁତି ସାଲି କିଆନି, ଏନାଆଁତାକି ଇଚିହିଁ କାଲ୍ଲମି ଏଦାଚେୟିଏ □

୧୧ ଆମ୍ବାଆସି ଦାମ୍ବୁ ହିଲ୍ଲାଆଗାଟାସି, ଏଞ୍ଜାସି ଅଡ଼େ ଦାମ୍ବୁ ହିଲ୍ଲାଆ କାମା କିପାସି, ଆମ୍ବାଆସି ଲାଗେଏ କାମା କିନେସି, ଏଞ୍ଜାସି ଅଡ଼େ ଲାଗେଏ କାମା କିପାସି, ଆମ୍ବାଆସି ଦାମ୍ବୁଗାଟାସି, ଏଞ୍ଜାସି ଅଡ଼େ ଦାମ୍ବୁଗାଟାସି ଆପେସି, ଆମ୍ବାଆସି ସୁଦୁଗାଟାସି, ଏଞ୍ଜାସି ଅଡ଼େ ସୁଦୁ ଆପେସି □”

୧୨ “ମେହ୍‌ମୁ, ନାନୁ ତବେ ଝାହିମାଇଁ, ବାରେଜାଣା ତାକି ତାନି କାମାତି ଲେକାତଲେ ପାଡ଼େୟି ହୀହାଲି ନା ଦାନା ନା ତାଣା ମାନେ □

୧୩ ☆ ନାନୁ ଆଲ୍‌ପା ଅଡ଼େ ଅମେଗାଡେଏଁ, ନକିତାଡେଏଁ ଇଞ୍ଜା ଡାୟୁଡାଡେଏଁ, ମୁଲୁଡାଡେଏଁ ଅଡ଼େ ରାମ୍‌ନାଡେଏଁ □

୧୪ ଜୀଝୁତି ମାର୍‌ନୁତି ଅଦିକାରା ଆୟାଲି ଅଡ଼େ ଦୁଝେରିତି ଗାଡ଼ାଡା ହଡ଼ାଲି ତାକି ଆମ୍ବାଆରି ତାମି ହିମ୍‌ରିକା ରାଡ଼ାମାନେରି ଏଝାରି ନେହେଁ □

୧୫ ସାମା ରେଜିମାନି ନେସ୍‌କା ଲେହେଁଡାରି, ଗୁଣି ଗାରୁଡ଼ି କିନାରି, ଦାରିକାମା କିନାରି, ଲକୁଣି ପାୟିନାରି, ପେଶକା ବମାୟାଣି ପୂଜା କିନାରି, ମିତିକାତାତି ଜୀଝୁ ନନାରି, ମିତି କାମାତି କିହାଲି ରାହାଁ ଆନାରି ବାରେ ପାଙ୍ଗାଡା ଡ଼ୟିନେରି □

୧୬ “ନାନୁ ଜୀସୁଡେଏଁ, ମାହାପୁରୁ କୁଲମିକା ତାକି ମିଙ୍ଗେ ଇ କାତା ଝେସାଲି ନା ଦୁଡୁଇଁ ପାଣ୍ଡାମାଞ୍ଜାଇଁ, ନାନୁଏ ଦାଝୁଦତି ମୁଲୁ ଅଡ଼େ କୂଡାଡାଡେଏଁ; ଏ ଉଜେଡ଼ିତି ଝେୟାଜାରା ହୁକାଡେଏଁ □”

୧୭ ସୁଦୁଜୀଝୁ ଅଡ଼େ ବାହା ଆନି ଡାଆ ମାଙ୍ଗା ଏଲେଇନୁ, “ଝାମୁ!” ଆମ୍ବାଆସି ଝେନେସି ଏଝାସି ଏଲେଇଶ୍‌ମାସି, “ଝାମୁ!” ଏସ୍‌କି ଗାଟାସି, ଝାପାସି, ଆମ୍ବାଆସି ମନ କିନେସି; ଏଝାସି ଜୀଝୁହୀନି ଏୟୁ ଉଜେଏ ଗସ୍‌ପେସି □

### ରାନି କାତା

୧୮ ଆମ୍ବାଆରି ଇ ପତିତା ମାନି ଡାୟୁ ଗଟଝି ଆନି କାତାତି ଝେନେରି, ନାନୁ ଏଝାରାଇଁ ଜାଗ୍ରାଡା କିହଁ ଝେସିମାଇଁ, ଆମ୍ବାଆସି ଇ ପତିତା ଏନାଆଁ ଆଟ୍‌ନେସି, ଆତିହଁ ମାହାପୁରୁ ଇ ପତିତା ରାସ୍‌କି ଆହାମାନି ତଣ୍ଡୁୟାଁ ଏଝାଶାକି ହୀନେସି;

୧୯ ଅଡ଼େ ଆମ୍ବାଆସି ଇ ପତିତି ବଲୁଡି ମ୍ଲେକ୍‌ନେସି, ଆତିହଁ ମାହାପୁରୁ ଇ ପତିତା ରାସ୍‌କି ଆହାମାନି ଜୀଝୁତି ମାର୍‌ନୁ, ଅଡ଼େ ସୁଦୁ ଗାଡ଼ାତି ତାନି ବାଗା ମ୍ଲେକ୍‌ନେସି □

୨୦ ଆମ୍ବାଆସି ଇ ବାରେତାକି ସାକି ହୀହିମାନେସି, ଏଝାସି ଏଲେଇଞ୍ଜି ମାନେସି, ସାତା, “ନାନୁ ତବେ ଝାହିମାଇଁ!” ଆମେନ୍ □ ପ୍ରବୁ ଜୀସୁ ଝାମୁ □

୨୧ ପୁରୁ ଜୀସୁତି କାର୍ନୀମେହ୍‌ନାୟି ବାରେତାୟି ମାଙ୍ଗେ ଆୟାପେ  
□ ଆମେନ୍ □

**ପୁସ୍ତକ ଖୋଲା**

**The New Testament the Kusaal language (Ghana)**

copyright © 1996 Wycliffe Bible Translators, Inc.

Language: Kusaal (Kuvi)

Contributor: Wycliffe Bible Translators, Inc.

**ପୁସ୍ତକ ଖୋଲା,**

**କୁଞ୍ଜ ପୁସ୍ତକ ଖୋଲା, 2020**

The New Testament in Kuvi Language

The Word for the World International

All rights reserved.

2025-05-08

---

PDF generated using Haiola and XeLaTeX on 8 May 2025 from source files

dated 8 May 2025

c688c8bf-38ac-5c00-90bd-6e4eaa165a20